

Luk

¹ Fuunfuun lo re tongge ri sam tofo una siit famteni e fan mok gii Deo kabuk fafuutngeni ilo falifu i kiar.

² Ri usi e fan sinseng kere fa gii ri kabuk melmel are tongge na fam ke sunwar, ri seseng tif kemem ini. Tongge a ri sau pari e fan mok a ine matmat ri riis, tofnge tinglo biing fan mok a e fuut.

³ Iya, biing yau tibom ya sau parfakausi e fan mara mok gii tinglo tofnge, e su kausi sing yau una seti e konona ti sinseng tifo, kaltu bakir Tiofilus,

⁴ usi ini o ku bou parfat lo ini konona fan mok gii ri kabuk fabenge sing o ini, e tикин.

Warfot lo fuut ke Jon kaltu na gugu tarawen

⁵ Lo biing Erot e ta King tingna Judia, e mel e neng e pris asow gii Jekaraiya. I e ta neng lo re fam pris tinglo funmat a Abiya. Ke wok, asow gii Elisabet. I ming e ta tinglo bala matambia a Aron.

⁶ Ru nano ru melmel riis na mata e Deo. Ru ususi fakausi e fam fafanau ma fam fabenge ke Taufi ma e tek ti tubiil keru na mata e Deo.

⁷ Safle e tek ti sikua ru, anwarow Elisabet e pom ma iru nano ru kabuk matuk.

⁸ Nenge pansumbiing, e ta biing ke Jekaraiya tura fan taltalu una fam ulo Felun Nining Bakir ma i ka fafaim are pris na mata e Deo.

⁹ Ma ususi e ninis kere fam pris, iri pilai satu ri ka siikii e Jekaraiya una la ilo bala Felun Nining Bakir ke Taufi, una la tunu e insen.

10 Ma biing anmatam pisii una tunu e insens e puek, tongge nano a ri ka tiim lo ri una male, ri ninining.

11 Ma anggelo ke Taufi ka puek talo, ka sa ti ulo galu miil lo altar na insen. **12** Biing Jekaraiya e pari, i e ginwalwal e fow ma ka soke.

13 Safle anggelo e war singi, "Mangena soke, Jekaraiya, Deo e sam ongni e nining kiam. Kem wok Elisabet eu fasus ine kem ti boron tamat, ma o ku fotngi ini Jon.

14 Ou fefeal tикин lo bo-i a ma tongge fuunfuun ri ku fefeal ming anwarow i e fuut,

15 le i eu bakir na mata e Taufi. I eu tibi fasi una in waen, tam tikas ti dan rawas ming, ma tofnge tinglo biing i e ta ilo bala e tinow, i e sau fuunuf ine Tangwa Riis.

16 Fuunfuun lo re tongge tingna Israel, i eu ikis familri use Taufi Deo keri.

17 Ma i eu la famu ine Taufi, lo tangwa ma rawas are Elaija, una tafu e balamaris falifu ire fan tamtamabo-i ma siksikwa ri ma i ku ikis familre tongge ri fasange singe sinang riis use atausimale lo sal e riis, usi ini eu gau re tongge ri ku fagati ri are tongge ri fagati ri nene-i e Taufi."

18 Jekaraiya ka gatmo e anggelo, "Are ini gii ya ku parfat ini mok gii eu puek tикин? Ya sau matuk ma kek wok ming e sau matuk."

19 Anggelo ka koso, "Yau Gebriel. Ya sagisu melmel bingne inaisa e Deo, ma i e sam tule yau una peteng tifo ine konona sunwar gii.

20 Ma gii, anwarow o tibi titinge lo kek sunwar, a kamu puek tикин lo biing riis lo, ngusum eu kut

ma o ku tibi fasi una gon ku muut lo biing mok gii eu fuut.”

²¹ Sumbiing a, tongge ri nene i uwa e Jekaraiya ma ri ka sangfuunfuun usi, ini e tamu i ka la melmel tapak tикиn ilo bala Felun Nining Bakir.

²² Biing i e suu mil, i e tibi fasi una gon sing ri. I e su gowgow e fan tintof tifri, iya ri kau parfat ini i e pari e mok e ngo are numbiil ulo bala Felun Nining Bakir. Safle uwa, i e tiflik fasi una war.

²³ Biing, sumbiing kia una famim e sam rop, Jekaraiya e la mil ulo male.

²⁴ Wimi ini, ke wok Elisabet ka tian ma lo e lim e funiil, i e su melmel borong.

²⁵ Ma i ka war aregii, “Taufi e bilseni e mok gii lo yau. Lo fam biing gii, i e fanangsi e fatengis kia lo yau ma kabuk tii ine an maiyai tinglo yau falifu ire tongge.”

Warfot lo fuut ke Yesus

²⁶ Lo funiil baba e on ke Elisabet, Deo e tuleni e anggelo Gebriel wina Nasaret, neng e taon ina Galili,

²⁷ usi e neng e makos e mapek asow gii Maria. Ri sau fagati ini i eu tili e neng lo re fesa e Dewit, ri fotngi ini Josef.

²⁸ Anggelo e la usi ma ka la war singi, “Siaro sing o, Deo e ta tura o ma i e sam warfakausi o.”

²⁹ Maria e onggi e sunwar a ka la kuufsak ma ka la sangfuunfuun ini, aregii, e ta sese mok sekit.

³⁰ Safle anggelo e war singi, “Ou tibi soke Maria, Deo e gasgas tикиn lo o.

³¹ Ou tian ma o ku fasus ine ti boron tamat. Ma o ku fotngi e asow ini Yesus.

32 Asow eu bakir tикин ma ri ku fotngi ini Sikow e Deo Aiyat Sekit. Deo Taufi eu tafu ku kiis lo sia king ke an tumlow Dewit.

33 Ma i ku ta king bingne kere fesa e Jekop. Ma fam king kia eu tibi fasi una rop."

34 Maria ka gatmo e anggelo, "Are legii mok gii eu fuut ma ka ta ya na makos mapek?"

35 Anggelo ka koso, "Tangwa Riis ke Deo Aiyat sekit eu pu talo o ma rawas kia ku afit o. Iya, kaltu tarawen a ku fuut a, riu fotngi ini Sikow e Deo.

36 Wok lo o ming Elisabet, e sau matuk leii, safle e sam tian. Ma i, se lewa ri ka peteng ini e pom, e sam on e amfuniil kia.

37 Anwarow e tek ti mok eng kala sing e Deo."

38 Maria ka war singi, "Ya na fefin na mus ke Deo. Tafu ku fuut lo yau aregii o ka peteng." Kala anggelo ka la kosngi.

Maria e la fu lo Elisabet

39 Lo sumbiing a Maria e matet ka la saupe tикин ulo neng e taon ilo pakpaulun male ilo prowins ina Judia.

40 Uwa i e la kaulek ulo fel ke Jekaraiya ma ka la areni e Elisabet.

41 Biing Elisabet e ongni e are ke Maria, bo-i ulo bala e boles ma Elisabet ka la fuunuf ine Tangwa Riis.

42 Ma i ka kaung bakir ma ka war, "Deo e warfakausi o iyat ire gelefin nano ma bo-i ming a o ku fasus ini, i e sam kepe ming e warfakausi ke Deo.

43 E ta yau se sekit legii, gii tinow e Taufi kiang ka sa la usi yau?

44 Sumbiing sekit ya ongni e are kiam, bo-i ilo balang e boles tura fefeal.

45 Deo eu warfakausi o le o sam titinge ini sa Taufi e peteng ini tifo, eu fuut aregii i ka peteng.”

Seksek a Maria

46 Ma Maria ka war,

“Balang e resngeni e Taufi

47 ma tangwang ka fefeal lo Deo, anwaram-faliunge kiang,

48 Le i e sam tengis yau

ma ka su ta ya na fefin na famim kia. Ya na mok fofoes.

Geinggii ma wimi ming tongge riu peteng ini Deo e sam tow e singmat na fefeal tif yau,

49 anwarow Deo se e rawas tikan e sau bilseni e fan mok lamlam tikan lo yau,
ma asow e tarawen.

50 Fatengis kia eu ta ilo seri a ri ka soksokeni,
tinglo neng e inlen ku la lo ilo neng e inlen.

51 I e sau bilseni e fam fam rawas tikan ine limow.
I e sau fesel falek ire tongge ri akteni e asasri
tibom ilo sinsinangu ri.

52 I e sau feselufu e fang king rawas tinglo fan sia
king keri
ma ka akte re fa ri fapori.

53 I e sau fenre tongge ri fitol ine konona fan mok
ma ka tule re tongge ri mel e tuba ri, ri ka la
fofoes.

54 I e sam ulsi e kaltu na mus kia Israel,
are lewa ka warfot tifri una tengis ri

55 tife Abra-am ma fan tubtubungkak kia bingne,
ma are lewa ka war ming singre tumtumla
rer.”

56 Maria e melmel tura Elisabet lo are e tuul e funiil ma kam la mil wilo male kia.

Fuut ke Jon kaltu na gugu tarawen

57 Biing e sam ti lo pansumbiing ke Elisabet una kepe ke bo-i, i e fasus ine boron tamat.

58 Tongge fatatu ma tongge lo, ri ong ini Taufi e sau fanangsi ine singmat na warfakausi, ma ri ka sa gasgas tiim tura.

59 Lo biing baba e wal tongge ri ka puek una sa talsi e pinumfow e bo-i a, ma ini ri ku fotngi ine asow e tamow, Jekaraiya.

60 Safle tinow e peteng aregii, “E tam! Riu fotngi ini Jon.”

61 Ri ka peteng tifi, “E tek tikas falifu ire tongge lo gam ek mel e as a.”

62 Kala ri ka gow e fan tintof tife tamow, una sikseni ini sese as i e bura ini eu fotngi ine bo-i.

63 Jekaraiya ka gatom use ti mok una siisiit, ma tongge nano ri kala sangfuunfuun singi e siisiit aregii, “Asow gii Jon.”

64 Saupesak ngusu ka ipiik ma angkermow ka pipik ma ka tofnge una war, ka katfarsi e asow e Deo.

65 Tongge fatatu ri nano ri tiin la soke ma tongge ulo male kiruur ilo pakpaulun male ilo prowins ina Judia ri tiin fafagon use fan mok gii.

66 Tongge nano seri, ri ong lo mok gii ri sangfuunfuun ma ri ka gatom, “Bo-i gii ku puek ku ta sese ti kaltu gii wimi?” Le ri parfat ini rawas ke Taufi e ta tura.

Seksek a Jekaraiya

- 67 Jekaraiya tamow e bo-i a, e fuunuf ine Tangwa Riis, ma ka war ine fan warwar profet:
- 68 "Katfariis tife Taufi, Deo kere fan Israel,
anwarow i e sau puek ma ka bung kep
familre tongge kia.
- 69 I e sau fafuutngeni e neng e kaltu rawas una
faliunge kiar,
ilo bala funmat a kaltu na mus kia, Dewit,
- 70 are lewa i kabuk peteng ini nangen tикин ulo
ngus re fam profet tarawen kia.
- 71 Kaltu una faliunge kiar kosing re tongge na
matamfais kiar
ma kosing re tongge ri is kiar,
- 72 una fanangsi e fatengis kia tifre tumtumlarer,
ma una sangfi e war a-uu tarawen kia.
- 73 I e limlim ulo poktow e an tumlarer Abra-am
ini:
- 74 i eu faliunge kiar kosing re tongge na matam-
fais kiar
ma ku ules kiar una musngeni e faim kia ma
kiar ku tibi soke.
- 75 Kiar u musngeni e faim kia tura sinang e
kalkaliis ma e riis, i famu ini,
lo bala fam biing kiar melmel iwa.
- 76 Ma o, sikuang, riu foteng o ini profet ke Deo
Iyat Sekit;
le ou la famu ine Taufi una fariisu e sal kia,
- 77 ma una pete parfat ire tongge kia ini Deo eu
faliungeri,
biing i e sam sangintafngi e fan tubiil keri,
- 78 anwarow Deo kiar e mel e singmat na fatengis
ma fabur kia,

ma ilo bala fabur kia anten ting aiyat eu pu
usi kiar,

⁷⁹ una sosok talo seri a, ri ka ta ilo bala anor
ma ilo bala an maluuf lo minet,
una famu ine kekekrer wilo bala sinang na bala-
maris."

⁸⁰ Ma bo-i a ka faf bakir ma tangow ka puek
rawas ma i ka melmel ulo bala male e tek ti kaltu
kala muut lo biing i e puek malal na matre fan
Israel.

2

Fuut lo Yesus

¹ Ulo bala fam biing a, Sisa Augustus e tafu e
neng e fafanau, ini ri samusu siitufu e asas re
tongge nano ilo bala fam pakpakanmale gii ka ta
ilo pikliu e efefe kere fan Rom.

² (Gii, e ta senses baba tikii e puek, lo biing
Kwairinius e ta gawana tingna Siria.)

³ Ma tikii neng, tikii neng lo re tongge e la mil
wilo anwaran male kia una la tafu e asow.

⁴ Iya Josef ming ka kanek mil tinglo taon
Nasaret ina Galili wina Judia. I ka la ulo taon ina
Betle-em, e ta taon ke Dewit, anwarow i e ta tinglo
matambia ke Dewit.

⁵ I e la uwa una la tafu e asow tiim tura Maria,
seri sam siikii una tili. Lo sumbiing a, Maria e
tian.

⁶ Biing ru sam la ta uwa, biing ke bo-i una fuut
e puek,

⁷ ma Maria ka fasus ine sikow baba tikii, e ta
boron tamat. I e loku ine fang kolos ma ka tafu
ulo bala bokiis na enen singre fan buuluumakau,
anwarow e tek ti salu ri ulo bala felum pasindia.

Fan Efefe lo re fan sipsip ma fan Anggelo

⁸ Ma wa, e mel e fan efefe lo re fan sipsip ri melmel fatat ulo galu lo taon, ri ka parpar use re fan sipsip keri lo panambiing.

⁹ Ma anggelo ke Taufi ka puek talo ri, ma finaswen ke Taufi ka sosok liflifit ri, ri ka la soke sak.

¹⁰ Safle anggelo e war singri, “Mele soke. Ya tow e konona sunwar tif gam usi eu pete gasgas ire tongge nano.

¹¹ Geinggii ilo taon ke Dewit e mel e anwaram-faliunge e sau fuut usi gam; i e ta Mesaiya*, se e ta Taufi.

¹² Ma tintof tif gam e ngo aregii: Gam u pari e bo-i, ri loku ine fang kolos ma ka ngongo ilo bala bokiis na enen singre fan buulumakau.”

¹³ Saupe sak singmat na galung anggelo tinglo balambat ka puek tura anggelo a, ri ka katfarsi e Deo aregii,

¹⁴ “Finaswen tife Deo aiyat

ma balamaris ke Deo eu ta ilo seri a Deo ka fefeal lo ri ilo nal.”

¹⁵ Biing fan anggelo ri sam la mil kosing ri wilo balambat, fan efefe lo re fan sipsip ri fagon falifu lo iri tibom aregii, “Kerek la wina Betle-em, kiar ku la par lo mok e fuut, Taufi e peteng tif kiar ini.”

¹⁶ Iya ri ka saupe ri ka la ma pari e Maria ma Josef ma bo-i, se e ngongo ilo bala bokiis na enen singre fan sipsip.

* **2:11 2:11** Mesaiya: pimpiku gii: “kaltu ri tipeni e wel talo paklu.” E ta ninis ri fanangsi lo biing ri wele kaltu. Mesaiya e ta kinen Ibru, Kristus e ta kinen Grik, un sunwar gii e ta tikii pimpik lo ru. Yesus e ta Kristus, Deo e wele una kepamil re tongge.

17 Biing ri sam la pari, ri rerkeni e sunwar a anggelo e sau peteng tifri ini lo bo-i a,

18 ma ri nano se e ongni, ka kuufsak ma sangfuunfuun lo sa fan efefe lo re fan sipsip ri peteng ini tifri.

19 Safle Maria e kep famti e fan warwar nano gii ulo bala ma ka sangsang ususi.

20 Fan efefe lo re fan sipsip ri la mil, ma ri ka akteni ma katfarsi e Deo lo fan mara mok ri ongni ma pari. Fan mara mok e sau fuut aregii anggelo kabuk peteng tifri ini.

Ri fotngi e asow ini Yesus

21 Lo biing baba e wal, e ta biing una keti e pinumfow e bo-i a, ma ri ku fotngi ini Yesus, as anggelo e sau fotngi famu ma tinow ka tifik tian ini.

Ri fafen ine Yesus ulo bala felun nining bakir

22 Lo biing biing una famapeknge ru aregii fafanau ke Moses ka peteng e puek, Josef ma Maria ru onu e Yesus wina Jerusalem una la fafen ini tife Taufi,

23 (are ri sam seti ilo fafanau ke Taufi, “Fan mara bo-i tamat baba tikii ri fuut, riu fafen iri tife Taufi”),

24 ma ru ku fafen ine wamborom bal, tam neng e wan man fuu e ngo ming are ambal, aregii fafanau ke Taufi ka peteng.

25 Lo sumbiing a e mel e kaltu ri fotngi ini Simion. I e melmel una Jerusalem. I e riis fasef ma e sagisu nining lo Deo. I e nene-i e kaltu Deo eu tuleni una pete balamas ire fan Israel. Ma i e fuunuf ine Tangwa Riis,

²⁶ iya, Tangwa Riis ka peteng tifi ini famu ma kamu met, i eu bi pari e Mesaiya, se Taufi eu tuleni.

²⁷ Lo rawas ke Tangwa Riis, i e la kau ulo bala balo lo Felun Nining Bakir. Biing tamow ma tinow e boroner Yesus ru kep kaulek ini una gow e sa lo aregiifafanau ka peteng,

²⁸ Simion e kepe ine un limow ma ka katfarsi e Deo aregii:

²⁹ "Taufi, aregii o kabuk bom limlim,
 gii e fasi ini ou tule yau, kaltu na mus kiam,
 ya ku la tura balamaris.

³⁰ Anwarow wan matang e sau pari e sa o sam
 gow una faliunge kemem,

³¹ lewa o kabuk fagatiifu na matre tongge
 nano tinglo mara male,

³² i e ta anten una pete malal ine Deo tifre fan
 Jentael

 ma una tow e finasuen tifre tongge kiam,
 Israel."

³³ Tamow ma tinow e bo-i, ru la kuufsak tibom
lo sa Simion e war ini usi.

³⁴ Wimi Simion ka warfakausi ri ma ka war
singe tinow, Maria, "Bo-i gii Deo e sam wele
una bero ma una faliungere fa fuunfuun lo re
fan Israel. I eu ta tintof singe Deo, safle tongge
fuunfuun riu fasange singi,

³⁵ usi ini sinsinangure fa fuunfuun eu puek
malal. Ma o, o ku ongni ini ri taba e anmatkom
ine ringgot faen."

³⁶ Uwa, e mel e neng e wok ming e ta profet,
asow gii Ana. I e ta sikow fefin e Fenuel, tinglo
matambia a Eisa. I e sam ta wok matuk. I e

melmel tura ke matuk lo baba fis na matamfaim, wimi ine antinaule ke ru.

³⁷ Ka la ke matuk ka met ma i ka makos ka muut e la ta e wal e sangfuul ma e fet na matamfaim kia. Wok gii Ana e tibi lala kosnge Felun Nining Bakir. I e su melmel ilo ka felfel ma ka nining lo fan mara panambiing ma fan mara siat.

³⁸ Lo pansumbiing sekit a i ka fespuek talo ri, i e tow e katfariis tife Deo ma ka warwar lo bo-i a tifre tongge nano a ri ka nene ini Deo eu kepfamil re tongge tingna Jerusalem.

³⁹ Biing Josef ma Maria ru sau faropo e mara mok aregiifafanau ke Taufi ka peteng, ri la mil ulo taon riis keri Nasaret, ilo prowins ina Galili.

⁴⁰ Ma bo-i a kafaf ma ka puek rawas, i ka fuunuf ine atausimale ma warfakausi ke Deo ka ta ulo.

Boroner Yesus ulo bala felun nining bakir

⁴¹ Tikii neng, tikii neng e matamfaim, tamow ma tinow e Yesus ru lala wina Jerusalem lo fan En na Kepsiliwi.

⁴² Biing e sam tikii sangful ma e u na matamfaim kia, ri tuul la wilo En, aregii ri ka gowgow.

⁴³ Biing En e sam rop, tamow ma tinow ru tofnge fes una la mil wilo male ma boroner Yesus ka mel sok una Jerusalem, safle ru tibi parfat ini i e mel sok uwa.

⁴⁴ Ri su fes lala ka muut lo biing kiruur, anwarow ru sangfi ini i e sam ta una balri. Kala ru kam tofnge una sik lala ini, falifu ire fan taltaluri ma fan fenfenngori.

⁴⁵ Biing ru tibi la pari, ru la mil sekit wina Jerusalem una la sik ini.

46 Wimi ine e tuul e biing, ru la sikseni ulo bala balo lo Felun Nining Bakir. I e kiiskiis u falifu ire fan titsa, ka ongongne singri ma ka gatgatom ri ine fang gatgatom.

47 Tongge nano a ri ka ongni e fang kokos kia, ri la kuufsak lo parfat kia.

48 Biing tamow ma tinow ru pari, ru la kuufsak tикин. Tinow ka war singi, “Sikuang, e tamu o ka gau kama aiya? Kama tamam, kama sangkuuluung tикин usi o, anwarow kama sam la met na siksik iyo.”

49 Yesus ka koso, “E tamu kamu ka siksik i yau? Kamu tibi parfat ini eu ta yau ilo bala fel ke Tabuung?”

50 Safle ru tibi pauti e bala e sunwar kia.

51 Kala Yesus ka mi nami ru, ri tuul ka la ding mil una Nasaret ma bingne i e ongong sing ru. Safle tinow e sagifamteni e fan mara mok a.

52 Ma Yesus kafaf bakir tura atausimale, ma Deo tiim tura re tongge ri fefeal lo.

3

Jon kaltu na gugu tarawen e fagati e sal ke Taufi

1 Lo matamfaim baba tikii sangful ma e lim ke Sisa Taiberius e ta king kere fan Rom, lo fam biing Ponsus Pailat e ta gawana ke prowins Judia, Erot ka ta gawana ke prowins Galili, ma tualik singe Filip ka ta gawana ke e u e prowins, Ituria ma Trakonitis, ma Laisanias ka ta gawana ke prowins Abilien,

² lo bala fam biing a Anas ma Kaiyafas ru ta um paklure fam pris, sunwar ke Deo e fespuek talo Jon sikow e Jekaraiya ulo male e tek ti kaltu.

³ I e fes fawet ulo mara male liflifi e dan Jodan ka sesngeni lala e sunwar tifre tongge ini riu sangikis ma ri ku kepe e amfagu tarawen una fanangsi ini ri sam iksi e balbalri, usi Deo eu sangintafngi e fan tubiil keri.

⁴ Profet Aisaiya e sam seti e sunwar Deo e peteng ini tifi aregii:

“Ulo male e tek ti kaltu,
angkiimkiim a neng e tautau aregii,

‘Fagati e sal ke Taufi,
Fariisu e fan sal kia.

⁵ Ofo e mara pimpa-i,
ilufufu e pakpaklunmale lamlam ma pakpak-lunmale balik, ku riis.

Fan sal e guut e samusu riis,
fan sal e soksok e samusu bilimlim.

⁶ Ma tongge nano ri ku pari e faliunge Deo eu gow lo ri.’ ”

⁷ Tongge fuunfuun ri puek use Jon una sa kepe e amfagu tarawen ma i ka war singri aregii, “Gam na fan siksikwan sii! Se e sau fate gam una finngeni e singmat na balasak ke Deo a ka bala puek? ⁸ Gam samusu gow e konona fan sinang una fanangsi ini gam sam sangikis. Ma gam ku mele tofnge una war sing gam tibom ini ‘Abra-am e ta tamrer.’ Ya peteng tикиn tif gam aregii, anwarow tinglo fatfat gii, Deo e fasi una famtet re berberat ke Abra-am.

9 Palnget e sam ta ilo warow e fang kalut ma mara kalut a ri ka tibi firfira kausi, riu pokufuf ri una bas ilo bala iif."

10 Tongge a ri ka gatmo, "Ma le ku ta aiya, sa sekit kemem samusu gow?"

11 I ka koso, "Se gii ka mel e e u e kolos kia, i e samusu tow e neng tife se gii ka tek ti kolos kia ma se a ka mel e fan tuan aiya, i e samusu gorot aiya ming."

12 Fa a ri ka ta tongge na kepkep mani, ri sa la ming una sa kepe e amfagu tarawen, ri ka gatmo, "Titsa, kemem samusu gow e sa?"

13 I ka peteng tifri, "Gam u tibi awit wiyat ine e fis e mani gapman e a-uu lo gam una faran ini."

14 Kala galun soldia ri ka gatmo, "Ma kemem samusu gow e sa?"

I ka koso, "Mele tungni e tikas una fen fofoes i gam ine ti mani ma mele oteng gurgurum ini una tatfeni e mani kia. Gam samusu balamas use sese fiimfil ri fil gam ini."

15 Tongge ri nene-i e Mesaiya, iya ri ka sangfu-unfun ulo balbalri ini Jon e ta i, tam e tam.

16 Jon ka peteng tifri nano aregii, "Ya gu tarawen i gam ine dan. Safle e mu mel e ti kaltu e mu puek, rawas kia e kulfi e rawas kiang. Ya tibi ta konona kaltu e fasi ini yau pikii e amfinau lo su kia. I eu gu tarawen i gam ine Tangwa Riis ma iif.

17 I eu puek are kaltu e puse lo saol una tii ine fam piinpiin tinglo fan wit, ma i ku sartiim ine fan wit ku touftiim iri ilo felun wit kia, safle fam piin eu bas ini lo iif e tibi metmet." **18** Ma Jon ka

farawasnge ri ine mara warwar ma fabenge, ma ka sesngeni e konona sunwar tifri.

19 Safle biing Jon e war na mata e gawana Erot, le i e sam tili e Erodias wok ke tualik, tura fan mok saksak ming i e sam gow lo,

20 Erot e gow e neng e mok saksak ming ulo poktow e fan sinang saksak kia; i e towfu e Jon ulo felun rerek.

Yesus e kepe amfagu tarawen

21 Biing tongge ri kepkepe e amfagu tarawen, Yesus ming e kepe e amfagu tarawen. Ma pansiungiing i e ning, balambat e ipiik

22 ma Tangwa Riis ka pu talo are anman e par are ambal. Ma neng e angkiimkiim ka tau tinglo balambat aregii, “O na Sikuang ya bur o tикин. Balang e gasgas lo o.”

Tet lo Yesus

23 Gii Yesus e sam ngo are e tuul e sangful na matamfaim kia ma ka tofngeni e fam faim kia. I e ta tamat gii ri ka peteng ini i e ta sikow e Josef. Josef e ta sikow tamat e Eli,

24 Eli sikow e Metat,
Metat sikow e Liwai,
Liwai sikow e Melki,
Melki sikow e Janai,
Janai sikow e Josef,

25 Josef sikow e Matatias,
Matatias sikow e Amos,
Amos sikow e Naum,
Naum sikow e Esli,
Esli sikow e Nagai,
26 Nagai sikow e Ma-at,

Ma-at sikow e Matatias,
Matatias sikow e Semein,
Semein sikow e Josek,
Josek sikow e Joda,
²⁷ Joda sikow e Joanan,
Joanan sikow e Resa,
Resa sikow e Serubabel,
Serubabel sikow e Sialtiel,
Sialtiel sikow e Neri,
²⁸ Neri sikow e Melki,
Melki sikow e Adi,
Adi sikow e Kosam,
Kosam sikow e Elmadam,
Elmadam sikow e Er,
²⁹ Er sikow e Josua,
Josua sikow e Elieisa,
Elieisa sikow e Jorim,
Jorim sikow e Matat,
Matat sikow e Liwai,
³⁰ Liwai sikow e Simion,
Simion sikow e Juda,
Juda sikow e Josef,
Josef sikow e Jonam,
Jonam sikow e Eliakim,
³¹ Eliakim sikow e Melia
Melia sikow e Mena,
Mena sikow e Matata,
Matata sikow e Neiten,
Neiten sikow e Dewit,
³² Dewit sikow e Jesi,
Jesi sikow e Obet,
Obet sikow e Boas,
Boas sikow e Salmon,
Salmon sikow e Nason,

33 Nason sikow e Aminadap,
 Aminadap sikow e Ram,
 Ram sikow e Esron,
 Esron sikow e Peres,
 Peres sikow e Juda,
 34 Juda sikow e Jekop,
 Jekop sikow e Aisak,
 Aisak sikow e Abra-am,
 Abra-am sikow e Tera,
 Tera sikow e Naor,
 35 Naor sikow e Seruk,
 Seruk sikow e Re-u,
 Re-u sikow e Pelek,
 Pelek sikow e Eber,
 Eber sikow e Sela,
 36 Sela sikow e Kainen,
 Kainen sikow e Arfakat,
 Arfakat sikow e Sem,
 Sem sikow e Noa,
 Noa sikow e Lamek,
 37 Lamek sikow e Metusela,
 Metusela sikow e Enok,
 Enok sikow e Jaret,
 Jaret sikow e Ma-alalel,
 Ma-alalel sikow e Kenen,
 38 Kenen sikow e Enos,
 Enos sikow e Set,
 Set sikow e Adam,
 ma Adam e ta sikow tamat e Deo.

4

Satan e lamu e Yesus

¹ Yesus e fuunuf ine Tangwa Riis, ma i ka la mil tinglo dan Jodan ma Tangwa Riis ka onu ka la ulo male e tek ti kaltu.

² Uwa, Satan ka lamu lo e fet e sangful na biing. I e tibi en ti tuan ulo bala fam biing a ma wimi ini, i ka biis.

³ Satan ka war singi, “Le ku ta o na Sikow e Deo, war singe fumfat gii ku ikis ku ta beret.”

⁴ Yesus ka koso, “Sunwar ke Deo e peteng aregii: ‘Kaltu e tibi liu lo safle tuan tibom.’ ”

⁵ Kala Satan ka onu e Yesus ka la kanek ulo neng e paklunmale ma ka fanangsi sauplesak ine fan mara kepmale tingga lo nal,

⁶ ma ka war singi, “Yau tow e fam finaswen kere mara kepmale gii tifo ma rawas una efe lo ri, anwarow ri sam tow kiang ma ya fasi una tow tife se ya bura ini yau tow tifi.

⁷ Iya, le o ku pukungkek ma ning lo yau, fan mok gii eu ta kiam.”

⁸ Ma Yesus ka war singi aregii, “Sunwar ke Deo e peteng aregii: ‘Nining lo Taufi, Deo kiam, ma faim singi tibom.’ ”

⁹ Satan ka onu ka la fetiufu ulo su e ngo uiyat sekit lo Felun Nining Bakir ma ka war singi, “Le ku ta ini o na Sikow e Deo, ofpu ting wagii.

¹⁰ Anwarow Sunwar ke Deo e peteng aregii:
‘Deo eu tulere fan anggelo kia
una fakale lo o,

¹¹ ri ku sange o ine limlim ri
usi ini eu tek ti fat eu ti lo kekem.’ ”

¹² Yesus ka koso, “Sunwar ke Deo e peteng aregii, ‘Ou tibi tofo e Taufi Deo kiam.’ ”

13 Biing Satan e sam la rorop una lamu lala e Yesus, i ka la kosnge Yesus ka la nene i e tikas ti biing ming aiwa.

Tongge tingna Nasaret ri balasak ine Yesus

14 Yesus e fuunuf ine rawas ke Tangwa Riis ma ka la mil una Galili. Ma sauplesak sinseng lo ka omseni kiruur e male a.

15 Bingne, i e fafabenge singre tongge ilo bala fam felun ning keri ma tongge nano ri ka katkatfarsi.

16 I ka la una Nasaret, lo male e bakir ulo, ma lo Biing Sabat i e la kaulek ulo bala felun ning le e ta ninis kia ma i ka ti una wese e Sunwar ke Deo.

17 Ri ka tow e buk lo warwar ke Deo gii profet Aisaiya ka seti tifi, i ka ipki ma ka sik ine galu ri seti e sunwar gii ulo:

18 “Tangow e Taufi gii lo yau,
anwarow i e sam wel yau
una sesngeni e konona sunwar tifre fan
sasngal.

I e tule yau una sesuupuek ine sunwar ini tongge
ilo rerek riu suu,
ma fa matmatri e baf, riu par,
se ri a ri ka liil ilo bala fan mafet, riu suu kosnge
fan mafet a,

19 ma ini biing ke Taufi una bilseni e fabur
kia e sau puek.”

20 Wimi Yesus ka batu mil e buk ma ka tow
tife kaltu una efefe lo fam buk ma ka kiisuf.
Matmatre tongge nano ulo bala felun ning e
ngosok ulo,

21 ma i ka tofnge una war singri aregii, “Geinggii sunwar gii e fawet sekit ilo ongong kemi.”

22 Ri resngeni ma ri ka sangfuunfuun singe konona fan warwar e sam suu tinglo ngusu e Jesus ma ri ka war, “Ka bi su ta ini sikow e Josef le gii.”

23 Ma Jesus ka war singri aregii, “Ya parfat tикин ini gam u war mil ine sunwar na atausimale gii tif yau: ‘Dokta, bow faliunge o!’ Pimpiku e sunwar toftof a igii, ‘Gow e fan mok na tibou fuut wagii lo male kiam tibom, are fan sa kemem sam ong lo ini o gow una Kapernaum.’

24 “Safle ya peteng tикин tif gam, e tek tikas ek ongong singe ti profet ilo anwaran male kia riis.

25 Ya peteng tикин tif gam, e mel e fan makos fuunfuun una Israel lo biing ke Elaija, lo biing e pisii faen lo e tuul e matamfaim ma e on e funiil ma biis bakir ka puek ulo male kiruur.

26 Safle Deo e tibi tuleni e Elaija use tikas lo ri. I e tuleni subung use neng e wok makos tinglo taon Serafat ilo bala rijen Saidon ma i e ta Jentael.

27 Ma e mel e fa fuunfuun lo re fan Israel ri kepe e anminse lepra lo biing ke profet Elisa, safle Deo e tibi fakalkaliisngeni sekit e tikas lo ri - sakle Naman kaltu tingna Siria ma i e ta nenge Jentael.”

28 Biing tongge nano ulo bala felun ningri ongnyi e war aiya, ri la balasak tикин.

29 Ri matet ri ka fesel suu ini tinglo bala taon ma ri ka suleni ka la wilo anisow e antinwen gii ri ka gow e taon Nasaret ulo, usi ini riu la suleufu ulo fam,

30 safle i e su sol falifu iri nano ka la fes lala.

Yesus e feselufu e tangwaner saksak

31 Wimi i ka la ding una Kapernaum, neng e taon una Galili ma lo Biing Sabat, i e tofnge una fabenge singre tongge.

32 Uwa ming, tongge ri sangfuunfuun lo fam fabenge kia, anwarow sunwar kia e mel e rawas lo ma e mel e antuntunow.

33 Ulo bala felun ning, e mel e neng e kaltu tangwaner saksak e sispi. I e kaung bakir tикин aregii,

34 “Uui! Yesus tingna Nasaret! O bala sa tamu i kemem? Kele ma o fespuek una sa bero i kemem? Ya parfat lo o. O na Kaltu Pepe ke Deo!”

35 Safle Yesus e porow e tangwaner saksak a aregii, “Fakuta e ngusum ma o ku suu tinglo kaltu a!” Wimi tangwaner saksak a ka baspu ine kaltu a na matri nano ma ka suu tinglo, safle e tibi bero ini.

36 Tongge nano ri la kuufsak tикин gii ri ka fawar iri tibom aregii, “Sese matang gongon le gii? I e tungen re fan tangwaner saksak ine rawas ma mia ma ri ka suu!”

37 Ma sinseng lo Yesus ka omseni kiruur e male a.

Yesus e faliungere fan minse fuunfuun

38 Yesus e la kosngi e felun ning ma ka la ulo fel ke Saimon. Yanow fefin e Saimon e bokor tuntun sak, iya ri ka gatmo e Yesus una ulsi.

39 I ka la, ka la por unaisa ma ka porawufu e anminse a tinglo ma anminse a ka la kosngi e fefin a. Saupe sak i ka matet ma ka tofnge una fagati e fan tuan ari.

40 Biing pisii e sau bala sif, tongge ri ka uunpuek ire tongge gii ri ka mel lo fan matmatan minse use Yesus, ma i ka towfu e un limow uiyat ulo tikii neng tikii neng lo ri, ma ka faliungeri.

41 Fan tara saksak fuunfuun ming ri suu tinglo re tongge fuunfuun, ri ka tautau lala aregii, “O na Sikow e Deo!” Safle Yesus e porau ri ma ka fakuta e ngusngusri usi ini riu tibi gon, anwarow ri parfat ini i e ta Mesaiya.

42 Lo bau uwa e male lo biing usi, Yesus e la ulo neng e sum biilkap. Tongge ri siksik lala ini ma biing ri sa puek ulo male i ulo, ri tofo una kaleufu ini i eu tibi la kosing ri.

43 Safle i e peteng tifri aregii, “Anwarow gii Deo ka tule yau ya ka sa la igii: Ya samusu sesngeni e Konona Sunwar lo kepmale ke Deo tifre fanenger fan taon ming.”

44 Ma i ka posmi e fam kia una sesngeni lala e Konona Sunwar ilo bala fam felun ning kere fan Judia.

5

Fan disaipel baba tikii ke Yesus

1 Nenge biing Yesus e titi ulo anisow e salat Genasaret, tura tongge ri fuun liflifti ri ka on-gongne lo sunwar ke Deo,

2 i e pari e um buut ulo anisow e salat, tongge na tuntunii ri tafu ma ri ka la gugua e fan ubiin keri.

3 I ka kau ulo bala neng lo re um buut a, neng gii ka ta ke Saimon ma i ka onu una soro balik waleii

kosnge angkiin. Kala i ka kiisuf ma ka tofnge una fabenge singre tongge a, tinglo bala buut.

⁴ Biing i e gongon tikii, i e war singe Saimon, “Auseni e buut ku la wilo mok e maut ma gam ku baspu ine fan ubiin una kepe ti tom fis.”

⁵ Saimon ka war singi, “Kaltu bakir, kemem sau fam tuntun tикин tinglo panambiing ma kemem ka tibi kepe ti mok, sakle anwarow o sau fauun, yau baspu mil ine fan ubiin.”

⁶ Biing ri sam gow aregii i ka peteng, ri awit fam fis fuunfuun tикин ma fan ubiin keri ka usef una fusfafalek.

⁷ Iya ri ka kalif ine fan taltalu ri tura neng e buut una sa ules ri. Ri ka puek ma ri ka sengi e um buut nano ka la fuunuf, gii ri ka rong una maut.

⁸ Biing Saimon Pita e pari e mok gii, i e luut pukungkek ulo fow e ungkekow e Yesus ma ka war, “La kosing yau Taufi, ya na kaltu na tumtubiil!”

⁹ Anwarow i tura fan taltalu ri la sangfuunfuun singe fam fis ri awit.

¹⁰ Nenge un taltalu e Saimon, ru ming ru la sangfuunfuun. Asasru gii Jeims ma Jon, ma ru ta un sikow e Sebedi.

Kala Yesus ka war singe Saimon, “O mana soke; ting geenggii ma ku la, ou kep re tongge.”

¹¹ Iya ri ka fufte masa ine fam buut keri, ri ka toufsok lo mara mok ma ri ka mi nami.

Kaltu ine anminse lepra ulo

¹² Biing Yesus e ta ulo bala neng lo re fan taon, neng e kaltu tura anminse lepra e sa la. Biing i e pari e Yesus, i e luut pu ulo nal tura mata wifaf

ma ka war fangfangteni, “Taufi le o ku fabur, o fasi una fakalkaliisnge yau.”

¹³ Yesus e sangau ine limow ka pot lo ma ka war, “Ya fabur. Ong kalkaliis!” Ma sauplesak anminse lepra ka la kosngi.

¹⁴ Kala Yesus ka fanow aregii, “Ou tibi peteng tife tikas ine mok e sau fuut lo o, safle ou la, o ku la fanangsi o tibom tife pris ma o ku gow e finafen aregii Moses kabuk peteng, una fanangsi re tongge ini o sam kalkaliis.”

¹⁵ Sakle sunwar lo Yesus e omseni kiruur e male, iya tongge fuunfuun ri ka ong lo, ri ka puek usi ini ku faliungeri kosnge fan minse ari.

¹⁶ Safle fam biing fuunfuun Yesus e lala kosing ri wilo fan sum biilkap una la nining.

Yesus e faliungeni e kaltu dol

¹⁷ Nenge biing Yesus efafabenge, fam Farasi ma fan titsa lo fafanau gii ri ka sa la tinglo fan male ina Galili ma tingna Judia ma Jerusalem, ri kiiskiis uwaa ming. Rawas ke Deo e ta ulo Yesus ma i ka falfaliungere tongge ri mase.

¹⁸ Galun tamat ri ka kep puek ine neng e kaltu dol e ngongo lala ulo ngiin, ri bala kep kau ini ulo bala fel use Yesus.

¹⁹ Safle biing ri tibi par ti sal una kep kaulek ini, anwarow lo e tek ti sol singre tongge, ri fen tura ulo poktow e fel ri ka la akteufu e galu lo ma ri ka fauli ka pu u famu sekit ine Yesus.

²⁰ Biing Yesus e pari ini titinge keri e rau tikan, i ka war singe kaltu a aregii, “Fenngong, ya sam kepufu e fan tubiil kiam.”

21 Fam Farasi ma fan titsa lofafanau ri ka tofnge una sangfuunfuun using ri tibom, "Se tикин leleii ka fotpursi e Deo? E tek tikas e fasi una sangintafngi e fan tubiil, safle Deo tibom!"

22 Yesus e sau parfat ini sa e ta ulo sinsinangu ri ma ka gatom, "Usi e tamu ka mel e matan sungsang aiya ailo balbalmi?

23 Sese sunwar e paumiil una war ini? 'Ya sam kepufu e fan tubiil kiam,' tam 'Matet o ku fes'?

24 Sakle yau fanangsi gam ini Sikow e Kaltu e mel e mia gii lo nal una kepufu e fan tubiil." Ma i ka war singe kaltu a aregii, "Ya peteng tifo, matet, kepe kem ngiin ma o ku la mil ilo keu fel."

25 Saupesak kaltu a e matet na matri, ka kepe ke ngiin ma ka katfarsi lala e Deo ka la mil wil fel kia.

26 Ri nano ri kuufsak ma ri ka katfarsi e Deo. Ri kuufsak tura soke ma ri ka war, "Kiar sau pari e mok fuu ma e piik geinggii."

Yesus e tau ine Liwai

27 Wimi ine mok gii, Yesus e la tingwa, ka la pari e neng e kaltu na kepkep mani, ri fotngi ini Liwai. I e kiiskiis ulo bala felun mani ma Yesus ka war singi, "Mi nami Yau."

28 Ma Liwai ka matet ka tauf sok lo mara mok ma ka mi nami e Yesus.

29 Wimi, Liwai ka gow e en bakir ulo ke fel tura Yesus ma singmat na galung kaltu na kepkep mani ma fanenger fan tongge ming ri tau iri una sa la lo en, ri en tiim tura ri.

30 Safle fa lo re fam Farasi tura fan titsa keri lofafanau, ri war fuunfuun singre fan disaipel ke Yesus aregii, "Usi e tamu gam ka en ma gam ka in

tiim tura re tongge na kepkep mani, ma tongge na tumtubiil?”

³¹ Yesus ka war singri, “Tongge a ri ka tibi mase, ri tibi fasi una la use dokta, safle tongge ri mase ri fasi una la use dokta.

³² Ya tibi sa la una sa tau ire tongge riis, e tam. Ya sa la una sa tau ire tongge na tumtubiil una sangikiis.”

Gatgatom use sinang na fel ine tuan

³³ Ri ka war singe Yesus, “Fan disaipel ke Jon ri ngos lo fel ma ning lo an mara biing ma fanenger kere fam Farasi ming, safle fan disaipel kiam, ri su ngos lo en ma in.”

³⁴ Yesus ka war singri, “Gau fasi ming una gau re tanga fenfenngow e kaltu a ka bala tinaule ri ku feleni e en, ma i ka melmel iwa tura ri? E tam,

³⁵ sakle e mu mel e biing eu puek una onu e kaltu a ka bala tinaule ku la kosing ri; lo bala fam biing a, ri kamu fel a.”

³⁶ Yesus ka peteng.tifri ine sunwar toftof gii, “E tek tikas ek sisi e tian sin laplap tinglo neng fuu ma ku soko talo neng ting nangen. Le ku gow aiya, i eu rangsi e su fuu, ma sun laplap fuu a, eu tibi fasi use su ting nangen.

³⁷ Ma e tek tikas ek ututfi e ti waen fuu talo bala ti ampinun meme ting nangen. Le ku gow aiya, waen fuu a, eu ese paki e ampinun meme a, ku lingi tikii ma iru nano ru ku tiin la sak. ³⁸ Waen fuu, ri samusu tipeni talo bala ampinun me fuu.

³⁹ Ma e tek tikas ek bura una inmi e ti waen fuu wimi ini e sam inmi e neng ting nangen, i eu su war aregii, ‘Neng ting nangen e kausi tikin.’ ”

6

Yesus e ta Taufi lo Biing Sabat

¹ Nenge Biing Sabat, Yesus e fes lala ulo bala fam palang na wit ma fan disaipel kia ri ka kutuul pakti lala e fanenger lo ri, ri ka goso ulo bala limlim ri ma ri ka eni e firfirow.

² Fa lo re fam Farasi ri ka gatom, “Usi e tamu gam ka gow e fam e pepe una gow lo Biing Sabat?”

³ Yesus ka koso singri, “Gam tifik su wese sekit e sinseng lo mok Dewit e sam gow nangen lo biing i tiim tura re tongge kia, ri fitol?

⁴ I e kau ulo bala fel ke Deo ka la kepe beret e pepe. I e eni e sa e pepe. E su ta ini are fam pris tibom una enen. Ma ming, i e fenre tongge kia ine fanenger lo ri.”

⁵ Kala Yesus ka posmi e sunwar kia.tifri aregii, “Sikow e Kaltu e ta Taufi lo Biing Sabat.”

⁶ Lo neng e Biing Sabat ming, i e kau ulo bala felun nining, ka la fabenge singre tongge. Ma e mel e neng e kaltu uwa galun limow miil e met.

⁷ Fam Farasi ma fan titsa lofafanau ri siksik ine ti sangsang una anganggon singe Yesus tura. Iya ri ka efe kausi tikin lo Yesus, anwarow ri bur parfat ini i eu faliungere tongge ri mase lo Biing Sabat, tam e tam.

⁸ Sakle Yesus e parfat lo ini are ri sangsang ma ka war singe kaltu a galun limow miil ka met aregii, “Matet, o ku ti na matre tongge nano gi.” Iya i ka matet ka ti na matri.

⁹ Kala Yesus ka gatom ri, “Sese sinang e riis ususi e fafanau ini kiar u usi lo Biing Sabat? Una gow e konona sinang, tam una gow e sinang e

sak? Una faliungeni e ninliu ke kaltu, tam una bero ini?"

¹⁰ Yesus e alal lo ri nano ma kam war singe kaltu a aregii, "Fariisu e limam." I e usi aregii Yesus ka peteng ma limow ka kausi mil.

¹¹ Safle balbalri e la tuntun tikin ma ri ka tofnge una fawar falifu iri tibom ini sa riu gow lo Yesus.

Tikii sangful ma e u na apostel

¹² Ulo bala tikii neng lo re fam biing a, Yesus e la ulo paklunmale una la ningning ma lo pam panambiing kiruur a i e ningning singe Deo.

¹³ Lo biingbiing e mok, i e tau ire fan disaipel kia ma ka wele tikii sangful ma e u lo ri, ma ka foteng ri ini fan apostel*.

¹⁴ Asasri gii: Saimon (se e fotngi ini Pita), tualik e Pita asow gii Enru, Jeims, Jon, ma Filip, Batolomius,

¹⁵ Metiu, Tomas, Jeims sikow e Alfius ma Saimon (tinglo galung kaltu ri foteng ri ini fan Jilot,)

¹⁶ Judas sikow e Jeims, ma Judas kaltu una mu solamufu e Yesus.

Fan warfakausi ma fang kiskam

¹⁷ I e ding tura ri, ri ka la ti ulo lubun. Galu bakir lo re fan disaipel kia tura singmat na galung kaltu tinglo male kiruur ina Judia, tingna Jerusalem ma tinglo angkiin ina Tair ma Saidon, ri ta uwa.

¹⁸ Ri sau puek usi una sa ongne singi, ma ini i ku faliungeri kosnge fan mara minse ari. Fa fan tara saksak ri sispi ri, Yesus e faliungeri.

* **6:13 6:13** Pimpiku e sunwar gii, "foteng ri ini fan apostel" e ngo aregii: Yesus e uun ri una gow e faim apostel.

19 Tongge, ri tiin tofo una pot lo, anwarow rawas e la tinglo ma ka falfaliunge ri nano.

20 Kala Yesus ka giliim use re fan disaipel kia ma ka war,

“Warfakausi eu ta ilo gam na seri a gam ka sasngal,

le kepmale ke Deo e ta kemi.

21 Warfakausi eu ta ilo gam na seri a gam ka biis geinggii,

le gam amu sut.

Warfakausi eu ta ilo gam na seri a gam ka sangkuuluung geinggii,

le gam amu gasgas.

22 Warfakausi eu ta ilo gam, lo biing tongge riu is gam,

riu wesuf gam kosing ri, riu porau saksak i gam,

ma ri ku pari e asasmi are mok saksak, nafow e Sikow e Kaltu.

23 “Fefeal lo biing a. Of ma o ku guui tura gasgas, le fimfil kiam ilo balambat e bakir tikin. Anwarow lo tikii sal mung gii, tumtumlari, ri gow aiya e fam profet.

24 Safle kiskam sing gam na seri a gam ka mel e tubami,

le gam sam kepe e sa una pete balamas i gam.

25 Kiskam sing gam na seri a gam ka sut geinggii, le gam amu biis.

Kiskam sing gam na seri a gam ka ruuruur feal geinggii,

le gam amu sang kuuluung ma gam ku teng.

26 Kiskam sing gam na seri a, tongge ri ka resnge gam,

anwarow lo tikii sal mung a, tumtumlari, ri gow aiya e fam profet gurgurum.

Bure tongge na matamfais

27 “Safle ya peteng tif gam na seri gii gam ka bura una ongne sunwar kiang. Gam samusu bura e tongge na matamfais kemi. Gow e konona sinang lo re fa a ri ka is gam.

28 Nining singe Deo ini eu warfakausi e se a ka gatmo e Deo una fakutun aiyam. Nining usi re fa gii ri ka gow e fan sinang e sak lo gam.

29 Le tikas ku pose o ilo ambanguam, ikis ine neng e galu ming tifi. Ma le tikas ku kepe e kolos tapak kiam ku la, tafu ku kepe e neng pospos ming.

30 Fenre tongge nano a ri ka faran sing o. Ma le tikas ku kepe e sa e ta kiam, mele faran mil ini.

31 Sese mok a gam ka bura ini fa riu gow lo gam, gam samusu gow ming lo ri.

32 “Le gam ku bur re tongge a ri ka bur gam, se gii ku peteng ini gam na tongge kausi? Tongge na tumtubiil ming, ri sagisu burbur re tongge gii ri ka bur ri.

33 Ma le gam ku gow e konona sinang lo re fa a ri ka kausi lo gam, se gii ku peteng ini gam na tongge kausi? Tongge na tumtubiil ming, ri sagisu gowgow e tikii sinang gii.

34 Ma le gam ka tow e fan mok tifre tongge gau parfat ini riu koso, se gii ku peteng ini gam na tongge kausi? Tongge na tumtubiil ming, ri sagisu tata fan mok tifre tongge na tumtubiil, ma ri ka sangsang ini riu fiil familri.

³⁵ Safle gam samusu bure tongge na matamfais kemi, gow e konona fan sinang lo ri. Ma gam u fen ri ine fan mok ma mele sangfi ini riu koso mil. Ilea, gam samusu gorot aiya usi fimfiil kemi eu bakir, ma sinang kemi ku ngo are sinang ke Deo se e ta iyat sekit, anwarow i e kausi lo re tongge a ri ka tibi araro singi ma tongge saksak.

³⁶ Gam samusu tengis re fa, aregii Taumi ming ka fafatengis.

Gam u tibi ikseni e sinangu re fa

³⁷ “Gau mele ikseni e sinangu e neng e kaltu are Deo kam ikse gau ming. Ma mele bero ine neng e kaltu are Deo kau bero i gam. Gam samusu sangintafngi e fan tubiil, fa ri gow lo gam, usi Deo eu sangintafngi ming e fan tubiil kemi.

³⁸ Fenre fa ma Deo e amu fen gam. I eu fen fakausi gam, ku tukeni wifaf, ku sagetiim ini ma ku fafonsi ku la ibeluf. Lo sese fan sinang a gam ka gowgow lo re fa, Deo eu gow aiya ming lo gam.”

³⁹ Yesus e war singri lo warwar toftof aregii, “E fasi ini ti kaltu e baf eu famu ine neng e baf? Ma ru nano ruw tibi suu ilo ti ampolo, be?

⁴⁰ Boroner na fabenge e tibi kulfi e titsa kia, safle seri a ri kabuk faropo e fabenge keri, ri su ngo are fan titsa keri.

⁴¹ “E tamu guu o ka pari e amboron mukmuk ilo anmata e tuamlik ma o ka tibi sangfi e sung kalut e ngongo ailo anmatam tibom?

⁴² Le o ku peteng tife tuamlik, ‘Tuaklik, tagii ya ku kepufu e anmukmuk ailo anmatam’ ma o ka tibi pari e singmat na sum palang ailo anmatam tibom. O na kaltu na matam pangkii, ou kepufu

famu e sung kalut ailo anmatam tibom usi ou par ten ma o kamu kepufu e anmukmuk ailo anmata e tuamlik.

Kalut tura firfirow

43 “Konona ton au e tibi fasi una fira ine fingfingwan au saksak, ma ming, ton au saksak e tibi fasi una fira ine fingfingwan au kausi.

44 Tikii neng, tikii neng e kalut ri parfailmi ilo fingfingow tibom. Tongge ri tibi luslus firfiram fik tinglo fam finau soksok, tam fingfingwan waen tinglo fam balan temmok soksok.

45 Konona kaltu eu fanangsi e konona fan sinang e la tinglo konona fan mok a ka fuunuf ilo bala, ma se a ka fuunuf e bala ine fan mok saksak, i eu fanangsi e fan sinang e sak. Anwarow, le sese mok a ka fuunuf ilo balang kaltu, eu la suupuek ilo ngusu.

Ung kaltu na bilbilse fam fel

46 “Usi e tamu gii gam ka foteng yau ini ‘Taufi, Taufi,’ ma gam ka tibi gowgow e fan sa ya peteng ini?

47 Yau fanangsi gam ine parpar lo kaltu e sa la usi yau, sinangu are eu ngo, lo biing i e sam ongni e sunwar kiang ma ka usi ilo ninliu kia.

48 I e ngo are kaltu e bala gow e fel. Kaltu a e kekef ka pu sekit ma ka tofngeni e warow e fel kia ine fam fatfat lamlam ma kam gow e fel ulo poktow. Biing male e fuun ma dan ka suu, anring lo e sa tuktuke ulo fel a, safle fel a e tibi luut, anwarow i e bilse fakausi.

49 Safle se a ka ongni e sunwar kiang ma ka tibi usi, i e su ngo are kaltu e gow e fel kia ilo nal

fofoes, ma ka tek ti warow. Biing male e fuun ma dan ka suu, anring lo e sa tukeni e fel a ma fel a ka luut ka la sak sekit.”

7

Titinge ke ofisa

¹ Biing Yesus e sam sesngeni tikii e fan mok gii tifre tongge, i e la mil una Kapenaum.

² Wa kaltu na mus ke kaltu bakir kere fan soldia tingna Rom, e mase ma ka bala met. Ma kaltu bakir kia e natkeni tикин.

³ Biing kaltu bakir kere fan soldia e ong lo Yesus, i e tule re ge lamlam kere fan Juda usi, una la gatmo ini eu sa la ku sa faliungeni e kaltu na mus kia.

⁴ Biing ri sa puek talo Yesus, ri war rawas tикин singi, “Kaltu gii e riis ini ou ulsi,

⁵ anwarow i e bur kerer tикин na fan Juda. Ma ming i e sam gow e felun ning kerer.”

⁶ Iya Yesus ka la tura ri.

Safle biing ri sam sa puek fatatu e fel, kaltu bakir lo re fan soldia e tule re fam fenfenngow una la peteng tifi aregii, “Taufi, mele sangfuun-fuun tibom una sa la ilo kek fel, anwarow e tibi ta ini ya na kaltu riis ku fasi ini ou sa kaulek ilo kek fel.

⁷ Ilea ya ka par yau tibom ini ya tibi ta kaltu riis una bom sa la usi o. Safle on su war ma kaltu na mus kiang ku liu.

⁸ Anwarow, yau ming ya ta neng e kaltu ilo e pikliu e neng e rawas, ma e mel e fan soldia ilo pikliu e efefe kiang. Le ya ku war singe tikas lo ri, ‘On la,’ i eu la! Ma ya ku war singe neng, ‘Kasa,’ i

eu sala! Tam ya ku war singe kaltu na mus kiang, 'Gow e mok gii,' i eu gow."

⁹ Biing Yesus e ongni e kaltu a e war aiya, i e la kuufsak lo fan warwar kia. I e giliim use re tongge a ri ka ususi lala ma ka war, "Ya peteng tикин tif gam, ya tifk tongeni e tikas gii na Israel e mel lo matan titinge aregii."

¹⁰ Ma biing tongge gii kaltu bakir lo re fan soldia ka tuleri ka la, ri sa mil ulo fel, ri sa pari ini kaltu na mus a e sam liu mil.

Yesus e faliungeni e sikow tamat e neng e wok makos

¹¹ E tibi su bafu ini ma Yesus ka la ulo neng e taon ri fotngi ini Nain, ma fan disaipel kia tura singmat na galung kaltu ri ka mi nami.

¹² Biing i e fespuek fatatu e sal una kau ilo taon, i ka pari e galung kaltu ri kepkepe lala e neng e kaltu e sau met. Kaltu a e su tikiin i e ta sikow tamat e neng e wok, ma wok a e sau makos. Ma singmat na galung kaltu tinglo taon ri ta tura wok a.

¹³ Biing Taufi e pari e wok a, i e tengsi tикин ma ka war singi, "O mele teng."

¹⁴ I e la fatatu e ngiin gii ri ka towfu e kaltu a ulo ma ka la pot lo, iya tongge a ri ka kepkepe lala e kaltu a ri ka la ti sok. I ka war singi, "Guam, ya peteng tifo, on matet!"

¹⁵ Kaltu a ka met a, i e matet ka kiis ma ka tofnge una war, wimi Yesus ka tow mil tife tinow.

¹⁶ Tongge nano ri la kuufsak ma ri ka tofnge una katfarsi e Deo. Ri war aregii, "Nenge profet bakir e sau puek falifu i kiar! Ma Deo e sam sa la una sa ules re tongge kia!"

17 Sinseng lo mok Yesus e bilseni e omseni kiruur e male Judia ma fan mara male liflifi.

Yesus ma Jon kaltu na gugu tarawen

18 Fan disaipel ke Jon ri peteng tifi ine mara mok Yesus e bilseni. I kam tau ine un neng lo ri

19 ma ka tule ru use Taufi una la gatmo, “E sam ta o na kaltu gii Deo ka peteng ini i eu tule o, tam kemem u nene-i e tikas kuriik?”

20 Biing ung kaltu gii ru sa puek talo Yesus, ru sa war singi, “Jon kaltu na gugu tarawen e uun kama usi o, una sa gatom o, ‘E sam ta ini o na kaltu lewa Deo ka limlim ini i eu tule o legii, tam kemem u parpar ine tikas kuriik?’ ”

21 Lo biing a sekit, Yesus e faliungere tongge fuunfuun e mel e fan matmatan minse ulo ri ma ka tii ine fan tara saksak ulo fofori, ma ka faliungere fam baf ri ka par mil.

22 I e peteng tifre ung kaltu a aregii, “Kamuw la peteng tife Jon ine fan mara mok kamu sam ongi ma kamu sau pari, fam baf ri par mil, tongge kekek ri e sak ri fes mil, tongge fofori e mel e anminse lepra ri puek kausi mil, tongge balbaluri e kut, ri ong. Tongge ri sau met ri matet mil, ma konona sunwar ri ka sesngeni tifre fan sasngal.

23 Warfakausi e ta ilo se a titinge kia lo yau ka tibi luut.”

24 Wimi ine wan unune ke Jon ru sam la mil, Yesus e tofnge una seseng tifre tongge ine Jon aregii, “Biing gam u la ilo male e tek ti kaltu, gam la una la pari e sa? Ya sang ini gam la una la pari e kaltu warwar kia e ngo are fum fift kif e kifikifeni?

25 Ma le ku tam, gam la una la pari e sa? Ti kaltu e los lo konona fang kolos? E tam, tongge ri los lo fang kolos mata e kanek tibom, ma ri mel lo konona mara mok, ri melmel ilo fam fel kere fang king.

26 Sakle sa gam la usi una la pari? Gam la una la pari e ti profet, be? Yow. Yau peteng tif gam, i e kulfi e fan mara profet nano.

27 Jon e ta kaltu lewa ri kabuk siisiit nafow aregii,

'Yau tuleni e ti anunune kiang famu iyo.

I eu la fagati e sal kiam.'

28 Yau peteng tif gam, falifu ire berberat gii gelefin ri ka fasus iri, e tek tikas ek bakir iyat ine Jon. Sakle se a ka ta imi sekit ire tongge nano ilo bala kepmale ke Deo, i e bakir iyat ine Jon."

29 (Tongge nano, tiim tura re tongge una kepkep mani, ri ongni e fan warwar ke Yesus, ri parfailmi ini ninis ke Deo e riis, anwarow ri sam kepe e amfagu tarawen singe Jon.

30 Sakle fam Farasi ma tongge parfat lo fafanau, ri guuluung ine konona sal Deo e sau fanangsi ri ini, anwarow ri guuluung ini Jon eu gu tarawen iri.)

31 Yesus ka war ming aregii, "Yau fatofe e kulu tinglo biing gii lo sa? Are ri ngo?

32 Ri ngo are berberat ri kiiskiis ilo male na tiim ma ri ka tautau faliu singri tibom:

'Kemem kifii e antulal tif gam
ma gam tibi guui.

Kemem seke e seksek na fatengis
ma gam tibi teng.'

33 Anwarow biing Jon kaltu na gugu tarawen e puek, i e tibi enen beret ma e tibi inin waen, ma gam ka peteng ini, 'I e mel e tangwaner saksak ilo.'

34 Sikow e Kaltu e puek ka ininin ma ka enenen, ma gam ka peteng ini, 'Gau par, kaltu gii e en karef ma e biit waen tикин, ma i e ta fenngore tongge una kepkep mani ma tongge na tumtubiil.'

35 Sakle se a ka mel lo atausimale ke Deo, i eu fanangsi ini atausimale ke Deo e tикин."

Fefin na tumtubiil e wel lo kekow e Yesus

36 Neng lo re fam Farasi e tau ine Yesus una sa en faiya tura. Iya Yesus ka la ulo fel kia ka la kiis una en tura.

37 Ma biing neng e fefin na tumtubiil ulo taon a e ong ini Yesus e ta ulo fel ke Farasi a, i e kep puek ine neng e botol ri gow lo alabasta* ine sanda e nul kausi tикин ulo bala.

38 Ma i ka sa ti una mi e Yesus, fatatu e ung kekow ma ka teng. Ma biing i e teng i e tofnge una gua e ung kekow e Yesus ine darun mata. Wimi i kam si ka mas e ung kekow ine ololow, ma ka osngi e ung kekow ma kam tipeni e sanda e nul kausi ulo.

39 Biing Farasi a e pari e sa e fuut, ulo sinangu e war singi tibom aregii, "Le kaltu gii enggi ta profet tiktikin, i enggi parfat lo ini se gii ka pot lo, ma i e ta sese matam fefin, i e ta fefin na tumtubiil!"

40 Ma Yesus ka war singi aregii, "Saimon, ya bala peteng tifo ine neng e mok."

Ma Saimon ka war singi, "Peteng tif yau, titsa."

* **7:37** **7:37** Alabasta e ta fat e par kausi tикин.

41 “E mel e ung kaltu ru dinau mani singe neng e kaltu. Neng e kepe e lim e atis na mani ma neng ka kepe e lim e sangful na mani.

42 E tek tikas lo ru ek mel e ti mani kia una kos familia e dinau kia. Iya i ka sumiufu e fan dinau ke ru nano. O sang ini se lo ru eu bura tикин e kaltu a?”

43 Saimon ka koso, “Ya sang ini neng gii dinau kia ka bakir ma kaltu a ka sumiufu.”

Ma Yesus ka war, “Faikse kiam e riis.”

44 Ma kam didiu use fefin a ma ka war singe Saimon, “O sau pari e fefin gii? Biing ya kaulek ulo bala keu fel, o tibi tow e ti dan una gua e ung kekeng. Sakle fefin gii, i e gua e ung kekeng ine darun mata ma kam si ine ololow.

45 O tibi oseng yau, biing ya kaulek ulo keu fel, safle fefin gii, e tibi manau una osngi e ung kekeng tofnge tinglo pansumbiing ya kaulek.

46 O tibi tipeni e ti wel ulo paklung, safle fefin gii e tipeni e sanda e nul kausi ulo ung kekeng.

47 Ya peteng tикин tifo, singmat na fabur kia lo yau e fanangsi ini Deo e sam sangintafngi e fan mara tubiil kia. Safle se gii fan tubiil kia ka tibi fuun ma Deo ka sangintafngi, fabur kia e su balik.”

48 Ma Yesus ka peteng tife fefin a, “Fan tubiil kiam ya sam sangintafngi.”

49 Fanenger fan tongge ri sa la lo tautau wilo en faiya lo biing a, ri tofnge una fawar falifu iri tibom aregii, “Sese kaltu legii, gii ka fasi una sangintafngi e fan tubiil kere tongge?”

50 Yesus ka peteng tife fefin a aregii, “Titinge kiam e sau faliunge o. La tura balamaris.”

8

Sunwar toftof lo firfirian au

¹ Wimi ini e fan mok gii, Yesus tura tikii sangful ma e u na disaipel kia ri fes lala ulo fan taon ma fan male, ri ka sesngeni lala e konona sunwar lo kepmale ke Deo.

² Ma fa lo re gelefin ming gii i kabuk feselufu e fan tara saksak tinglo ri ma kabuk faliungeri kosnge fan minse, ri la ming nami. Maria, (ri fotngi ming ini Makdalen, se baba fis na tara saksak ri of suu tinglo),

³ Joana (wok ke Kusa, kaltu bakir kere tongge na mus ke Erot), Susana ma fanenger fang gelefin ming. Gelefin gii ri sagisu ululsi e Yesus tura fan disaipel kia ine fan mok tinglo songsongomfori tibom.

⁴ Lo sumbiing tongge fuunfuun ri pupuek tinglo fan taon ri ka sa tiim ka ta singmat na galung kaltu unaisa e Yesus, i ka peteng tifri ine sunwar toftof gii,

⁵ “Nenge kaltu unafafaim palang e la sabel ine firfirian au kia. Lo sumbiing e samsabel lala ine firfirian au a, fanenger ri rurung ulo sal, tongge ri ka pii lo ri, ma fan man ting uiyat ri ka sa en tike ri.

⁶ Fanenger ri rurung ulo poktow e fatfat, ma lo biing rifaf kanek ri main ma ri ka met, anwarow ri tibi kepe e ti dan.

⁷ Fanenger ri rurung ulo bala finfinau soksok. Ri kafaf kanek tura finfinau soksok a ma finfinau soksok a ka pismet iri.

8 Safle fanenger ri rurung ulo konona nal. Ri faf kanek ma ri ka fira. Tikii amfiran au e fira ine tiki atis na amfiran au."

Biing i e sam ropo e sunwar toftof gii, i ka tau aregii, "Se a ka mel e ambalbalu una ongong, tafu ku ong."

9 Fan disaipel kia ri ka gatmo use pimpiku e sunwar toftof gii.

10 I ka koso aregii, "Deo e sam a-uu lo gam una ten use kepmale kia ini are e ngo, safle tifre fa, yau war singri lo warwar toftof usi ini,
'tikin riu pari, safle riu tibi parfailmi,
riu ongni, safle riu tibi ten usi.'

11 "Pimpiku e sunwar toftof a e ngo aregii, firfirau e ta sunwar ke Deo.

12 Fanenger a ri ka luut ulo sal, ri ta tongge a ri ka ongni e sunwar, ma wimi ini satan ka puek ka kepufu e sunwar a tinglo balbalri usi ini riu tibi titinge ma ri ku tibi ta ilo ninliu.

13 Fanenger a ri ka luut ulo poktow e fatfat, ri ta tongge a ri ka kepe e sunwar tura fefeal biing ri ongni, safle e tek ti awawi ri. Ri su titinge lo boron pansumbiing, safle biing falam e puek, tongge a ri luut singi.

14 Fanenger a ri ka luut ulo falifu lo finfinau soksok, ri ta tongge a ri ka ongni e sunwar, safle biing ri la fes lala, sinang una fabur lo fan mok fuunfuun, una melmel kausi ma sinang una fefeal lo fan mok tinglo nal gii, e pismet ine sunwar a, ma ri ka tibifaf bakir.

15 Safle fanenger a ri ka luut ulo konona nal, ri ta tongge a ri ka ongni e sunwar ma ri ka kepfamti ilo balbalri tura konona sinang ma

sinang tикин. Ma ri ti rawas lo sunwar a ka muut ri la fira.

Sunwar toftof lo lam

¹⁶ “E tek tikas biing i e sau fakrefu tikii e lam, eu finufu ilo pikliu e ti dis tam ku toufu ilo pikliu e ti ngiin. E tam. I eu fakulikngeufu iyat ilo tafu usi ini seri a ri ka kaulek, riu fasi una pari e anten.

¹⁷ Anwarow e tek ti mok gii ka fifinuf ini eu tibi suupuek, tam ti pindik ini riu tibi parfat lo ma riu tibi sesuupuek malal ini wilo anten.

¹⁸ Iya, gam u ate kausi tикин use sunwar a gam ka ongni. Se a ka mel, Deo eu fen fuunfuun ini. Ma se a ka tibi mel, sese boron mok a i ka sangfi ini i e mel lo, Deo eu kepufu singi.”

Tinow ma tanga tualik e Yesus

¹⁹ Kala tinow e Yesus tura tanga tualik ri ka fespuek una sa pari, safle ri tibi fasi una la puek sekit una isa, anwarow lo re tongge fuunfuun.

²⁰ Neng lo re tongge a ka peteng tifi, “Tinam tura tanga tuamlik gii ri kafafatie gii na male, ri bura ini riu par o.”

²¹ Yesus ka koso aregii, “Tiduung ma tanga tuaklik e ta seri gii, ri ka ongni e sunwar ke Deo ma ri ka usi.”

Yesus e pete malmal ine balan salat

²² Nenge biing Yesus ka war singre fan disaipel kia, “Kerek la waleii lo galu lo salat gii.” Iya ri ka la kau ulo bala neng e buut ma ri ka la.

²³ Biing ri awes lala ka la, Yesus e luut uf ka masun. Saupe sak morailu ka pu talo ri ulo balan

salat a, iya buut ka fuun ine dan, gii ri ka rong una maut.

²⁴ Fan disaipel ri ka la usi ri ka la fongni ma ri ka war, “Kaltu bakir, kaltu bakir, kerer sau bala maut!”

I ka matet ka porow e kif ma balan salat uf a ma morailu ka la filau balik ma ka la malmal.

²⁵ Ma i ka gatom re fan disaipel kia, “Iya e fan titinge kemi?”

Ri ka la kuuf tura soksoke ma ri ka fagatomnge falek iri tibom aregii, “Se le gii, gii ka porow e kif ma balan salat ma ru ka ong singi?”

Yesus e feselufu e fan tara saksak tinglo nenge kaltu

²⁶ Ri ka la ulo nal kere fang Gerasa, e ta ulo galu lo salat Galili.

²⁷ Biing Yesus e fes masa una kiin, i e tongeni e neng e kaltu tinglo taon a tara saksak e sispi. Lo sumbiing e tapak tикин, kaltu a e tibi loslos lo ti kolos ma e tibi melmel ulo ti fel. I e su melmel ulo safle fam balbalang kenit.

²⁸ Biing i e pari e Yesus, i e kaung bakir tикин ma ka luut unaisa e ungkekow e Yesus ma ka tau bakbakir, “Yesus, Sikow e Deo Iyat Sekit, o bala tamu i yau? Ya gatom fangfangte o ini ou tibi bero i yau!”

²⁹ I e tau aregii, anwarow Yesus e sam tungenufu e tara saksak a tinglo kaltu a. Fam biing fuunfuun tикин tara saksak a, e berbero ini. E tикин riu rekfamti e un limow ma ung kekow ine fan sen ma ri ku efefe rawas lo, safle i eu fuspakti e fan sen ma tara saksak a ku famu ini ku la ilo fan sumbiilkap.

³⁰ Yesus ka gatmo, “Sese asam?”

I ka koso, "Asang gii, Mar ma mar." Anwarow fan tara saksak fuunfuun ri sam kaulek ilo bala.

³¹ Ma ri ka gatom fangfangteni e Jesus ini eu tibi tule ri, ri ku la wilo bala ampolo e tek ti muut lo.

³² Singmat na amfor na bo ri enen uwa ulo mimbet lo paklunmale, ma fan tangwaner saksak a ri ka gatom fangfangteni e Jesus una a-uu lo ri, ri ku la ilo fam bo a. Ma Jesus ka a-uu lo ri.

³³ Biing fan tara saksak a ri suu tinglo kaltu a, ri la sispi re fam bo a ma ri ka fafes pu ulo pimpa-i a ri ka la ulo bala dan ri ka la maut.

³⁴ Biing fan efefe kere fam bo ri pari e mok a, ri filau ri ka la seseng tifre tongge ulo taon ma ulo fang galgalu una male ine taon.

³⁵ Ma tongge ri ka sa la una sa par lo sa e sau fuut. Biing ri sa fespuek talo Jesus, ri pari e kaltu lewa fan tara saksak ri kabuk suu tinglo, i e kiiskiis ulo fow e ungkekow e Jesus. I e sau pilpiliis ma kabuk la sinangu mel mil, ri sokeni tikin.

³⁶ Fa ri sau pari sekit e sa e fuut, ri seseng tifre tongge a ini are kaltu lewa tara saksak ka sispi e liu.

³⁷ Ma tongge nano tinglo rijen Gerasa ri ka gatmo e Jesus ini i eu la kosing ri, anwarow ansoke e sam wile ri. Iya Jesus ka kau ulo buut ma ka la kosing ri.

³⁸ Ma kaltu lewa fan tara saksak ri ka suu tinglo e guna e Jesus ini i eu la tura, safle Jesus e onu ka la ma ka war singi aregii,

³⁹ "La mil ilo keu male ma o ku la seseng ine mara mok Deo e sam gow lo o." Iya kaltu a ka la

kosing ri ka la seseng ulo taon kiruur ine mara mok Yesus e sam gow lo.

Yesus e faliungere um fefin

40 Biing Yesus e kaupaket mil, singmat na galung kaltu ri areni, le ri nano ri nene-i.

41 Kala neng e kaltu bakir tinglo felun ning, asow gii Jairus, ka sa la ka sa luut ulo fow e ungkekow e Yesus ma ka sa gatom fangfangteni ini eu la ilo ke fel,

42 anwarow e buk su tikii e boron sikow fefin, e ta tikii sangful ma e u na matamfaim kia, e rong una met.

Biing Yesus e fes lala ka la, singmat na galung kaltu ri sita lala.

43 Ma e mel e neng e fefin uwa, ambuunbuunsuu e fuut lo, lo tikii sangful ma e u na matamfaim, safle e tek tikas ek fasi una faliungeni.

44 I e fes ting nami e Yesus ka sa pot lo anisow e kolos tapak kia, ma sauplesak ambuunbuunsuu ulo ka rop.

45 Yesus ka gatom aregii, “Se e sa pot lo yau?”

Biing tongge nano ri tiin peteng ini “E tibi ta yau,” Pita ka war, “Kaltu bakir, tongge gii ri ka fa sit ina is o, ri fuun tikin.”

46 Safle Yesus e war, “Ya parfat ini neng e kaltu e sa pot lo yau^{*}, anwarow ya ongen failmi ini galu lo fan rawas, e sam la kosing yau.”

47 Biing fefin a e pari ini mok i e gow e tibi fifinuf, i e banban lala ka sala, ka sa luut ulo fow e ungkekow e Yesus. Na matre tongge nano, i e

* **8:46 8:46** Yesus e tibi war lo ini ri fasit ri ka pot lo. I e war lo ini neng e pot lo ine matam pot aregii ini i e bura ini eu liu.

peteng suupuek ini sese anwarow gii i ka sa pot lo
Yesus ma are i e gorot ka liu sekit lo pansumbiing
a.

⁴⁸ Kala Yesus ka war singe fefin a, “Kek fefin,
tinge kiam e sau faliunge o, la tura balamaris.”

⁴⁹ Biing Yesus e gongon uwa, neng e kaltu ka sa
la tinglo fel ke Jairus, kaltu bakir lo felun nining,
ka sa war aregii, “Keu fefin e sau met, mele au
finiilu e titsa.”

⁵⁰ Biing Yesus e ongni e war aiya, i ka war singe
Jairus, “Ou tibi soke, ou su titinge ma keu fefin ku
liu mil.”

⁵¹ Biing Yesus e la fespuek ulo fel ke Jairus, i e
tibi a-uu lo tikas ming una la kaulek tura. I e su
a-uu lo safle Pita, Jon ma Jeims tiim tura tamow
ma tinow e fefin a.

⁵² Lo sumbiing a, tongge nano rifafatengse
bakir ma ri ka sangkuuluung tикин usi. Safle
Yesus e war singri, “Manau una teng, fefin gii e
tibi met. I e su masun.”

⁵³ Ma tongge a ri ka su ruur lo, anwarow ri
parfat ini fefin a e sau met.

⁵⁴ Safle Yesus e puse ulo limow e borom fefin a
ma ka war, “Sikuang, matet!”

⁵⁵ Tangow e kaulek mil ulo ma saupe sak ka
matet ka ti. Wimi Yesus ka uun ri ini riu tow e
ti tuan tifi ku en.

⁵⁶ Tamow ma tinow ru la kuufsak tикин, safle
Yesus e fanau ru ini ruw tibi la seseng tife tikas
ine sa e sau fuut.

¹ Biing Yesus e sam tau tiim ine tikii sangful ma e u na Disaipel kia, i e tow e rawas ma mia ri una feselufu e fan mara matmatan tangwaner saksak ma una faliungere tongge kosnge fan minse,

² ma ka tule ri ka la una la sesngeni e sunwar lo kepmale ke Deo ma una la faliungere tongge ri mase,

³ i ka peteng tifri, “Biing gam u la, gam u tibi kepe e tikas ti mok ming tura gam lo fines kemi. Eu tek ti tungkan, eu tek ti tang, eu tek ti tuan, eu tek ti tubam, tam ti kolos tapak ming.

⁴ Sese fel gam u kaulek ilo, gam u su melmel wa ku muut gam u la kosnge taon a.

⁵ Ma le tongge ri ku tibi are gam, paketufu e ambalbal tinglo kekekmi biing gam u la kosngi e taon a are peteng fate tifri ini ri guuluung ine sunwar ke Deo.”

⁶ Iya ri ka la ri ka la fes lala tinglo neng e male wilo neng e male, ri ka la sesngeni lala e konona sunwar ma ri ka la faliungeri lala e tongge ulo mara male.

⁷ Biing Erot kaltu bakir lo Gapman e ong lo fan mok e fuut, i e kuufsak tикин, anwarow, fa ri peteng ini Jon kaltu na gugu tarawen e sau matet mil kosnge minet.

⁸ Fa ri ka peteng ini Elaija e sau mil ma safle fa ri peteng ini neng lo re fam profet ting nangen e sam liu mil.

⁹ Safle Erot e war, “Ya sam tese pakti e angki-imkiim a Jon. Ma se sekit legii ya ka su ong lo fan warwar lo ming gii?” Ma i ka tofo una sik ine ti sal una tongeni.

Yesus e fenre e lim e mar na tamat

10 Biing fan Apostel ri mil, ri sa peteng tife Yesus ine fan sa ri sam la gow. I ka uun ri, ri ka mi nami una tibom la ulo taon ri fotngi ini Betsaida.

11 Safle biing tongge fuunfun ri ong lo ri, ri ka mi nami. I e su are ri ma ka sesngeni e sunwar lo kepmale ke Deo tifri, ma ka faliungere fa gii ri ka mase.

12 Lo efef sekit, tikii sangful ma e u na disaipel ri ka sa la use Yesus, ri ka sa war singi, “Tule re tongge gii ri ku la, usi ini riu la ilo ton taon fatat ri ku la sik ine ton tuan ari una en ma tom fel una ngo singri, anwarow kiar ta ilo biilkap.”

13 Yesus ka war singri aregii, “Gam tibom gam u tow e ton tuan una en singri.”

Ri ka koso, “Sakle kemem su mel e lim e sum beret ma e su u e fis, le ku ta aiya, kemem u la fil ti ton tuan are tongge nano gii?”

14 Lo biing a e ngo are e lim e mar na tamat ri ta wa.

Safle Yesus e peteng tifre fan disaipel kia aregii, “Un ri, ri ku fakiisnge tiim lala, ma eu lim e sangful na kaltu riu keptiim iri.”

15 Fan disaipel ri ka gow aregii i ka peteng iya tongge nano ri ka fakiisnge lala ufaf.

16 I ka kepe e lim e beret a ma um fis a, ka par wiyat wilo balambat, ka katfarsi e Deo lo ma kam kere e lim e beret ma um fis a ma ka tow tifre fan disaipel kia una fasa ini lo re tongge.

17 Tongge nano ri tiin en ri ka la sut ma fan disaipel ri ka sele tiim ine fan susun tuan e ngosok ri ka siing tiim ini ka puek ka la ta tikii sangful ma e u na dik.

Pita e sesuupuek ine Yesus ini i e ta Mesaiya

18 Neng e biing Yesus e la ningin borong ma fan disaipel kia ri ta tura. I ka gatom ri aregii, “Tongge ri peteng ini yau gii se?”

19 Ri ka koso, “Fa ri peteng ini o gii Jon kaltu na gugu tarawen, ma fa ri ka peteng ini o Elaija, ma fa ri ka peteng ini o ta neng lo re fam profet ting nangen tikan se e sam liu mil.”

20 Ma Yesus ka gatom ri aregii, “Ma gam tibom, gau peteng ini yau se?”

Pita ka koso, “O na Mesaiya ke Deo.”

21 Yesus ka fanauri ini riu tibi peteng tife tikas.

22 Ma i ka war, “Sikow e Kaltu e samusu kepe e fan ongker. Ge lamlam, fam pris lamlam ma fan titsa lo famfafanau riu gilmeufu ma ri ku pakti ku met. Ma lo biing baba e tuul, Deo eu famtet familia tinglo minet.”

23 Kala Yesus ka war singri nano, “Le tikas ku fabur una mi nami yau, i e samusu fapor e fabur kia tibom ma ku kepe e aupaket kia lo an mara biing ma ku usi yau.

24 Anwarow le sese ti kaltu a ka sangsang una bingfamti e ninliu kia tibom, ninliu kia eu tam ini. Safle se a ku fafen ine ninliu kia usi yau, i eu kep familia e ninliu kia.

25 Le kaltu ku kepe e mara mok nano gii lo nal, safle ninliu kia tibom ku tam ini, sese kausi lo fan mok a?

26 Le tikas ku maiyai lo yau ma kek sunwar, Sikow e Kaltu eu maiyai lo ming, lo biing i eu puek tura finaswen kia ma tura finaswen ke Tamow ma tura finaswen kere fan anggelo riis kia.

27 Ya peteng tикин тif gam, fa lo re tongge гii ri ka titi гii, riu tifik met ku muut riu pari e kepmale ke Deo.”

Fow e Yesus e puek ka ngo kuriik

28 E ngo are e wal e biing wimi ine Yesus e sam sesngeni e fan mok гii, i e onu e Pita, Jon ma Jeims ri ka la kanek tura ulo paklunmale una la nining.

29 Biing i e ninining, mata e puek ka la ngo kuriik ma kolos kia ka la ten tикин are ansinsokow e ampil.

30 E u e kaltu, Moses ma Elaija,

31 ru puek ulo bala konona finaswen ru ka sa warwar singe Yesus. Ri tuul kafafawar ine ninla kia tinglo nal, iya i kabuk fatat una faropo ina Jerusalem.

32 Pita tura un taltalu ri masun taut, safle biing ri kuuf, ri pari e finaswen kia tura e u e kaltu ru titi unaisa.

33 Biing ung kaltu a ru rong una la kosnge Yesus, Pita e war singe Yesus aregii, “Kaltu bakir, e kausi ini kiar u melmel wagii. Kemem tuul u feti e tuul e ti kak, neng kiam, neng ke Moses ma neng ke Elaija.” (Pita e tibi parfat lo sa i e petpeteng ini.)

34 Lo sumbiing i e gongon, neng e pambalbal e puek ka afit ri. Ma biing ri kau ulo bala pambalbal a, tuul disaipel a, ri tuul soke tикин.

35 Ma neng e angkiimkiim e la tinglo bala pambalbal a, e war aregii, “I гii e Sikuang se ya sam wele. Gam u ongong singi.”

36 Biing angkiimkiim a e sam war tикии, ri tuul pari ini Yesus tibom e la ti sok. Fan disaipel ri

bingfamti e sinseng lo sa ri pari, ka ta keri tibom. Ri tibi peteng tife tikas lo fan sumbiing a ini.

Yesus e faliunge e boroner ine tara saksak ulo

³⁷ Tikii biing wimi ini ri sam ding tinglo pak-lunmale, tongge fuunfuun tикин ri sa tupngeni e Yesus.

³⁸ Neng e kaltu una balre tongge a ka tau aregii, "Titsa, ya bura tикин ini ou par lo sikuang, le e su tикин i na sikuang.

³⁹ Neng e tara saksak e sispi ka kuufkuufsak ka kaukaung. I e sagisu basbas ini ka la metmetor ma bus ka la suusuu tinglo ngusu. E tek ti borom biing sekit ek lala kosngi ma e su berbero sekit ini.

⁴⁰ Ya gatom re fan disaipel kiam ini riu fesel suu ini, safle ri tibi fasi."

⁴¹ Ma Yesus ka koso aregii, "Gam na kulu na tibi titinge, sinsinangumi ma ninis kemi e tibi kausi, e sak sekit. E fis e biing yau melmel tura gam? Ma e fis e biing ming yau kepe mafet tura gam? Kepe e sikuam wagii."

⁴² Lo biing boroner a e sa la, tara saksak a e baspu ini talo nal ka la banban. Safle Yesus e porow e tara saksak a, ma ka faliungeni e boroner a ma ka tow mil tife tamow.

⁴³ Ma tongge nano a ri ka la kuufsak lo singmat na rawas ke Deo.

Biing tongge nano rifafamunge faliu use sa Yesus e gow, i e war singe fan disaipel kia,

⁴⁴ "Ong kausi tикин use sa ya rong una peteng tif gam ini. Sikow e Kaltu riu solamufu ku la ilo limre tongge."

45 Safle ri tibi ten use bala e sunwar a. Pimpiku e ffinuf iri, iya, ri ka tibi ten usi ma ri ka soke una gatmo usi.

Se e bakir iyat ire fa

46 Fatinge e tofnge falifu ire fan disaipel ini se lo ri eu bakir iyat iri.

47 Yesus e sau parfat lo sangsang keri, iya ka onu e neng e boroner ka sa fetiufu ulo anggalu lo,

48 ma i ka war singri, “Se a ka areni e boroner gii lo asang, i e are yau. Ma se a ka are yau, i e areni ming e se gii ka tule yau. Anwarow se gii ka tek ti asow i falifu i gam nano, i e bakir iyat ire fa.”

49 Kala Jon ka war, “Kaltu bakir, kemeu pari e neng e kaltu e fesi e tara saksak lo asam, ma kemem ka tofo una war kali, anwarow i e tibi ta lo kiar.”

50 Yesus ka war singri, “Mele war kali, anwarow sese kaltu a ka tibi fasange sing gam, i e ta lo gam.”

Fan Samaria ri tibi areni e Yesus

51 Lo biing e sau fatat ma Deo ku kep kanek ini wilo balambat, Yesus e farawasngeni e sangsang kia una la wina Jerusalem.

52 Ma i ka tuleni famu e fam finauun, ri ka la ulo neng e palkanmale una Samaria una la terngeni e fan mok nene i.

53 Safle tongge ulo male a ri tibi a-uu lo ini eu bi melmel tura ri, anwarow i e lala wina Jerusalem*.

* **9:53** **9:53** Fan Samaria ri tibi areini e Yesus anwarow ri sak lo re fan Juda.

⁵⁴ Biing un disaipel, Jeims ma Jon ru pari e mok e fuut, ru ka gatom, “Taufi, o bura ini kamau tau ding ine iif tinglo balambat ku bero iri?”

⁵⁵ Safle Yesus e didiu mil ka porau ru,

⁵⁶ ma ri ka la wilo neng e palkanmale.

Sinang una mi nami e Yesus

⁵⁷ Ma lo biing ri fesfes lala ulo sal, neng e kaltu ka war singi, “Sese mok ou la ilo, yau mi nami o ming wilo.”

⁵⁸ Ma Yesus ka peteng tifi aregii, “Fam puul rokai e mel e fam polo keri ma fan man ting auiyat e mel e fam polpolo ri. Safle Sikow e Kaltu e tek ti mok una famanaungeni e paklu.”

⁵⁹ Ma i ka war ming singe neng e kaltu aregii, “Mi nami yau.”

Safle kaltu a e koso aregii, “Taufi, ou bi a-uu lo yau, ya ku la ofo e tabung.”

⁶⁰ Ma Yesus ka war singi, “Tauf re fan minet ri ku ofo e minet keri tibom, safle o, ou la o ku la sesngeni e sunwar lo kepmale ke Deo.”

⁶¹ Ming neng e war, “Yau usi o Taufi, safle famu ou bi tauf yau, ya ku la tulere kek fumberat.”

⁶² Yesus ka koso, “Kaltu a kabuk soleni e limow ilo bala ampolo una awe ma kabi par mil wimi, matang kaltu aiya, e tibi fasi una faim ilo bala kepmale ke Deo.”

10

Jesus e tule re e fis e sangful ma e u na kaltu ka la

¹ Wimi Taufi ka sikii e baba fis na sangful ma e u na kaltu ming ma ka tule ri, e u u lala, ri ka

la famu ini ulo mara taon ma mara male gii i ka rong una la wilo.

² I e war singri aregii, "Fan tuan una fitiil e fuun, safle tongge una faim ri tibi fuun. Gam u nining singe Tamow e palang, usi ini i eu tule re tongge na faim wilo bala palang una fitiil.

³ La! Ya tule gam are fan iririn sipsip ku la ina balre fam puul rokai.

⁴ Mele kepe e ti paos, tam ti tang, tam ti sendel; ma mele faiya tanganga tura ti kaltu ilo sal.

⁵ "Biing gam u kau ilo bala tom fel, baba tikii sekit gam u war aregii, 'Siaro sing gam na tongge tinglo bala fel a'.

⁶ Le ku mel e ti kaltu e fuunuf ine balamaris ilo fel a, siaro kemi eu ta ilo. Ma le ku tam, siaro kemi eu mil usi gam.

⁷ Melmel ilo fel a, eni ma inmi e fan sa ri tow tif gam, le kaltu na mus e samusu kepe e fimfil kia. Mele fes faliu tinglo neng e fel ku la ilo neng e fel.

⁸ "Biing gam u kau ilo bala ton taon, ma ri ka are gam, eni e fan sa ri fen gam ini.

⁹ Faliungeni e fan mara minse ilo male a ma peteng tifri aregii, 'Kepmale ke Deo e sau fatat inais gam.'

¹⁰ Safle biing gam kaulek ilo bala ton taon ma ri ka tibi are gam, la ilo fan susun sal ilo taon a ma gam ku war aregii,

¹¹ 'Fam balbal tibom tinglo bala taon kemi gii ka ngosok ilo pikliu e kekekmem, kemeu paketufu are tintof una fanangsi ini gam gow e sinang e sak lo kemem. Safle, gam u sangsangfi ini: Kepmale ke Deo e sau fatat.'

12 Ya peteng tif gam, lo biing a mafet eu kep re tongge tinglo taon a, eu bakir iyat ine mafet lewa ka kep re tongge tinglo taon Sodom.

13 “Kiskam sing gam na fang Korasin. Ma kiskam sing gam na fam Betsaida. Anwarow, le tikas enggi sam la ulo taon Tair ma Saidon ek la gow e fan mok na tibou fuut aregii ya ka gow falifu i gam, fan Tair ma Saidon ring gi sam iksi e balbalri, ma rik sam los lo fang kolos na sangkuuluung ma rik sam wili e fofori ine fam pi-iif una fanangsi ini ri sangkuuluung tикиn nafow e fan tubil ri sam gow.

14 Sakle lo biing na anganggon, mafet eu kep gam eu kulfi tикин e mafet eu kep re fan Tair ma fan Saidon.

15 Ma gam na fang Kapenaum, gam sang ini riu akte gam wiyat sekit ku la ilo batsok? E tam! Gam u pu sekit ku la sekit ilo male kere fan minet.

16 “Se a ka ongne sing gam, i e ongne sing yau. Se a ka guuluung i gam, i e guuluung i yau. Safle se a ka guuluung i yau, i e guuluung ine se gii ka tule yau.”

17 Baba fis na sangful ma e u na kaltu a, ri mil tura fefeal ma ri ka sa war, “Taufi, fan tara saksak ming ri ong sing kemem biing kemem tungen ri lo asam.”

18 Ma Yesus ka koso singri aregii, “Ya pari e Satan e luut tinglo balambat are ampil.

19 Ya sam tow e rawas tif gam una pii lala lo re fan sii ma fam bowangwang ma una kulfi e rawas ke kaltu na matamfais, ma eu tek ti sak eu kep gam.

20 Safle gam u mana fefeal ini fan tara saksak ri ong sing gam, safle gam u fefeal ini asasmi Deo e sam siitufu ilo balambat.”

21 Lo biing a, Jesus e fuunuf ine fefeal singe Tangwa Riis ma ka war aregii, “Tabuung, Taufi lo balambat ma nal. Ya katfariis o, anwarow o sau finufu e fan mok gii ire tongge atausimale ma tongge parfat, ma o ka sesuupuek ini tifre tongge ri melmel are berberat. Yow Tabuung, o gorot aiya, anwarow e ta konona fabur kiam.

22 “Tabuung e sam tow e mara mok nano ilo limang! Ma e tek tikas ek parfat lo Sikow e Kaltu ini i se. Sakle Tamow tibom ma e tek tikas ek parfat lo Tamow ini i se. Sakle Sikow tibom tiim tura re tongge gii Sikow kabuk wel ri ini, i eu fanangsi ri ine Tamow.”

23 Wimi i e didiu use re fan disaipel kia ma ka war borong singri aregii, “Fefeal seri gii ri ka pari e sa gau pari.

24 Le ya peteng tикин tif gam, nangen fam profet ma fang king fuunfun ri bura tикин ini riu pari e fan mok gii gam ka pari gii, sakle ri tibi pari, ma ri bura tикин ini riu ongni e fan mok gii gam kabuk ongni, sakle ri tibi ongni.”

Taltalum e ta se tикин?

25 Lo neng e biing, neng e kaltu parfat lofafanau e matet ka ti una tofo e Jesus, i ka gatmo, “Titsa, sa ya samusu gow, usi ini yau kepe e ninliu bingne?”

26 I ka koso aregii, “Fafanau ke Moses are e peteng? Biing o wese, are o sang?”

27 I ka koso, “‘Bura e Taufi Deo kiam ine ambusbusam kiruur, tura tangwam kiruur, tiim

tura rawas kiam, ma tura sinangum kiruur'; ma 'Bura e fan taltalum aregii o ka burow tibom.' "

28 Yesus ka war, "O sam kos fakausi. Gow e sinang a, aregii o kabuk peteng ini, usi ou liu."

29 Safle i e bala fakale lo i tibom, aregii i ka gatmo e Yesus, "Ma se gii i na taltalung?"

30 Yesus ka koso mil singi aregii, "Nenge kaltu e ding tingna Jerusalem wina Jeriko. Ma tongge na kinkinau ri ka bingfamti, ri ka rangsi e fang kolos kia ma ri ka pakti ka la metor ma ri kam la kosngi.

31 Nenge pris e fes ulo tikii sal ma biing i e pari e kaltu a, i e su sol sekit ulo galu.

32 Nenge Liwai ming e sa puek ulo male a, ma biing i e pari e kaltu a, i e su sol sekit ming ulo neng e galu.

33 Safle neng e kaltu tingna Samaria* e fes ulo tikii sal mung a, i e sa puek ulo mok gii kaltu a ka ta ulo, ma biing i e pari, i e la tengsi tикин.

34 I e la usi ka la toto e wel ma waen ulo fam piuu kia ma kam deti ine banis. Wimi i kam kepe e kaltu a, ka tafu ulo dongki kia ma ka kepe wilo neng e felum pasindia ka bom la efe lo. **35** Biing usi, i e kepufu e u e silwa mani ka tow tife kaltu gii ka efefe lo felum pasindia a, ma ka war singi, 'Efefe lo kaltu gii, ma biing yau mil, yau piliis familia e fis e galun mani kiam o ulsi e kaltu gii ini.'

36 "Se lo re tuul kaltu gii, o sangfi ini i e na taltalu e kaltu lewa tongge na kinkinau ri ka pakti?"

* **10:33** **10:33** Fan Samaria ri sak lo re fan Juda.

³⁷ Kaltu parfat lofafanau e koso aregii, “Kaltu lewa ka tengsi ma ka ulsi.”

Jesus ka war singi, “La, o ku la gow aregii o kabuk peteng.”

Yesus e ta ulo fel ke Marta ma Maria

³⁸ Biing Yesus tura fan disaipel kia ri ta ulo fines keri, i e la fespuek ulo neng e palkanmale. Palkanmale a, e mel e neng e fefin gii asow Marta, i ka onu e Yesus, ka la kau ulo ke fel.

³⁹ Marta e mel e kisilik ming, asow gii Maria. I e kiisuf fatatu e ung kekow e Taufi, ma ka ongongne use fan warwar kia.

⁴⁰ Safle Marta e su sangsang use fan sa i e samusu gow. I ka fespuek use Yesus ka sa war, “Taufi, o tibi pari ini kisiklik e su tafu e mara faim tif yau tibom? Onu ku sa ules yau!”

⁴¹ Taufi ka koso, “Marta, Marta, o su sang kut ma o ka sangfuunfuun use mara mok,

⁴² safle tikii mok gii o pospos lo. Maria e sam sikseni e sa e kausi, ma eu tek tikas eu fasi una kepufu singi.”

11

Sinang una nining

¹ Nenge biing Yesus e nining ulo neng e male. Biing i e rorop, tikii neng lo re fan disaipel kia ka war singi, “Taufi, fabenge sing kemem una nining aregii Jon ka fabenge singre fan disaipel kia.”

² I ka war singri aregii, “Biing gam nining, gam u war aregii,
‘Taumem,
Tafu e asam ku ta tarawen.

Tafu e kepmale kiam ku puek.

³ Fen kemem lo tikii neng tikii neng e biing ine inen amem.

⁴ Sangintafngi e fan tubiil kemem,
are kemeu ming kemem sangintafngi e fan
tubiil, fa ri gow lo kemem.

Mele tule kemem tife falam.' "

⁵ Ma i ka war ming singri, "Le tikii tikas lo gam
ku mel e ti fenngow, ma i ku la usi lo panambiing
bakir ku la war singi, 'Fenngong, ules yau ine e
tuul e ti sum beret,

⁶ anwarow neng e fenngong e fes lala lo an
mara male ma ka sa puek talo yau, ma e tek ti
mok ini yau feni ini.'

⁷ "Kala kaltu ina fel ku koso, 'Mele fiiniil yau.
Matangkon e sam dukel, ma yau tura berberat
kiang, kemem sau masun. Ya tibi fasi una matet
ya ku la tow e ti mok tifo.'

⁸ Ya peteng tifo, kaltu una fel e matet ka la tow e
beret tifi, e tibi ta ini anwarow i e ta fenngow, iya
ini i ku matet ku la tow e beret tifi, safle anwarow
kaltu a ka titi una male e tibi soke, i e su ngos lo
faran.

⁹ "Ilea, ya peteng tif gam, gam u gatom, usi Deo
eu tow e mok gam gatom usi; gam u sik ine mok,
ma gam ku pari; gam u tukeni e matangkon, ma
Deo ku ipki tif gam.

¹⁰ Tongge nano ri gatmo e Deo, riu kepe e mok
ri gatmo usi; kaltu e sik ine mok, i eu pari; ma
kaltu e tukeni e matangkon, Deo eu ipki tifi.

¹¹ "Se lo gam na fan tamtamaboi-i, le sikuam ku
gatom use ti fis, ma o ku su tow e ti sii tifi?

12 Tam le i ku gatom use ti angkatuul ma o ku su tow e ti bowangwang tifi?

13 Gam na tongge saksak, sakle gau parfat tикин una tow e konona fan mok tifre siksikwami. Safle konona sinangu e Deo e kulef gam tикин. Iya, Taumi ilo balambat eu fefeal tикин una tow e Tangwa Riis tifre seri a ri ka gatom usi singi!"

Ri peteng ini Yesus e faim tura Belsebul

14 Yesus e feselufu e tara saksak tinglo neng e kaltu gii ka gow e ngusu ka kut. Biing tara saksak a e la, kaltu a e gon, ma tongge fuunfuun ri ka la kuufsak.

15 Sakle fa lo ri, ri war, "I e fesfeseluf re fan tara saksak lo rawas ke Belsebul, paklure fan tara saksak."

16 Fa lo ri, ri ka tofo e Yesus, ri ka gatmo ini i eu bilseni e ti tintof tinglo balambat una fanangsi ini Deo e tuleni.

17 Safle Yesus e sau parfat lo sangsang keri ma ka war singri, "Le tongge tinglo tikii kaontri ku tapot lo ri, ma ri ku fapaket, kaontri a e tibi fasi una ti raw. Ma le ti fumberat tinglo bala tikii fel ku tapot ku u lo ri, fumberat a riu kiis saksak.

18 Le tongge ke Satan ku tapot ku u lo ri, aregii, kepmale kia ku ti raw? Ya war aregii, anwarow gau peteng ini ya feselufu e fan tara saksak lo rawas ke Belsebul.

19 Ma le gam ku peteng ini ya feselufre fan tara saksak lo rawas ke Belsebul, ma anwarow lo sa gii gam ka peteng ini tongge kemi, ri feseluf ri lo rawas ke Deo? Ilea, tongge kemi, ri fanangsi ini faikse kemi e tubiil.

20 Ma le ya ku feselufre fan tara saksak tикин lo rawas ke Deo, e fanangsi ini kepmale ke Deo e sau puek talo gam.

21 “Le ti kaltu rawas ku mel lo mara mok na fapaket ma ka efe lo ke fel, mara tuba eu ngongo kausi.

22 Safle le tikas ti kaltu kuriik gii ka rawas tикин iyat ine kaltu a ku puek ku fapaket tura, kaltu kuriik a eu kulfi ma ku tii ine fan mok nafafapaket a kaltu a ka tinge lo ma ku faseni e mara tuba.

23 “Le kaltu ka tibi ta tura yau, i e is yau. Ma kaltu a ka tibi ules yau una keptiim ire tongge, i e ta kaltu e fesel falek ire tongge.

24 “Le ti tara saksak ku suu tinglo ti kaltu, eu fes fawet ilo mara male mas ku siksik lala ine ti male una manau singi. Ma le ku tibi tongeni, tara saksak a eu sang aregii, ‘Yau la mil ilo fel ya la tinglo.’

25 Biing e la puek i e pari ini fel a i ka la kosngi e ngo are fel ri sam saif fakausi ma ri kabuk fagati fakausi e fan mara mok ilo bala.

26 Tara saksak a e la ka la onu e neng e baba fis na tara saksak ming, ri sak sekit iyat ini tibom, ma ri ka la melmel wa. Ma melmel ke kaltu a, ka la sak sekit iyat ine melmel kia ting famu.”

Se ri fasi una feveal tикин

27 Lo biing Yesus e gongon ine fan mok gii, neng e fefin una balre tongge a ka tau, “Deo e sam warfakausi e fefin gii ka fasus i o ma ka fasfasus o!”

²⁸ Yesus ka koso, “Deo e sam warfakausi re tongge a, ri kabuk ongni e sunwar kia ma ri ka usi.”

Gatgatom use ti tintof

²⁹ Biing galung kaltu a ri sam la fuun tикин, Yesus ka war, “Kulu gii, ri ta tongge na tumtubiil. Ri gatom use ti tintof, safle riu tibi par ti tintof. Riu su pari e tintof lo Jona.

³⁰ Are Jona e sam ta tintof tifre fan Niniwe, e su ngo ming aregii Sikow e Kaltu eu ta tintof tifre kulu lo biing gii.

³¹ Kwin ting i suu eu ti ilo anganggon tura re tongge tinglo kulu ting geenggii, ma ku sesuupuek ine fan sinang saksak keri, anwarow Kwin gii e puek tinglo pitpitow e nal gii una sa ongne use konona sangsang ke Solomon. Ma gii, neng e bakir iyat ine Solomon e sam ta i gii, safle kulu ting geenggii ri tibi bur ongne singi.

³² Tongge tingna Niniwe riu ti ilo anganggon tura re kulu ting geenggii, ma ri ku sesuupuek ine fan sinang saksak keri, anwarow fan Niniwe ri sam sangikis singe fam fabenge ke Jona. Ma gii, neng e bakir iyat ine Jona e sam ta i gii, safle kulu ting geenggii ri tibi sangikis.

Lam tinglo fong kaltu

³³ “E tek tikas eu fakrefu e ti lam ma ku tafu ilo ti mok e ngo borong tam ilo pikliu e ti dis. E tam, i eu towfu iyat ilo tafu, usi ini seri a ri ka kaulek, riu pari e anten.

³⁴ Wan matam e ta lam tinglo fom kiruur. Le wan matam ku kausi, fom kiruur eu fuun ine

anten. Safle le ru ku sak, fom kiruur ming eu fuun ine anor.

³⁵ Ate are anten ilo balam ka or.

³⁶ Ilea, le fom kiruur ku fuun ine anten ma ku tek ti galu ek or, fom eu fasef sekit ine anten, e su ngo aregii ansinsokow e lam ka pal o.”

Baba on na kiskam

³⁷ Biing Yesus e warwar tikii, neng e Farasi e gatmo ini i eu la en tura, iya i ka kaulek ka la kiis ulo fow e teibel na enen.

³⁸ Sakle Farasi a e la sangfuunfuun biing e pari ini Yesus e tibi gua famu e un limow ma kamu en.

³⁹ Iya Yesus kau peteng tifi, “Gii, e tикин, gam na fam Farasi gam gugua e pokpoktow e fang kap ma fan dis, sakle ilo balbalmi e fuun ine sinang na koko ma fan sinang saksak.

⁴⁰ Gam na fan talos! E tamu, gam tibi parfat ini kaltu e bilseni e poktow, e bilseni ming e bala?

⁴¹ Sakle tow e sa a ka ta ilo bala dis tifre fan sasngal, ma mara mok kemi ku kalkaliis.

⁴² “Kiskam sing gam na fam Farasi, anwarow fan mok liklik tinglo bala fam palang kemi, are la-i, fan suu, ma fanenger fan iririn mok ming una gowgow e fan tuan ku nul kausi, kemi faseni lo tikii sangful na galu ma gam, kam tow e tikii galu tife Deo. Sakle gam tibi usi e sinang e riis ma sinang una bura e Deo. E kausi tикин ini gam gi usi e sinang una tow e fam finafen tife Deo, ma gam ku tibi sangintafngi ming una usi e konona sinang.

⁴³ “Kiskam sing gam na fam Farasi, anwarow gau burbura tикин e fan sia kere ge lamlam ilo

bala fam felun nining, ma gam ka burbura ini tongge ilo fan male nafafapiiliis riu arare gam.

⁴⁴ “Kiskam sing gam, anwarow gam ngo are fan matmat ri tibi tow e ti tintof una peteng fate ilo, iya tongge ri ka su fesfes ilo poktow ma ri ka tibi parfat lo.”

⁴⁵ Nenge lo re tongge parfat lofafanau ka koso sing e Yesus aregii, “Titsa, biing o sesngeni e fan mok a, o su bero i kemeu ming.”

⁴⁶ Yesus ka koso, “Ma gam na tongge parfat lofafanau, kiskam sing gau ming, anwarow gam tow e famfafanau tuntun tifre tongge una usi, ma gam tibom gam ka tibi ules ri una usi.

⁴⁷ “Kiskam sing gam, anwarow tumtumlamiri paketmet ire fam profet ma gam kau bilseni e fan matmat wilo ri.

⁴⁸ Iya, gam ka bom sesuupuek i gam ini gam auu lo sa tumtumlamiri gow; ri paketmet ire fam profet ma gam kau bilseni e fan matmat wilo ri.

⁴⁹ Anwarow lo mok gii, ilo bala konona sangsang ke Deo e war aregii, ‘Yau tule re fam profet ma fan apostel tifri, tongge ri mu paketmet ire fa lo ri, ma fa lo ri, ri mu bero iri.’

⁵⁰ Ilea, kulu tinglo biing gii, riu kepe mafet naflow e dadaku re fam profet nano lewa ka lengi tinglo tofnge lo nal,

⁵¹ tofnge tinglo andaku e Abel, ka la muut lo andaku e Jekaraiya, seri paketmet ini u falifu ine altar ma Felun Nining Bakir. Yow, ya peteng tif gam, kulu gii riu kepe mafet lo mara mok gii.

⁵² “Kiskam sing gam na tongge parfat lofafanau, anwarow gam sam kepufu e ki tinglo parfat. Gam tibom gam tifing kau ma gam

kabung kaleni e sal kere fa gii ri ka rong una kaulek."

⁵³ Biing Yesus e la ting wa, fam Farasi ma fan titsa lofafanau ri tofnge una fatinge tuntun tura Yesus, ma ri ka gatgatmo ine mara gatgatom,

⁵⁴ ma ri ka nene i ini eu basaef ine ti sunwar.

12

War ate ma war farawas

¹ Lo biing a, singmat na mar na kaltu tikan ri puek tiim gii male ka la kut, iya ri ka pii faliu lo kekek ri ma Yesus ka gongon famu singre fan disaipel kia, ka war, "Gam u ate use is kere fam Farasi, le melmel keri e tibi usi e fan warwar keri.

² Mara mok e fifinuf, e amu puek malal. Ma fan sa e keskum, eu puek ten.

³ Sa gam war ini ilo bala anor, riu ongni lo siat, ma sa gau fakinal ini ilo bala fel, riu taungeni ilo poktow e fel.

⁴ "Ya peteng tif gam tanga fenfenngong, gam u tibi soke re tongge a ri ku paketmet ine pinpinumfomi ma safle wimi, riu tibi fasi una gow e tikas ti mok ming.

⁵ Safle yau fanas gam ini se gam u sokeni. Gam u sokeni e se a, wimi ini e sau paketmet ine pinumfow e kaltu, i e mel e rawas ma mia una bas ini ilo bala iif. Yow, ya peteng tif gam, gam samusu sokeni.

⁶ Gau parfat ini tongge ri su felfeli e lim e amboron man ine 2 toiya, safle e tek ti fa lo ri, Deo eu sangintafngi.

7 Safle e tикин, fan мара sisian ololom tinglo paklum, Deo e sam wes famti. Ilea, gam u tibi soke, gam kulfi tикин e fan irin man gii.

8 “Ya peteng tif gam, se e sesuupuek i yau na матре tongge, Sikow e Kaltu ming eu sesuupuek ini na матре fan anggelo ke Deo ilo balambat.

9 Safle se a ka peteng tifre tongge ini i e tibi ta lo yau, yau ming yau peteng tifre fan anggelo ke Deo ini i e tibi ta lo yau.

10 Ma tongge nano gii ri ku gow e ti sunwar una fotpursi e Sikow e Kaltu, tubiil keri Deo eu sangintafngi, safle se gii ku gow e ti sunwar e sak use Tangwa Riis, Deo eu tibi sangintafngi sekit e tubiil kia.

11 Biing riu uun o ri ku la fetiuf o i famu ine fam felun nining, tam fang kaonsiil ma ge lamlam na famfamu, gam u tibi sangfuunfuun ini are gam u fakale lo gam tibom, tam sa gam samusu peteng ini,

12 le Tangwa Riis eu fabenge sing gam lo biing a, ine sa gam samusu war ini.”

Warwar toftoflo kaltu lomba tuba mel

13 Nenge kaltu ulo falifu ire tongge a ka war singi, “Titsa, tabuung e sau met. Onu e tuaklik ku faseni e tuba e tauma lo kama.”

14 Yesus ka koso, “Kaltu, se e sam siik yau una ta medistret tam una ti falifu i kamu?”

15 Wimi i kam war singre tongge a, “Gam samusu ate! Efefe kausi, are gam ka fabur use fan мара matmatan sinang na koko; kaltu e tibi fasi una kepe ninliu singe tuba.”

16 Wimi i ka peteng tifri ine warwar toftof gii, “Palang ke neng e kaltu tuba mel e fafuutngeni e fan tuan fuunfuun.

17 I ka war singi tibom, ‘Ya ku gow e sa gii? E tek kek ti fel una tatauf fan tuan aiyang.’

18 “Wimi i ka war, ‘I gii e sa yau gow. Yau paekufu e fan mara felum fitiil kiang ma ya ku feti e ti fanenger lamlam, usi yau tatauf fan mara firfirian wit ma fan mara konona fan mok kiang ilo bala.

19 Ma ya ku war sing yau tibom aregii, “E fuun tикин e konona fan mok kiang, ya tatauf wilo mara matmatamfaim. Gii ya su manmanau, ya ku su enenen, ya ku su ininin ma ya ku su gasgas.” ’

20 “Safle Deo e war singi, ‘O lomba tикин! Geing-gii na panambiing ou met. Wimi, se gii kamu kepe e fan sa o sau fagatiifu usi o tibom?’

21 “I legii e mok eu fuut lo re tongge a ri ka taftafngeufu e tuba ri usi ri tibom, safle ri tibom ri sasngal na mata e Deo.”

Mele sangfuunfuun

22 Kala Yesus ka war singe fan disaipel kia, “Ilea ya ka peteng tif gam, gam u mele sangfuunfuun use ninliu kemi, ini sa una en, tam use pinumfomi, ini sa gam u los lo.

23 Ninliu e bakir iyat ine tuan una en ma pinumfomi e bakir iyat ine fang kolos.

24 Sang usi re fang kiyaukang*, ri tibi umume tam ri tibi fitfitiil, e tek ti felun tuan keri ma e tek

* **12:24 12:24** Deo e war toftof lo ninis una efe lo re tongge. Anman gii Inglis ri fotngi ini Rafen, ma kinen Feni ri fotngi ini Kiyaukang. (Anman gii e su ngo are ambal.)

ti fel keri una tatauf, safle Deo e fenfen ri. Ma gam, gau bakir iyat ire fan talaman na mata e Deo.

²⁵ Le gam ku sangsang fuunfuun usi e ninliu kemi wagii lo nal, gam sang ini sangsang a e fasi una posmi balik e ninliu kemi ine ti borom pansumbiing? E tam.

²⁶ Le gam ka tibi fasi una gow e tom boron mok aregii, e tamu gam ka sangfuunfuun use fanenger fan mok ming?

²⁷ “Gam sang use fam purpur a ri kafaf aina mok. Ri tibi fafaim fuunfuun, tam ri tibi somsomap lo fang kolos. Safle ya peteng tif gam, King Solomon e loslos lo fam finaswen kia, safle fam finaswen kia e tibi kulfi e fam finaswen kere fam purpur gii.

²⁸ Ma le ku ta ini Deo e fasfaswenu e fang garas aiya, a ku ta iri geingga ma na biingga tongge ri ku tetes ma ri ku bas iri ilo bala iif, ma gam, gau bakir iyat ine fang garas, Deo eu tow e fang kolos kemi. Kiskam sing gam, titinge kemi e su balik.

²⁹ Ma mele sik ini sa gam u eni tam sa gam u inmi, mele sangfuunfuun usi.

³⁰ Anwarow tongge tinglo nal ri siksik tuntun ine fan mok aregii, ma Taumi, i e parfat ini gau bura e fan mok aiya.

³¹ Safle gam samusu sik ine kepmale ke Deo, ma i kamu tata fan mok ming gii tif gam.

³² “E tикин, gam su ta borong galun sipsip, safle gam u tibi soke, anwarow Taumi e sau fefeal una tow e kepmale kia tif gam.

³³ Umat ine fan mok gau mel lo ma gam ku fenre fan sasngal ine fan mani lo. Gam samusu kepe e fam poket gii ka tibi fasi una sak. Ma gam ku kepe e fan mok piik tinglo balambat gii ka tibi fasi una tam ini, ma tongge na kinkinau ri ku tibi fasi una kinow tam fam pespes ri ku tibi fasi una bero ini.

³⁴ Anwarow le fan mok kausi kiam ri ku ta iya, ambusbusau ming eu ta wa.

Tongge na mus ri samusu efe kausi

³⁵ “Gam samusu fagati gam una faim. Piilpiiliis ma tafu e fan lam kemi ri ku fufuf,

³⁶ are tongge ri nene-i e kaltu bakir keri e bala mil tinglo en na tinaule, usi le i ku puek ma ku tukeni e matangkon, riu saupe tикин una ipki e matangkon tifi.

³⁷ Eu kausi singre tongge na mus a, le kaltu bakir keri ku puek ma ku pari ini ri parpar. Ya peteng tикин tif gam, i eu bou faswenu una faim ma ku uun ri, ri ku fakiisnge liflifti e teibel una en ma i ku puek ku fen ri.

³⁸ Ma eu kausi singre tongge na mus a, antalu le kaltu bakir keri ku fespuek lo palim e biing, tam lo enene ma ku pari ini tongge na mus kia ri fagati ri una nene-i.

³⁹ Safle gam u ten aregii; le kaltu ine ke fel enggi sau parfat lo sese anmatam pisii kaltu na kinkinau eu puek lo, i enggi tibi fasi una tafu e ke fel ri ku paki ma ri ku kau ilo.

⁴⁰ Gau ming, gam samusu fagati gam, anwarow Sikow e Kaltu eu puek lo ti anmatam pisii gam tibi sangfi ini i eu puek lo.”

41 Pita ka gatmo, "Taufi, areini, o petpeteng ini warwar toftof gii tif kemem, tam tifre tongge nano?"

42 Ma Taufi ka koso "Sese kaltu a ka sagisu fafaim kausi ma ka mel e konona sangsang kia? I e ta kaltu a, kaltu bakir kia ku towfu una efefe lo re tongge na mus ilo ke fel ma una fenfen ri riis, lo fam biing una enen.

43 Eu kausi singe kaltu na mus a, le kaltu bakir kia ku mil ma ku sa pari ini i e musmusngeni e faim kia.

44 Ya peteng tикиn tif gam, kaltu bakir a eu towfu e kaltu na mus a una efe lo fan mara ninsiow.

45 Safle, le kaltu na mus a ku war singi tibom aregii, 'Kaltu bakir kiang e tibi fasi una puek saupe,' ma ku tofnge una paket re fan taltalu, antamat ma gelefín, ma i ku su enen ma ku su inin ku bengbeng,

46 Kaltu bakir eu puek lo biing gii kaltu na mus kia ka sangfi ini i eu tibi puek lo, ma lo anmatam pisii gii i ka tibi ateni. Kaltu bakir a eu tese liklik ine kaltu na mus a ma ku taufu ku melmel tura re tongge na tibi titinge.

47 "Kaltu na mus gii ka parfat lo fabur ke kaltu bakir kia ma ka tibi fagati una nene-i, tam ka tibi gow e sa kaltu bakir kia e bura ini i eu gow, riu napis fuunfuun ine kaltu a.

48 Safle kaltu na mus gii ka tibi parfat lo fabur ke kaltu bakir kia ma ka tibi fagati una nene-i, tam ka tibi gow e sa kaltu bakir kia e bura ini i eu gow, riu tibi napis fuunfuun ine kaltu a. Se ri a ri ka tow e fan mok fuunfuun tifri, riu gatom ri use fan mok fuunfuun. Ma seri a ri ka tow e fan

mok fuunfuun tикин tifri, riu gatom ri ming use fan mok fuunfuun tикин.

49 "Ya sau puek una tow e iif ilo nal, ma ya bura tикин ini iif gii enggi sam tofnge una sok.

50 Safle ya samusu kepe e neng e amfagu, ma balang e mafet tикин, ku muut lo biing amfagu a eu rop.

51 Areini, gam sangfi ini ya puek una sa toufu e balamaris ilo nal? E tam. Ya peteng tif gam, ya puek una sa Pete fapotpot ire tongge.

52 Tofnge ting geenggii ma ku la, le ka lim ailo bala fumberat, riu tapot ma ri ku fagorot iri tibom. E tuul e neng riu sak lo e u e neng, ma e u e neng ru ku sak lo re tuul neng.

53 Riu tapot, tamow eu sak lo sikow ma sikow tamat ku sak lo tamow. Tinow eu sak lo ke fefin ma ke fefin ku sak lo tinow. Ma tinow e kaltu eu sak lo awow, ma awow ku sak lo tinow e ke matuk."

Ikseni e biing

54 Yesus e peteng tifre tongge, "Biing gau pari e pambalbal e kanek ting u sif, saupe tикин gam ku peteng ini bat eu luut, ma eu luut.

55 Ma biing gau pari e kif tinglo galu ise e matet, saupe tикин gam ku peteng ini male eu tuntun, ma eu tuntun.

56 Tongge na gurgurum, gam parfat una ikseni e parpar lo nal ma batsok. Ma areini gii gam ka tibi parfat una ikseni e sumbiing gii?

57 "Use e tamu gam tibom gam ka tibi ikseni e fan sa e riis?

58 Biing o fesfes lala aiwa ilo sal tura kaltu una la tauf o tife medistret, tofo unafafariis tura, are

i enggi am la tauf o tife medistret, ma medistret kam tauf o tifre fam polis ma ri kam tauf o ilo rerek.

⁵⁹ Ya peteng tif gam, gam u tibi fasi sekit una suu ku muut gam u faropo e fimfil ri tow tif gam."

13

Se a ka tibi sangikis eu tuup

¹ Lo biing a e mel e fa ri fespuek talo Yesus, ri ka sa peteng tifi ini e mel e fa lo re fang Galili, Pailat e paketmet iri lo biing ri niil na fafen ine fam finafen keri.

² Yesus ka koso, "Areini, gam sang ini fan tubiil kere fang Galili a e sak sekit iyat ine fanenger fang Galili, anwarow ri tupngeni e matan mafet aiya?

³ Ya peteng tif gam, e tam! Sakle le gam ku tibi iksi e balbalmi, gam nano ming gam u tuup.

⁴ Gam sangfi e tikii sangful ma e wal na kaltu lewa ri ka met lo biing fel bakir una Siloam e luut talo ri - gam sang ini ri na tongge a fan tubiil keri e sak sekit iyat ire tongge ri melmel ina Jerusalem?

⁵ Ya peteng tif gam, e tam! Sakle le gam ku tibi iksi e balbalmi, gam nano ming gam u tuup."

⁶ Kala Yesus ka seseng ine warwar toftof gii, "Neng e kaltu e mel e au fik e so ulo bala palang na waen kia. I ka la una la sik ine ti amfirow e au fik a, sakle i e tibi la par ti amfirow.

⁷ Ma i ka war singe kaltu na efefe lo palang na waen a, 'Kabuk la tuul e matamfaim gii a, ya salsala una sa siksik ine tam firow e au gii, safle ya tibi sa parpar ti amfirow. Pokufu, usi e tamu gii ku rop fofoesngeni e fan tuan tinglo nal gii?'

⁸ “Efefe lo palang a ka koso, ‘Kaltu bakir, tafu kubuk fatikii ti ming lo tikii ti matamfaim, ma ya ku bi kefi e warow ma ya ku of nal lo ine fam piinpiin.

⁹ Le ku fira lo matamfaim aiyat, kausi! Ma le ku tam, o kamu pokufu a.’ ”

Wok e fes saksak e liu lo biing Sabat

¹⁰ Lo neng e biing Sabat Yesus e fabenge ulo bala neng lo re fam felun ning

¹¹ ma e mel e neng e wok uwa e fesfes saksak lo tikii sangful ma e wal na matamfaim singe neng e tara saksak. Antow e wok a e su pung sok ma e tibi fasi una ti riis.

¹² Biing Yesus e pari e wok a, i e tau ini wi famu ma ka war singi, “Wok, o sam liu kosngi e anminse ailo o.”

¹³ Kala i ka tafu e limow ulo wok a, ma lo sumbiing a sekit wok a e la ti riis ma ka katfarsi e Deo.

¹⁴ Kaltu bakir tinglo felun ning a e la balasak anwarow Yesus e faliungeni mil e wok a lo biing Sabat, ma i ka war singre tongge, “E mel e on e biing una fam. Puek lo fam biing a, ri ku faliunge o, ma e tibi ta ini lo biing Sabat.”

¹⁵ Taufi ka koso singi, “Gam na tongge na kepkep gam na matam pangkii. E tamu, e tek tikas lo gam ek pikpikufu e amfinau tinglo ke buuluumakau tam ke dongki tinglo felu lo biing Sabat ma ku tatfeni una la fainmi?

¹⁶ Wok gii e ta tiner ke Abra-am, lewa Satan kabuk bingfamti lo tikii sangful ma e wal na matamfaim. E tamu, e tibi kausi ini riu faliungeni lo biing Sabat, kosnge sa i e sam kala ulo bala?”

17 Biing Yesus e war aiya, fa gii ri fatinge tura, ri la kiis borong sok, sakle tongge ri la fefeal tикин lo konona fan mok i e gowgow.

Warwar toftof lo kepmale ke Deo

18 Kala Yesus ka gatom, “Kepmale ke Deo are e ngo? Yau fattofo lo sa?

19 Kepmale ke Deo e ngo are amfiran mastet, kaltu e kepe ma ka la so ilo bala palang kia. Amfiran mastet a efaf ka la ta kalut bakir, ma fan talaman ri ka puek ri ka sa tuut polpol ilo teltelow.”

20 Kala i ka gatou mil, “Yau fattofo e kepmale ke Deo lo sa?

21 I e ngo are is, neng e wok e kepe ma ka iksi tura singmat na falawa, ma wimi falawa kiruur a kala ese.”

Matangkon balik

22 Wimi Yesus ka fes ka fabenge lala ulo bala fan taon ma fang kepkeptin male, biing i e fesfes lala wina Jerusalem.

23 Neng ka gatmo aregii, “Taufi, Deo eu su faliungeni e su puis e kaltu, be?”

Yesus ka war singri aregii,

24 “Ropo e songsongomfomi una kaulek ilo matangkon balik, anwarow, ya peteng tикин tif gam, fa fuunfuun riu tofo una kaulek ma riu tibi fasi.

25 Biing kaltu ine ke fel eu matet ma ku dukli e matangkon, gam u tisok ina male, gam ku tuktukeni e matangkon ma gam ku tautau aregii, ‘Kaltu bakir ipki e matangkon fasap kemem.’

“Sakle i eu koso aregii, ‘Ya tibi parfat lo gam ma ya tibi parfat ini gam la ting ya.’

26 “Wimi gam ku war, ‘Kemem en ma in tura o ma o ka fabenge ulo fan sal kemem.’

27 “Sakle i eu koso aregii, ‘Ya tibi parfat lo gam ma ya tibi parfat ini gam la ting ya. Gaman tii kosing yau. Gam na tongge na tumtubiil.’

28 “Eu mel e fatengse ma ngungutfat, biing gam u pari e Abra-am, Aisak ma Jekop ma fam profet nano ilo bala kepmale ke Deo, sakle gam tibom, riu bas suu i gam.

29 Tongge riu puek ting u weng ma ting i sif, ting i se ma ting i suu, ri ku keptafu ri lo en bakir ilo bala kepmale ke Deo.

30 Sunwar tикин i gii, e mel e fa seri a ri ka mi, riu la famu, ma fa a ri ka famu riu la mi.”

Fatengis ke Yesus use Jerusalem

31 Lo biing a fa lo re fam Farasi ri puek talo Jesus ri ka war singi, “La tinglo male gii, o ku la ilo tikas ti male. Erot e bala paketmet jyo.”

32 Yesus e koso, “Gam la peteng tife puul rokai a, aregii, ‘Yau fesel suu ire fan tara saksak ma yau faliungere tongge geenggii ma na biingbiing, ma lo biing baba e tuul yau faropo e fam kiang.’

33 Safle, ya samusu posmi e fam kiang geenggii, na biingbiing ma paka-ii, anwarow eu tek ti profet eu met ina male ine male Jerusalem.

34 “Jerusalem, Jerusalem o paketmet ire fam profet ma o ka rangmetmet ire fa Deo e tule ri usi o. Fam biing fuunfuun ya bura ini yau kepkeptiim ire fan siksikuam are ponga porot e

kepkeptiim ire fan siksikow ilo pikliu e um papau, sakle gam tibom, gam tibi fabur.

³⁵ Par! Fel kemi e umum usi gam. Ya peteng tif gam, gam u tibi fasi una par yau mil ku muut gam u war aregii, ‘Warfakausi tife se i e puek lo asow e Taufi.’ ”

14

Yesus ulo fel ke neng e Farasi

¹ Lo neng e Sabat, biing Yesus e la una la en ulo fel ke neng e paklure fam Farasi, tongge fuunfuun ri efe kausi ini i e gow e sa.

² Wa, u famu ini, e mel e neng e kaltu e ing falek e tom fow.

³ Yesus ka gatom re fam Farasi ma tongge parfat lofafanau, “E riis lofafanau ini riu faliungere tongge lo Biing Sabat, tam e tam?”

⁴ Sakle e tek tikas lo ri ek gon. Iya i ka puse lo kaltu a, ka faliungeni ma ka tuleni ka la.

⁵ Kala i ka gatom ri, “Le tikas lo gam ku mel e ti sikow, tam ti buuluumakau kia eu luut ilo bala ampolo lo Biing Sabat, i eu tibi sauplesak una tatfe kanek ini tinglo bala ampolo a?”

⁶ Safle ri tibi koso.

⁷ Biing i e pari ini tongge ri puek ulo en a, ri sunbur la kiis ulo fan sia u famu sekit, i sesngeni e sunwar toftof gii tifri,

⁸ “Le tikas ku fauun usi o una la ilo ti en bakir na tinaule, mangena la kepe e ti sia i famu sekit, are kuuf ma ka mel e tikas aiwa ri sau fauun usi, asow e bakir iyat iyo.

⁹ Le ku ngo aiya, kaltu bakir se gii ka fauun usi kamu nano eu puek ma ku sa war aregii sing o,

'Tow e sia kiām tife kaltu gii.' Wimi o ku maiyai saksak sekit ma o ku la kepe e ti sia imi sekit.

¹⁰ Sakle biing riu fauun usi o, ou la kepe e ti sia kere tongge fofoes, usi biing kaltu bakir tinglo en a eu puek, eu sa war sing o, 'Fenngong, sa kiis lo sia gii famu.' Le ku ngo aiya, tongge a ri ka sa la gam ka tiim lo en na tinaule a, riu resnge o.

¹¹ Anwarow se a ka bom resngeni, riu fapor. Ma se a ka bou fapor, riu resngeni."

¹² Kala Yesus ka war singe kaltu a ka fauun usi wilo en aregii, "Biing o fagati e ti sun tuan tinglo siat, tam tinglo efef, mele fauun usi re tanga fenfenngom, tam tanga tuamlik, tam tongge lo o, tam tongge tuba mel i fatat o. Le o ku gorot aiya, kuuf ma ri ka subuk fauun usi o, ma ri ku kos familia e fan sa o sam gow lo ri.

¹³ Sakle biing ou gow e ti en bakir, fauun usi re fan sasngal, tongge fan susu lo fofori e sak, tongge kekek ri e dol, ma tongge ri baf,

¹⁴ ma o ku kepe e warfakausi. E tикиn ri tibi fasi una koso sing o, sakle ou kepe fimfil lo, lo biing una matet mil singre tongge riis."

Warwar toftof lo en bakir

¹⁵ Biing neng lo re tongge ri kiis tura Yesus ulo teibel e ongni e sunwar gii, i e war singi aregii, "Warfakausi eu ta ilo se gii i ku en lo en bakir ilo bala kepmale ke Deo."

¹⁶ Yesus ka koso, "Neng e kaltu e fagati e en bakir ma ka fauun use re tongge fuunfuun una sala.

¹⁷ Lo biing bengu e en bakir a eu puek, i eu tuleni e kaltu na mus kia una la peteng tifre

tongge i e sau fauun usi ri aregii, 'Gam kasa, mara mok ri sau fagatiifu.'

18 "Sakle tongge nano a ri tiin fakale lo ri tibom. Neng baba tikii e war aregii, 'Ya am su filufu e neng e palang ma ya samusu la una la pari. Kiskam, tauf yau. Ya tibi fasi una la.'

19 "Neng ka war, 'Ya am su filufu e sangful na buuluumakau una faim ma ya ta ilo sal una la tof ri. Kiskam, tauf yau. Ya tibi fasi una la.'

20 "Ma neng ming ka su war, 'Ya am su tinaule, iya ya ka tibi fasi una la.'

21 "Iya kaltu na mus kia ka la mil ka la peteng tife kaltu bakir kia ine fan warwar keri. Biing kaltu ine ke fel e ong aiya, i e balasak tикин ma ka war aregii singe kaltu na mus kia, 'La saupesak ilo fan mara sal bakir ma fan mara sal balik ilo taon, o ku la uunre fan sasngal, tongge fan susu lo fofori e sak, fa ri baf ma fa kekek ri e dol, ri ku sala.'

22 "Kaltu na mus kia ka war, 'Kaltu bakir, sa o tungen yau una gow, ya sam gow, sakle e mel e sol iwa.'

23 "Kala kaltu bakir a ka peteng tife kaltu na mus kia aregii, 'Suu kosnge taon o ku la ilo fan sal bakir ma fan sal balik o ku la war rawas singri, ri ku sa la usi ini fel kiang eu fuun.'

24 Ya peteng tif gam, e tek tikas sekit lo re tongge lewa ya kabuk fauun usi ri, eu tofo e ti boron su lo fan tuan tinglo en kiang.' "

Sinang una mi nami e Yesus

25 Tongge fuunfuun ri mimi lala nami e Yesus ma i ka didiu mil usi ri ma ka war,

26 “Le tikii tikas ku sa la usi yau ma ku tibi isa e tamow ma tinow, ke wok ma siksikow, tanga tualik ma tanga fefnelik - yow, ma ming ninliu kia tibou ming - i e tibi fasi una ta disaipel kiang.

27 Ma se gii ka tibi kepe e aupaket kia ma ku usi yau, i e tibi fasi una ta disaipel kiang.

28 “Ma le tikas lo gam ku bur feti e ti fel e kiis iyat na efefe, e tamu, i e tibi fasi una kiis famu ma ku bi sang ususi ini eu fis sekit e mani una ropo e fel kia?

29 Anwarow le i ku gow e warow e fel a ma ku tibi fasi una faropo, tongge nano seri gii ri ku pari e fel kia, riu tasa.

30 Ri ku war aregii, ‘Kaltu a e tofngeufu e fel gii ma ka tibi fasi una ropo.’

31 “Tam, le ti king ka bala la fapaket singe neng, neng e king, i eu kiis ma ku bi sang kausi famu, ini i e fasi una la tura tikii sangful na mar na soldia kia una la fapaket singe neng e king a ku puek tura e u e sangful na mar na soldia kia, tam e tam?

32 Le i ku tibi fasi, i eu tuleni e ti galung kaltu una la tof gatmo e king a, usi eu tow e ti sunwar na balamaris biing i e ta iwa i tapak.

33 Lo e su tikii sal, se lo gam a ka tibi tii kosnge mara mok kia, i e tibi fasi una ta disaipel kiang.

34 “Semek e kausi, safle le ku rop e tiif lo, are riu gow ku semek mil?

35 E tibi fasi una ulsi e fan tuan ilo palang una faf, tam ini riu iksi tura tektekre fam buuluumakau una tow lo fan tuan ilo palang. Riu su bas ini.

“Se a ka mel e ambalbalu, tafu ku ong.”

15

Warwar toftof lo sipsip e tam ini

¹ Gii tongge na kepkep mani ma tongge na tumtubiil, ri tiin tiim liflifti e Yesus una ong singi,

² safle fam Farasi ma fan titsa lofafanau ri balasak ini, ri ka war aregii, "Kaltu gii e arare re tongge na tumtubiil ma ka enen tiim tura ri."

³ Wimi Yesus ka peteng tifri ine warwar toftof gii,

⁴ "Le tikas lo gam ka mel e tikii atis na sipsip kia ma tikii tikas ku tam ini, e tamu, i eu tibi taufsok lo e siu e sangful ma e siu na sipsip a ri ku enen ilo ti mok ma i ku sik lala ine tikii sipsip a ku muut eu la tupnegeni?

⁵ Ma biing i e la pari e sipsip a, i eu fefeal tикин ma ku kepe ku towfu ilo pasow

⁶ ma ku la mil wil fel kia. Kala i ku tau ire tanga fenfenngow ma tongge fatat ri, ri ku sa tiim ma ku war singri, 'Fefeal tura yau, ya sau pari mil e kek sipsip lewa ka tam ini.' ⁷ Ya peteng tif gam, lo e su tikii sal, fefeal ilo balambat lo tikii kaltu na tumtubiil e iksi e sinangu, eu bakir tикин iyat ine fefeal lo e siu e sangful ma e siu na kaltu riis a ri ka tibi fasi una mu iksi e sinsinangu ri.

Warwar toftof lo mani e tam ini

⁸ "Tam le ti wok ka mel e tikii sangful na mani silwa kia ma tikii neng ku tam ini, e tamu, wok a eu tibi fakrefu e ti lam, ma ku saif fakausi e bala fel ma ku sik kausi ini ku muut i eu sikseni?

⁹ Ma biing wok a e sam sipki mil, i eu fefeal tикин ma ku tau ire tanga fenfenngow ma tongge i fatatu, ri ku sa tiim tura ma ku war singri aregii,

'Fefeal tura yau; ya sam sipki e mani kiang lewa ka tam ini.'

¹⁰ Ya peteng tif gam, lo e su tikii sal eu mel e fefeal na matre fan anggelo ke Deo nafow e tikii kaltu na tumtubiil le ku iksi e sinangu."

Warwar toftof lo la tualik

¹¹ Yesus e posmi e warwar kia aregii, "E mel e neng e kaltu e u e sikow tamat.

¹² Neng balik ka war singe tamow aregii, 'Tabuung, tow e galu kiang lo tubam a o ka sangsang ini ou faseni lo kama.' Iya tamru ka faseni e tuba lo ru.

¹³ "E tiflik la tapak e biing ini ma sikow balik ka kepe e fan mara mok gii i ka mel lo ma i ka la ulo neng e kaontri u tapak tикин. Uwa, i e la rop fofoesngeni e fan mara mok kia lo panaf na sinang e du.

¹⁴ Wimi ini i e sam la ropo e mara mok i e mel lo, singmat na biis bakir e fespuek ulo kaontri kiruur a, ma i ka tofnge una pospos lo fan mok.

¹⁵ Iya, i ka la, ka bom la sik fam faim singe neng e kaltu tinglo kaontri a. Kaltu a ka tuleni wilobala balo kere fam bo kia una la fenfen ri.

¹⁶ I e buru ini i eu siing bala ine fan tuan a fam bo ri ka eneni, sakle e tek tikas ek tow e ti mok tifi.

¹⁷ "Biing konona sangsang e puek ulo paklu, i e war, 'E fis sekit e kaltu na mus ke tabuung, sakle fan tuan ari e fuun ma yau gii ya ka rong una met singe biis gii.

¹⁸ Yau suu ting wagii, ya ku la mil use tabuung ya ku la war singi aregii, "Tabuung, ya sam tubiil lo Deo ma lo o.

19 Ya am tibi riis ku fasi ini ou foteng yau ini ya na sikuam, ou su tauf yau, ya ku fam are kaltu na mus kiam.” ’

20 Iya, i ka matet ka la mil use tamow.

“Sakle biing sikow e ta uwa u tapak, tamow e sau pari ma bala ka la kuuluung usi. I e filau usi ka la ofngi ma ka osngi.

21 “Sikow ka war singi, ‘Tabuung, ya sam tubiil lo Deo ma lo o. Ya am tibi riis ku fasi ini ou foteng yau ini ya na sikuam.’

22 “Sakle tamow e war singre tongge na mus kia, ‘Saupe! Kepe wagii e ti kolos tapak a ka par kausi tикин gam ku sa faloski ini. Fasow e ti ring ilo antelen limow ma ti sendel ilo ung kekow.

23 Kepe e ti borong kau a ka buiit ma gam u paketmeteni, kerer ku gow e ti en tura ma kerer ku fefeal tiim.

24 Anwarow sikuang e sau met ma gii e sam liu mil.’ Iya, ri ka tofnge una fefeal.

25 “Lo biing a, sikow bakir e ta ulo bala palang. Biing i e puek fatatu e fel, i e ongni e dungwa ri, ri seksek ma ri ka guuigui.

26 Iya, i ka tau ine neng lo re tongge na mus ka sa gatmo aregii, ‘Sa le leii ri gow leii?’

27 Kaltu na mus a ka koso aregii, ‘Tuamlik e sau mil, ma taumu ka paketmet ine borong kau e buiit, anwarow i e pari e tuamlik e mil kausi.’

28 “Tualik bakir e balasak ma ka guuluung una kaulek. Iya tamow ka suu usi ka sa gon fangfangteni una kaulek.

29 Sakle sikow e koso singe tamow aregii, ‘Par! Mara matmatamfaim yafafaim sing o are kaltu na mus kiam ma ya sagisu ususi e fam fatungen

kiam. Safle e tifik mel e ti borom biing ini ok tow e ti boron meme tif yau usi ini ya ku fasi una fefeal tura tanga fenfenngong.

³⁰ Sakle biing sikuam gii ka kepe e fan mara mok kiam ka la kiipkiip ini tifre gelefin gii ri ka bom umumat lala ine fofori e mil ilo fel, o kau paketmet ine borong kau e buiit a usi.'

³¹ "Tamow ka war singi, 'Sikuang, bingne bingne o melmel tura yau ma fan mara mok ya mel lo e ta kiam.

³² Sakle kiar samusu fefeal ma gasgas, anwarow tuamlik e sau met ma gii i e sam liu mil. I e sam tam ini, sakle gii kiar sam kep famila.' "

16

Warwar toftof lo kaltu na efefe lo fan mok

¹ Yesus e peteng tifre fan disaipel kia aregii, "E mel e neng e kaltu tuba mel ma e mel e kaltu na efefe lo fan mok kia, gii ri ka otngi ini i e fifil fafalek ine fan mani ke kaltu bakir kia.

² Iya, i ka tau kaulek ini ma ka sa gatmo, 'Sa le gii ya ong lo, lo o? Tow e ti sinseng lo famim kiam tif yau, anwarow o am tibi fasi una ta kaltu una efefe lo fan mok kiang.'

³ "Kaltu na efefe a ka war singi tibom aregii, 'Ya ku tamu gii? Kaltu bakir kiang e bala kepuf yau tinglo famim kiang. E tek kek ti raw una kekef, ma ya maiyai una farfaran lala.'

⁴ Ya parfat ini yau gow e sa, usi ini biing riu farop yau tinglo famim, tongge riu are yau wilo bala fam fel keri.'

⁵ "Iya, i ka tau kaulek tingtingke ire tongge gii ri ka dinau ine fan mani ke kaltu bakir kia. Ka

gatmo e neng baba tikii, 'E fis e mani ke kaltu bakir kiang o dinau ini?'

⁶ "Kaltu a ka koso, 'E ta e wal e atis na galen na wel olif.'

"Wimi kaltu na efefe a ka war, 'Kepe e kem risit, o ku kiis saupe ma o ku seti ku su fet e atis na galen na wel olif.'

⁷ "Wimi i ka gatmo e neng baba e u, 'Ma o e fis e dinau kiam?'

"I ka koso, 'Tikii mar na bek na wit.'

"I ka war singi, 'Kepe e kem risit o ku seti ku su ta e wal e atis.'

⁸ "Wimi kaltu tuba mel a ka resngeni e asow e kaltu na efefe saksak a, le i e gow e fan mok gii are kaltu e sinangumel, anwarow tongge tingga lo nal ri parfat kausi tикин lo mara matmatan sal una musngeni e fan mus keri tinglo nal gii, ma parfat keri e kulfi e parfat kere fa ri musngeni e mus tinglo anten.

⁹ Ya peteng tif gam, fam ine fan mani tingga lo nal una fatfenngo lo re tongge, usi ini biing fan mani a eu rop, riu tau i gam wilo fam fel gii ka tibi fasi una tam ini.

¹⁰ "Se a ka efefe kausi lo fan iririn mok, i eu efefe kausi ming lo fan mok lamlam. Ma se a ka tibi usi e sinang e riis una efefe lo fan iririn mok, eu tibi usi e sinang e riis ming una efe lo fan mok lamlam.

¹¹ Ilea, le ri ka tibi fasi una titinge lo gam ini gam u efefe kausi lo fan mani tingga lo nal, anwarow ri sau pari e sinsinangumi ting wa, se a ku fasi una titinge lo gam ini gam u efe kausi lo fan mok tикин ting iyat?

12 Ma le gam ka tibi efe kausi lo fan mok kere fa, se a kamu tow e ti ton mok ku ta kemi?

13 “E tek ti kaltu na mus ek fasi una fam singe e u e kaltu bakir. I eu isa e neng ma ku bura e neng. I eu natkeni e neng ma ku fasange singe neng. Gam tibi fasi una fam singe Deo ma singe mani.”

14 Fam Farasi ri ta tongge ri biit mani tikin, iya ri ka ongni e fang gongon gii ma ri ka tumaru e Yesus.

15 Yesus ka war singri, “Gam na tongge una gorgorot fakausi e fan mok namatre tongge ini ri ku peteng ini gam na tongge kausi, sakle Deo e parfat lo fan sa e ngongo borong ilo busbusami. Ma sa a tongge ri ka sangfi ini e ta konona fan mok, e ta fan mok e sak sekit na mata e Deo.

Fanenger fam fabenge ming

16 “Famfafanau ke Moses ma fam fabenge kere fam profet ri sesngeni ka muut lo biing ke Jon, kaltu na gugu tarawen. Tofnge tinglo biing ke Jon ka sa muut geinggii, ri sesesngeni lala e konona sunwar lo kepmale ke Deo ma tongge nano ri susuk iri una kaulek ilo kepmale a.

17 E paumiil tikin singe balambat ma nal una tuup, sakle e tuntun tikin singe ti amboron tok lo pen ri seti inefafanau ini eu tam ini tinglo.

18 “Se a ka finngeni e ke wok ma ka la tili e neng e fefin, kaltu a e gow e sinang na faetfafalek, ma se a ka la tili e neng e fefin e kere e antinaule, kaltu a ming e gow e sinang na faetfafalek.

Lasarus ma kaltu tuba mel

19 “E mel e neng e kaltu tuba mel se e loslos lo fang kolos tapak kaukaor ma e par kausi tикин ma i e su enen kausi bingne.

20 Ulo matangkon lo banis kia, ri sa fafan-gongeufu e neng e kaltu sasngal ulo, asow gii Lasarus, ma fow e fuunuf ine fam piuu.

21 I e nene una eneni e fam piin lo fan tuan e luutluut tinglo teibel ke kaltu a, ma fam puul ming ri sa demdeme e fam piuu kia.

22 “Wimi kaltu sasngal a ka met ma fan anggelo ri ka onu ri ka la towfu unaisa e Abra-am. Kaltu tuba mel ming a e met ma ri ka ofo.

23 I e kepe singmat na ongker ulo bala iif na imperno. Ma biing i e par kanek, i e pari e Abra-am u tapak tикин tura Lasarus ulo galu lo.

24 Iya i ka tau singi, ‘Tabuung Abra-am, tengis yau ma o ku onu e Lasarus ku toko e ngusu e antelen limow ilo ti dan ma ku sa famaira e angkermeng, anwarow ya ongker tикин ilo bala iif gii.’

25 “Sakle Abra-am e koso singi aregii, ‘Sikuang, ou sangfi aregii, lo biing o liuliu uwa, o sam kepe e konona fan mok, ma Lasarus ka kepe e fan mok saksak, sakle gii, i ka subung kiis kausi, ma o ka kepe e singmat na ongker.

26 Ma neng e mok ming, e mel e singmat na anlau Deo e sau bilseufu i falifu i kiar, usi ini se a ka bur la ting wagii usi gam, tam se a ka bur la tingwa usi kemem, i eu tibi fasi.’

27 “Ma i ka koso, ‘Arik, ya gatom fangfangte o tabuung, tuleni e Lasarus ku la ilo fel ke tabuung,

28 le e mel e baba lim na tuaklik. Onu ku la war rawas singri, ri ku ate, usi ini riu tibi sa la ming ilo male na ongker gii.'

29 "Ma Abra-am ka koso, 'Famfafanau ke Moses ma fam fabenge kere fam profet iwa i sing ri. Touf ri, ri ku ong singri.'

30 "Kaltu a ka war, 'E tam, tabuung Abra-am, le tikas kabuk met, ma ku matet mil kosnge minet, ku la peteng tifri, riu titinge ma ri ku sangikis.'

31 "Ma Abra-am ka war singi, 'Le ri ku tibi fasi una ongne singe famfafanau ke Moses ma fam fabenge kere fam profet, ri tibi fasi una titinge ming singe tikas le ku matet mil kosnge minet.' "

17

Tubiil, titinge, ma mus

1 Yesus ka war singre fan disaipel kia, "Fan mok una pete luut ire tongge ilo fan tubiil, riu puek, safle kiskam singe kaltu a ka gow e fan mok una fafaluuutnge re tongge.

2 Le tikas ku gow e ti mok lo re anrimberat gii ku luut lo tubiil, i eu kepe mafet e bakir iyat, le ri ku kawi e ti fat bakir ilo angkongkongow ma ri ku fauli ina kasap.

3 Iya, ate kausi.

"Le tuamlik ka tubiil, porow, ma le i ku sangikis, sangintafngi e tubiil kia."

4 Le i ku fasifasi tubiil lo o, lo bala tikii biing ma ku fasifasi mil ku sa war sing o, lo bala tikii biing ini i e sam sangikis, o samusu sangintafngi e tubiil kia."

5 Ma fan apostel ri ka war singe Taufi, "Fabakirngeni e titinge kemem."

6 Ma i ka koso, “Le gam ku mel lo titinge e su balik are amfiran mastet, gau fasi una war singe kalut bakir gii, ‘Fifit ting wagii ma o ku la ti ina kasap,’ ma i ku ong sing gam.

7 “Le tikas lo gam enggi mel e ti kaltu na mus kia e so e ke palang tam e efe lo fan sipsip kia, ma kaltu a ku mil tinglo fam, e fasi ini ou war singi aregii, ‘Arik a, kasa wagii o ku sa kiis ma o ku en?’

8 E tam, ou su war singi aregii, ‘Fagateni e fan tuan aiyang, ma o ku ternge o ma o ku efe use fam fabur kiang ma ya ku enenen ma ininin, wimi o kamu subuk en ma o ku in a.’

9 Are ini, ou aro singi le i e sam usi e fan sa o onu ini una gow? E tam.

10 Ilea, gau ming, biing gam sam ropo e mara mok ri uun gam ini una gow, gam samusu war aregii, ‘Kemem tibi ta konona tongge na mus ku fasi ini riu katfariis kemem. Kemem su gow e fan mus kaltu bakir kemem e sam tow tif kemem.’ ”

Yesus e faliungeni e tikii sangful na kaltu

11 Biing Yesus e fes wina Jerusalem, i e fes lala ulo makpaek lo distrik Samaria ma Galili.

12 Biing i e bala kaulek ulo neng e keptin male, tikii sangful na kaltu e mel e anminse lepra ulo ri, ri ka tongeni. Ri ti uwa u tapak*,

13 ma ri ka tau bakir tикин singi, “Yesus, Kaltu bakir, tengis kemem!”

14 Biing i e par ri, i ka war, “La, gam ku la fanangsi gam tibom tifre fam pris.” Ma biing ri la, fofori e la kalkaliis.

* **17:12 17:12** Ri su ti uwa u tapak, anwarow e tibi riis lo fafanau ini fan lepra riu melmel tiim tura re tongge. Lewitikas 13:45-46

15 Tikii neng e lo ri, biing e pari ini anminse ulo e sam rop, i e mil ka tautau bakir lala ma ka katkatfarsi lala e Deo.

16 I e puek ka sa luut ulo fow e ungkekow e Jesus ma ka aro singi - i e ta kaltu tingna Samaria.

17 Ma Jesus ka gatom, “E tibi ta ini tikii sangful na kaltu ri sam kalkaliis? Nenge baba siu, iri iya?

18 Ya sang ini e sam tek tikas eu mil una sa katfarsi e asow e Deo, be, safle sakin ses gii?”

19 Wimi ka war singe kaltu a aregii, “Matet o ku la, titinge kiam e sau faliunge o.”

Sikow e Kaltu eu mil

20 Neng e biing, fam Farasi ri gatmo e Jesus ini sese biing kepmale ke Deo eu puek, ma i ka koso, “Biing kepmale ke Deo eu puek, tongge ri tibi fasi una pari ine matmatri,

21 tam ini tongge ri ku peteng ini, ‘I legii,’ tam, ‘I leleii,’ anwarow kepmale ke Deo e sam ta ina balmi.”

22 Kala i ka war singre fan disaipel kia, “Biing eu puek ma gam ku bura tикин ini gam u pari e tikas lo re fam biing ke Sikow e Kaltu, sakle gam u tibi pari.

23 Tongge riu peteng tif gam, ‘I leleii!’ tam ‘I legii!’ Mangena la filau lala nami ri.

24 Anwarow Sikow e Kaltu lo biing kia, eu ngo are ampil, a ka pil ma ka sosok ilo batsok tinglo neng e ngusu ku la muut ilo neng e ngusu.

25 Sakle famu, i e samusu kepe fan mafet fuunfuun, ma kulu tinglo biing gii ri ku guuluung ini.

²⁶ “E su ngo are lewa lo fam biing ke Noa, ma eu su ngo aiya ming gii tura fam biing ke Sikow e Kaltu.

²⁷ Tongge ri ininin ma enenen, antamat ma gelefin ri fatinaule faliu, ka la muut lo biing Noa e kaulek ulo sip. Wimi male ka fuun ma ka bero iri nano.

²⁸ “E su ngo are lo fam biing ke Lot. Tongge ri enenen ma ininin, fififil ma umumat, umume ma bilbilse fam fel.

²⁹ Safle lo biing Lot e la kosnge taon Sodom, iif ma fam fulful e luut are bat tinglo balambat, ru ka bero sekit iri nano.

³⁰ “Eu su ngo aregii lo biing Sikow e Kaltu eu puek.

³¹ Lo biing a, se a ka ta ilo palkanmale, e mu tibi la kaulek mil ilo bala ke fel use fan mok kia una la kepe. E su ngo ming aregii, se a ka ta ilo bala palang, e mu tibi la mil use ti mok.

³² Sang use wok ke Lot!

³³ Se a ka tofo una bingfamti e ninliu kia tibom, ninliu kia eu tam ini. Sakle se a ku fafen ine ninliu kia, i eu kepe e ninliu kia.

³⁴ Ya peteng tif gam, lo panambiing a, e u e kaltu ruw fabulis ilo bala ngiin. Neng lo ru, riu kepe ma neng ku ngo sok.

³⁵ E u e fefin ruw sese firfirany wit wilo falawa, neng lo ru, riu kepe ma neng ku ngo sok.”

³⁶ †

³⁷ Fan disaipel kia ri ongni e fan warwar a, ri ka gatmo, “Taufi, mok gii eu fuut iya?”

† **17:36 17:36** Fa lo re fang kaltu parfat ri sang ini su gii e ta nenge wes ming: “E u e kaltu ruw ta ilo bala palang. Neng lo ru riu kepe, ma neng ku ngo sok.”

Ma i ka koso, “Mok a ka mel e kaltu e met ilo, ilo mok a, gam u pari e fan man riu la tiim ilo una eni.”

18

Warwar toftof lo medistret ma wok makos

¹ Wimi Yesus ka peteng tifre fan disaipel kia ine neng e warwar toftof una fabenge singri, ini ri samusu nining bingne ma ku tibi golgol e fofori.

² I ka war singri, “Ulo neng e taon, e mel e neng e medistret. I e tibi soksokeni e Deo ma i e tibi efefe kausi lo re tongge.

³ Ma ulo taon a, e mel e neng e wok makos. I e sagisu pupuek use medistret a ka sa petpeteng tifi aregii, ‘O samusu ules yau, anwarow kaltu na matamfais kiang e bala bero i yau.’

⁴ “Fam biing fuunfuun medistret a e tibi ongong singe wok a. Sakle lo neng e biing i ka war singi tibom, ‘E tikin, ya tibi soksokeni e Deo ma ya tibi sangsang usi re tongge.

⁵ Sakle anwarow wok makos gii e puek sok talo yau, yau ulsi lo anganggon kia, are wimi kam la golgol e fong singi.’ ”

⁶ Ma Taufi ka war, “Gam kepe sangsang tinglo sa medistret saksak a e war ini.

⁷ Deo ming eu ules re tongge kia, le ri ku tengseni lo fan siat ma fam panambiing ma i eu saupe una ules ri.

⁸ Ya peteng tif gam, i eu fariisu e fan mafet keri ma ku ules ri saupe tikin. Safle, lo biing Sikow e Kaltu eu puek, i eu sikseni ini ti tom fa lo re tongge gii lo nal ri titinge, tam e tam?”

Farasi ma kaltu na kepkep mani

⁹ Yesus ka seseng ine neng e warwar toftof tifre tongge a ri ka titinge lo ri tibom ini ri riis fasef ma ri ka parpu ire fa.

¹⁰ “E u e kaltu ru la ulo Felun Nining Bakir una la nining. Neng e ta Farasi ma neng e ta kaltu na kepkep mani.

¹¹ Farasi a, e ti ma ka nining aregii, ‘Deo, ya aro sing o, anwarow ya tibi gorot are fanenger fan tongge - tongge na kinkinau, fa una gowgow e fan sinang saksak, tongge na gowgow e ansinang na faet falek - tam ini yau ngo ming are kaltu na kepkep mani gii.

¹² Ya felfel lo e u e biing lo bala tikii neng, tikii neng e wik. Ma fan mok ya kepkepe, ya fasfaseni lo sangful na amfor ma ya kafafafen ine tikii amfor.’

¹³ “Sakle kaltu na kepkep mani e su ti uwa u tapak, ma e tibi par wilo balambat ming, i e su pakti e bala ususu ma ka war, ‘Deo, tengis yau. Ya na kaltu na tumtubiil.’

¹⁴ “Ya peteng tif gam, kaltu gii, Deo e pari ini i e ta kaltu riis ma i ka la mil ulo ke fel. E tibi ta ini Farasi a, anwarow tongge nano a ri ka bom resnge ri, Deo eu fapor ri. Ma tongge nano a ri ka fapor ri tibom, Deo eu resnge ri.”

Berberat tura Yesus

¹⁵ Tongge ri kepuek ming ine fam buubuun keri tife Yesus usi ini i eu la pot lo ri. Biing fan disaipel ri pari e mok gii, ri porau ri.

¹⁶ Sakle Yesus e tau ire berberat usi ma ka war, “Gaman tauf re berberat ri ku sa la usi yau. Gam

u tibi kale ri, anwarow kepmale ke Deo e ta kere matan tongge aregii.

¹⁷ Ya peteng tикин tif gam, le ti kaltu ku tibi a-uu lo kepmale ke Deo are tom boroner, i eu tibi fasi sekit una kaulek ilo bala kepmale ke Deo.”

Kaltu tuba mel

¹⁸ Ma neng lo re tongge lamlam ka gatmo, “Konona titsa, yau samusu gow e sese mok, usi ini yau kepe e ninliu bingne?”

¹⁹ Yesus ka koso singi, “Usi e tamu o ka foteng yau ini konona kaltu? E tek tikas eng kausi, sakle Deo tibom.

²⁰ O sau parfat lo famfafanau: ‘Gam u tibi gow e ansinang na faet falek, gam u tibi paketmet ire fa, gam u tibi kinau, gam u tibi gurum talo re fa, gam samusu nawen singre tautaumi ma tintinmi.’”

²¹ Ma kaltu a ka war, “Fan mara mok nano gii ya sam ususi tinglo biing ya balik uwa ka sa muut gii.”

²² Biing Yesus e ongni e war aiya, i ka war singi, “O pospos aiwa lo neng e mok. La o ku la umat ine mara mok nano kiam, ma mani ou kepe lo, ou faseni lo re tongge sasngal. Ou gorot aiya, usi eu mel e fan mok piik kiam ilo balambat. Wimi o kamu mi nami yau a.”

²³ Biing kaltu a e ongni e sunwar gii, bala e la mafet, anwarow i e ta kaltu tuba mel.

²⁴ Yesus ka par usi ma ka war, “Tongge tuba mel, e tuntun tикин singri una kaulek ilo bala kepmale ke Deo.

²⁵ E tикин e tuntun singe kamel una los ilo amfur lo nil na somsomap, sakle e tuntun tикин iyat singe

kaltu tuba mel una kaulek ilo bala kepmale ke Deo.”

²⁶ Fa a ri ka ongni e Yesus e war aiya, ri ka gatom, “Le ku ta aiya, se gii ku fasi una kepe ninliu bingne?”

²⁷ Ma Yesus ka koso, “Sa a kaltu ka tibi fasi sekit una gow, Deo e fasi una gow.”

²⁸ Ma Pita ka war singi, “Kemem sam la kosngi e fan mara mok nano kemem ma kemem ka usi o.”

²⁹ Yesus ka war singri, “Ya peteng tикин tif gam, se gii kabuk la kosngi e ke male, tam ke wok, tam tanga tualik, tam tamow ma tinow, tam berberat kia na fow e kepmale ke Deo,

³⁰ i eu kep fuunfuunngeni e konona fan mok gii lo biing gii ma wimi, i eu kepe e ninliu bingne, bingne.”

Yesus e war mil lo minet kia

³¹ Yesus ka uunre tikii sangful ma e u na disaipel ka la ulo galu ma ka peteng tifri, “Kiar u la kanek ina Jerusalem ma fan mara mok lewa fam profet ri kabuk seti ini eu fuut lo Sikow e Kaltu, riu fabonti.

³² Riu tow ilo limre fan Jentael ri ku tumaru, ri ku bero ini ine fan warwar saksak, ri ku kansu, ri ku napsi ma ri ku paketmet ini.

³³ Lo biing baba e tuul i eu matet mil.”

³⁴ Fan disaipel ri tibi kepe e bala e fan warwar gii. Pimpiku e fifinuf iri, ma ri tibi parfat ini sa Yesus e gongon lo.

Nenge baf e par mil

³⁵ Biing Yesus e puek fatat una Jeriko, neng e baf e kiiskiis ulo anisow e sal ka farfaran fan mok singre tongge.

³⁶ Biing i e ongen re galung kaltu ri sol paket, i e gatom ri ini ri gow e sa.

³⁷ Tongge a ri ka peteng tifi, “Yesus tingna Nasaret legii e sol paket.”

³⁸ I ka tau, “Yesus, Sikow e Dewit, tengis yau!”

³⁹ Fa ri famfamu lala, ri ka porow ma ri ka war singi ini i eu fakuta e ngusu. Sakle i e su tau bakir tикин mil aregii, “Sikow e Dewit, tengis yau!”

⁴⁰ Yesus ka la tisok ma ka fauun ini riu onu e baf a usi. Biing baf e la puek unaisa, Yesus ka gatmo,

⁴¹ “O bura ini yau gow e sa lo o?”

I ka koso, “Taufi, ya bura ini yau par.”

⁴² Yesus ka war singi, “Par! Titinge kiam e sau faliunge o.”

⁴³ Ma saupesak anmata ka par ma i ka mi nami e Yesus ka katfarsi lala e asow e Deo. Biing tongge nano ri pari e mok gii, ri ming ri katfarsi e Deo.

19

Sakiyas, kaltu na kepkep mani

¹ Yesus e kaulek una Jeriko ma ka fes una sol sekit.

² E mel e neng e kaltu uwa ri fotngi ini Sakiyas. I e ta kaltu bakir lo re tongge na kepkep mani ma e ta kaltu tuba mel.

³ I e bur par ini Yesus e ta se, sakle i e pospostuuk tикин gii ka tibi fasi una pari e Yesus, anwarow tongge ri fuun.

⁴ Iya, i ka filau famu ka la fen ulo neng e au fik ulo mok gii ini Yesus ku sol paket ulo, usi ini i ku par lo.

⁵ Biing Yesus e la ti sekit ulo mok a, i e tar wiyat ma ka war singi, “Sakiyas, pu saupe wagii! Anwarow ya samusu ta ilo keu fel, geenggii.”

⁶ Saupesak, Sakiyas ka pu, ka sa areni e Yesus tura singmat na gasgas.

⁷ Tongge nano ri pari e mok gii, ma ri ka tofnge una famunge, ri ka war, “I e la una la en tura kaltu na tumtubiil.”

⁸ Safle Sakiyas e ti ma ka war aregii singe Taufi, “Par, Taufi! Gii, yau fenre fan sasngal ine galu lo tubang. Ma le ya kabuk gurum ine tikas ma ya ka kep fofoes ine ti mok kia, yau filfafetngeni mil ine fimfil lo tifi.”

⁹ Ma Yesus ka war singi, “Geenggii, ninliu fuu e sau puek ilo fel gii, anwarow kaltu gii ming e ta sikow e Abra-am.

¹⁰ Le Sikow e Kaltu e puek una sik ma una faliungeni e se e sam tam ini.”

Warwar toftof lo tikii sangful na kaltu na mus

¹¹ Biing ri ongongne lo mok gii, i ka seseng ming ine neng e warwar toftof tifri, anwarow i e sau fatat una Jerusalem ma tongge ri ka sangfi ini kepmale ke Deo eu su puek saupe tikin.

¹² I ka war, “E mel e neng e kaltu bakir e rong una la u tapak ini ri ku la feti ku ta king, ma ini kamu mil ilo ke male.

¹³ Iya, i ka tau ire tikii sangful na kaltu na mus kia, ka tow e 1,000 kina tife tikii neng, tikii neng lo ri ma ka war, ‘Gam u famngeni e fan mani a ku muut yau mil.’

14 “Sakle tongge tinglo male kia sekit ri tibi bura ini i eu ta king, iya ri ka tule re fa, ri ka mi nami una la peteng aregii, ‘Kemem tibi bura ini kaltu gii eu ta king kemem.’

15 “Safle ri la feti ka ta king ma ka mil. Kala ka tau ire tongge na mus a ka tow e fan mani tifri, usi ini i eu sa parfat singri ini ri sau musngeni e, e fis e mani ming ilo poktow e neng a i kabuk tow tifri.

16 “Neng baba tikii e puek ka sa war, ‘Kaltu bakir, ya sau musngeni e 1,000 kina lewa o ka tow tif yau, ka puek ka la ta 10,000 kina.’

17 “Ma kaltu bakir a ka koso, ‘Konona famim. O ta konona kaltu na mus kiang. O sam efefe kausi lo fan iririn mok, gii, ou efe lo tikii sangful na siti.’

18 “Wimi neng baba e u ka puek ka sa war, ‘Kaltu bakir, ya sau musngeni e 1,000 kina lewa o ka tow tif yau ka puek ka la ta 5,000 kina.’

19 “Ma kaltu bakir kia ka koso, ‘Ou efe lo baba lim na siti.’

20 “Kala neng e kaltu na mus ming ka puek ka sa war, ‘Kaltu bakir, 1,000 kina kiam gii, ya afti ine sun laplap ma ya ka finufu.

21 Ya soke o, anwarow o ta kaltu nafafaporau. Fan mok o tibi towfu, ou la kepe ma fan mok o tibi so, ou la fitlili.’

22 “Ma kaltu bakir kia ka war, ‘Yau ikse o ine fan warwar kiam tibom. O na kaltu na mus saksak, o parfat be, ini ya na kaltu nafafaporau, ya la kepkepe e fan mok ya tibi towfu ma ya ka la fiitfiitlii e fan mok ya tibi so?’

23 Ma e tamu o ka tibi towfu e mani kiang ulo beng, usi ini biing ya sau mil, yang gi sa kepufu tura ti ton neng ming ilo poktow?”

24 “Wimi ka war singre fa ri titi u fatat, ‘Gam kepufu e 1,000 kina gii singi ma gam ku tow tife neng a ka mel e 10,000 kina i singi.’

25 “Ri ka war, ‘Kaltu bakir, e sau mel e 10,000 kina i singi.’

26 “Ma i ka koso, ‘Ya peteng tикин tif gam, tongge nano a ri ka mel e fan mok keri, riu tata ming fatalu. Sakle use se a ka tek ti mok kia, boron sa a i ka mel lo, riu kepufu singi.

27 Sakle tongge na matamfais kiang, a ri ka tibi buru ini eu ta ya na king keri, uun ri wagii, gam ku sa paketmet iri na matang.’ ”

Jesus e kaulek una Jerusalem are king

28 Biing Jesus e sesngeni tikii e warwar toftof gii, i e famu iri, ri ka la kanek wina Jerusalem.

29 Biing i e sau fatfatat ma ku puek una Betfage ma Betani, ulo paklunmale ri fotngi ini paklunmale Olif, i e tuleni e un neng lo re fan disaipel kia ka la ma ka war singru,

30 “Kamuw la ilo sun male ai famu, ma biing kamuw kaulek ilo, kamuw pari e dongki fuu ri kaweufu, ma e tek tikas ek sam kiis ulo. Pikufu ma kamu ku mil tura.

31 Ma le tikas ku gatom kamu ini, ‘Kamu pikii wina tamu?’ Kamuw peteng tifi aregii, ‘Taufi e mel e famim kia lo.’ ”

32 Ung kaltu a Jesus ka tule ru, ru la ru ka la pari ini fan mok e su ngo aregii Jesus ka peteng.

³³ Biing ru pikpikufu e amfinau lo dongki fuu a, kaltu kia ka gatom ru, "Kamu pikii e dongki a una tamu?"

³⁴ Ru ka koso, "Taufi e mel e faim kia lo."

³⁵ Ru ka tatfeni tife Yesus, ru ka solo e fang kolos tapak ke ru ulo poktow ma ri ka ulsi e Yesus ka kiis ulo.

³⁶ Biing e fesfes lala ka la, tongge ri sosol fang kolos tapak keri ulo sal.

³⁷ Biing i e puek fatatu e male a ine sal ulo ka tofnge pu tinglo paklunmale Olif, singmat na galun disaipel a ri tofnge una kaung na fefeal ma katfarsi e Deo, anwarow lo fan mok na tibou fuut ri sau pari:

³⁸ "Warfakausi tife King,
se e puek lo asow e Taufi.

Balamaris ilo balambat
ma akteni e asow e Deo wiyat sekit!"

³⁹ Fa lo re fam Farasi ulo bala galung kaltu a, ri ka war singe Yesus, "Titsa, porau re fan disaipel kiam!"

⁴⁰ Yesus ka war, "Ya peteng tikin tif gam, le ku tek borong lo ri, fam fatfat riu fagalo."

⁴¹ Biing i e puek fatat una Jerusalem ma ka pari e siti, i e teng usi,

⁴² ma ka war, "Enggi kausi le ong gi sau parfat lo sa a ku tow e balamaris tifo, sakle gii, i e fifinuf ine wan matam.

⁴³ Biing eu puek ma tongge na matamfais kiam, ri ku balo kale o ma ri ku ti kale o ilo fan mara galgalu nano.

⁴⁴ Riu siiupo ma ri ku bero sekit i o. O tura berberat ilo bala balo kiam. Riu tibi fasi una towfu e tikii ti fumfat ku ngosok ilo poktow e tikas

ti fu, anwarow o tibi parfailm e biing Deo e puek una ules o.”

Yesus ulo bala Felun Nining Bakir

⁴⁵ Wimi i ka la kaulek ulo balo lo Felun Nining Bakir ma ka tofnge una fesel suu ire tongge ri umumat.

⁴⁶ Ma i ka war, “Ri seti aregii, ‘Kek fel eu ta fel una nining’, sakle gam sam gow ka la ta, ‘Male na keskeskum singre tongge na kinkinau.’ ”

⁴⁷ Fam biing nano i efafabenge ilo bala Felun Nining Bakir. Sakle fam pris lamlam, fan titsa lo fafanau ma ge lamlam una balre tongge a, ri toftofo una paketmet ini.

⁴⁸ Safle ri tibi fasi una la sikseni e ti sal una gow e sangsang a, anwarow tongge nano ri buru tikan ini riu ongong lo fan warwar kia.

20

Gatgatom use rawas ma mia e Yesus

¹ Lo neng e biing, biing Yesus efafabenge singre tongge ulo bala balo lo Felun Nining Bakir, ma ka sesesngeni e konona sunwar, fam pris lamlam ma fan titsa lo fafanau ma ge lamlam ri ka tiin la usi,

² ri ka la war, “Peteng tif kemem ini o gowgow e fan mok gii lo sese rawas? Ma se e tow e rawas gii tifo?”

³ Ma i ka koso, “Yau gatom gau ming ine neng e gatgatom. Gau peteng tif yau,

⁴ Amfagu Tarawen ke Jon, e ta tinglo balambat, tam singe kaltu?”

5 Ri fawar usi u falifu iri tibom, ri ka war, “Le kiar ku peteng ini ‘tinglo balambat,’ i eu gatom, ‘Gii ma e tamu gii gam ka tibi titinge lo?’

6 Ma le kiar ku peteng ini ‘singe kaltu,’ tongge nano riu rang kiar ine fatfat, anwarow ri titinge tикин ini Jon e ta profet.”

7 Iya ri ka koso aregii, “Kemem tibi parfat ini ting ya.”

8 Ma Jesus ka war singri, “Yau ming yau tibi peteng tif gam ini sese rawas ya gowgow e fan mok gii lo.”

Warwar toftof lo re tongge saksak ri efe lo palang

9 Ma i ka war ka la ka seseng tifre tongge ine neng e warwar toftof ming. “Neng e kaltu e so e palang na waen kia ma ka towfu tifre tongge una efefe lo ma i ka la, ka la melmel u tapak.

10 Biing e matuk faim, i e tuleni e neng e kaltu na mus kia use re tongge a ri ka efefe lo ke palang, usi riu la tow e tom fa lo fam fingfingwan waen tinglo palang a tifi. Sakle tongge na efefe lo palang a, ri pakti ma ri ka tuleni ka la mil fofoes.

11 I ka tuleni e neng ming, sakle neng a, ri pakti ma ri ka pete maiyai ini ma ri ka tuleni ka la mil fofoes.

12 Wimi i ka tuleni e neng baba e tuul ka la, sakle ri paket bero sekit ini ma ri ka bas suu ini.

13 “Kala tamow e palang a ka war, ‘Ya ku tamu gii? Yau tuleni ngan e sikuang, se ya bura tикин. Ya sang ini riu la natkeni.’

14 “Sakle lo biing tongge a ri pari, ri fagon falifu iri tibom ri ka war, ‘Kaltu gii eu kepe e ninsiow e

tamow, kerek paketmet ini ma ninsiow e tamow ku ta kiar.'

¹⁵ Iya ri ka la bas suu ini tinglo palang ma ri ka la paketmet ini.

"Sa gii tamow e palang na waen a ku subuk gow lo ri?

¹⁶ I eu puek ku sa fis metmet ire tongge nano a ma ku tow e palang na waen a tifre fa kuriik." Biing tongge ri ongni e mok gii, ri war, "Eu tibi fuut aiya!"

¹⁷ Yesus ka par riis usi ri ma ka gatom, "A gii ma sese pimpiku e sunwar a ri kabuk seti:

'Fat lewa tongge na bilbilse fam fel ri ka guuluung ini,

e sau puek ka ta warow e fel'?

¹⁸ Se ri nano a ri ku luut ilo poktow e fat a, riu tapotfafalek. Ma se a fat gii ku luut talo, fat a eu sii mongmong ini."

¹⁹ Wimi fam pris lamlam ma fan titsa lofafanau ri ka sik ini ti sal una bingfamti saupe, anwarow ri parfat ini i e war ine warwar toftof gii lo ri. Sakle ri soke re tongge.

Bas mani tife Sisa

²⁰ Fam pris lamlam ma fan titsa lofafanau ri efe kausi tikin lo Yesus, gii ri ka tule re fa na parpar borong usi, sakle tongge a riu fafanas iri ini ri buratikin ini riu ong lo fan warwar kia. Ri sangfi ini riu la ongni e ti ton sunwar Yesus eu gon ini, usi ini riu fasi una towfu ilo anganggon na mata e gapman bakir.

²¹ Tongge a ri ka gatmo, "Titsa, kemeu parfat ini o gon ma fabenge ine fan sa e riis. O tibi fasi una

ti lo galu kere fa ma ini fa ku tam, sakle o fabenge
ine sinang ke Deo ususi e sa e tикин.

²² E riis ini kemem u bas mani tife Sisa, tam e
tam?"

²³ Yesus e par sikii sekit e sinsinanguri ma i ka
war,

²⁴ "Fanangsi yau ine ti mani. Panta ma asow e
se legii, ilo?"

²⁵ Ma ri ka koso, "Panta ma asow e Sisa."

I ka war singri, "Le ku ngo aiya, tow e sa ke Sisa,
tife Sisa, ma sa ke Deo, tife Deo."

²⁶ Ri tibi fasi una faliilngeni lo sa e sam war ini
na mat fuun. Ma ri ka la kuuf singi e koso singri
are gii, ka la tek borong sok lo ri.

Fan Sediusi ri gatmo e Yesus use matmatet mil

²⁷ Fan Sediusi ri ta tongge ri peteng ini e tek ti
matmatet mil, fa lo ri, ri puek tało Yesus tura neng
e gatgatom.

²⁸ Ri ka sa gatmo aregii, "Titsa, Moses e siitufu
tif kiar aregii, 'Le ti kaltu ku met kosngi e ke wok
ma ka tiflik mel e siksikwaru, tualik e samusu tili
e wok a, usi eu mel e siksikow e tualik.'

²⁹ E mel e baba fis na fatualik, neng baba tikii e
tili e neng e fefin ma ka su met kosngi ma ka tiflik
mel e siksikwaru.

³⁰ Neng baba e u ka su gorot aiya ming.

³¹ Neng baba e tuul ming ka tili. Baba fis na
fatualik nano a ri tiin tili e wok a ma ri nano,
ri ka tiin famete kosngi, sakle e tek tikas lo ri ek
fafuutngeni e ti sikow.

³² Wimi, wok ming a ka met.

³³ Arik a, lo biing na matet mil, wok a ku ta ke se sekit lo ri a ma baba fis na fatualik a ri ka tiin tili e wok a?"

³⁴ Ma yesus ka koso, "Tongge lo biing gii ri tiin tinaule.

³⁵ Sakle fa a Deo ka peteng ini ri fasi una matet mil ma una kiis tura wimi, ri amu tibi tinaule

³⁶ ma ri amu tibi met, le riu la ngo are fan anggelo. Iri ta fan sikskow e Deo, anwarow i e sau famtet familri.

³⁷ Sakle Moses tibom e sau fanangsi ini tongge ri met riu matet mil. Anwarow lo sunwar lo iif ulo au, Moses e fotngi e Taufi ini 'Deo ke Abram, ke Aisak ma ke Jekop.'

³⁸ I e tibi ta Deo kere tongge ri met, e tam. I e ta Deo kere tongge ri liuliu, anwarow na mata e Deo, tongge nano ri liu."

³⁹ Fa lo re fan titsa lofafanau ri ka war singi, "Titsa, o kos fakausi tикин."

⁴⁰ Ma e am la tek tikas e au buru una mu gatmo ming, anwarow ri soke.

Mesaiya e ta se

⁴¹ Wimi Yesus ka peteng tifri, "Are ini gii ri ka peteng ini Mesaiya e ta sikow e Dewit?

⁴² Ma Dewit tibom e sau peteng malal aregii ilo buk Sam:

'Deo e peteng tife Taufi kiang aregii,

"Kiis wagii lo galu miil lo yau,

⁴³ ku muut lo biing yau tauf re tongge na matam-fais kiam

ilo pikliu e rawas kiam." '

⁴⁴ Arik, areini gii Dewit kabuk bou fotngi e Mesaiya ini Taufi kia ma Mesaiya ku ta sikow?"

⁴⁵ Biing tongge nano ri tiin ongong uwa, Yesus ka war singe fan disaipel kia aregii,

⁴⁶ “Ate kausi use re fan titsa lofafanau. Ri su bur liflifit faliu tura konona fang kolos ma ri ka su isisa e fan male una umumat ini riu arare ri ilo ma ri ka su bur kiiskiis ilo fan sia i famu sekit lo fam felun ningning ma ilo fam biing una gowgow e fan tiim bakir.

⁴⁷ Ri gurgurum ine fan makos ma ri ka kinkinow e fam fel keri ma ri ka ngar gowgow e fan ningning taptapak tикин. Matang kaltu aiya riu kepe e singmat na ongker lo biing na anganggon.”

21

Finafen ke wok makos sasngal

¹ Biing Yesus e akte mata, i e pari e tongge tuba mel ri basbas fam finafen keri ulo bala sinatiim ke Felun Nining Bakir.

² I e pari ming e neng e wok makos sasngal e sa bas ine ke boron 2 toiya.

³ I ka war, “Ya peteng tикин tif gam, wok makos sasngal gii, i e bas bakir tикин iyat ire tongge nano gii.

⁴ Tongge nano gii ri fafen ine borong galu lo fan tuba ri ma galu bakir ka ngosok, safle wok gii, i e fafen ine mara mok gii, i ku liu lo.”

Fan tintof una fafanas ine biing muut

⁵ Fa lo re fan disaipel kia, ri war talo fam finapite tinglo Felun Nining Bakir ini e fapete ine konona fam fatfat ma fam finafen ri fafen ini tife Deo, sakle Yesus e war,

⁶ “Fan mok gii gam ka pari gii, e mu mel e biing eu puek, ma ku la tek ti fu lo ri eu la ngosok

ilo poktow e ti neng e fu. Riu tias berbereng iri nano."

⁷ Ri ka gatmo, "Titsa, nangis fan mok gii eu fuut? Ma sa eu ta tintof una peteng fate ini fan mok gii e sau bala puek?"

⁸ I ka koso, "Gam u ate are tikas ka gurum i gam. Anwarow fa fuunfuun riu puek lo asang ri ku peteng ini, 'Yau gii Mesaiya,' ma, 'Biing e sau fatat.' Mangena usi ri.

⁹ Biing gam u ong lo fan sinseng lo tuui ma fam fagorot falifu ire tongge tura gapman keri, gam u tibi soke, fan mok gii e samusu puek famu, safle biing muut eu tibi puek saupe."

¹⁰ Kala ka war singri, "Nenge male eu fapaket tura neng e male, ma neng e matambia eu fapaket tura neng e matambia.

¹¹ Eu mel e fanggi lamlam, biis faen, fan minse lamlam, ilo fanenger fan male ma fan mok una pete soksoke ire tongge, ma fan tintof lamlam tinglo balambat.

¹² "Sakle famu ine mara mok nano gii, riu bi bingfamti gam ma ri ku bero i gam. Riu tatfe gam wilo bala fam felun ning ma fam felun rerek, ma ri ku uun gam, ri ku la fetiuf gam i famu ire fang king ma fang gapman. Fan mok gii eu fuut, naflow e asang.

¹³ Mok gii eu fuut, usi ini eu ta sol kemi una sesngeni e konona sunwar tifri.

¹⁴ Safle famu ine fan mok a, gam u su balamas, usi ini gam u tibi sang kut, ini are gam u fakale lo gam.

15 Anwarow, yau tow e fan warwar ma atausimale tif gam usi ini eu tek tikas eu fasi una fasange singi ma una fatinge tura.

16 Tautaumi ma tintimmi, fan tualikmi, ge lo gam ma fenfenngomi riu solamuf gam, ma ri ku paketmet ire fa lo gam.

17 Tongge nano riu is gam, anwarow lo yau.

18 Sakle eu tek ti an sianolow e tikas lo gam tinglo paklu eu tam ini.

19 Gam samusu ti rawas, usi ini gam u kepe ninliu.

20 "Biing gam u pari e fan soldia fuunfuun riu lifti e male ina Jerusalem, gam kamu parfat a, ini biing una bero ini e sau fatat.

21 Biing a, touf re tongge ri melmel ina Juda, ri ku fin ri ku la ilo fam pakpaklunmale. Touf re fa ilo bala siti ina Jerusalem ri ku suu ma fa ina male ine siti riu tibi kau.

22 Anwarow biing a, e ta biing Deo eu tow e fang kokos usi ini eu fasefu e fan mara warwar kia, lewa ri kabuk siitufu.

23 Kiskam singre gelefín tian ma fan tintinabo-i a silksikwari ka liklik iwa. Are riu gorot lo biing a! Eu mel e singmat na mafet ilo male ma balasak ke Deo usi re tongge gii.

24 Fa riu met singe ringgot ma fa ri ku un ri are fang karabus wilo an mara male. Fan Jentael riu pii ofofo e male ina Jerusalem ku muut lo fam biing kere fan Jentael eu fasef.

25 "Eu mel e fan tintof ilo bala pisii, funiil ma fang keltot. Singmat na ongker eu ta ilo nal, ma ri ku sangfuunfuun singe dungow e panaf ma kirai ina kasap.

²⁶ Tongge riu met pelpel singi riu sokeni e sa eu puek talo ri wagii lo nal, anwarow fan mok rawas tinglo batsok riu ban.

²⁷ Lo biing a, riu pari e Sikow e Kaltu, eu puek ilo bala pam balbal tura rawas ma singmat na finaswen.

²⁸ Biing fan mok gii eu tofnge puek, ti riis ma o ku par wiyat, anwarow biing una kepfamil gam e sau fatat."

²⁹ I ka peteng tifri ine warwar toftof gii, "Par lo au fik ma mara kalut nano.

³⁰ Biing riu dur, o tibom o fasi una pari ma o ku parfat ini biing lo pisii e sau fatat.

³¹ Ilea, e su ngo ming aiya. Le o ku pari e fan mok gii eu fuut, o sau parfat ini kepmale ke Deo e sau fatat.

³² "Ya peteng tикин tif gam, kulu gii, riu tibi famete ku muut lo fan mok gii eu fuut.

³³ Batsok ma nal eu tam iru, sakle sunwar kiang eu tibi fasi sekit una tam ini.

³⁴ "Atate, are fan sinang una sangfoesngeni e melmel, sinang una bengbeng ma sinang una sangfuunfuun use fan mok wilo pinumfow e kaltu ka afit gam ma gam ku tibi parfat ma biing a ku fakuufnge gam are ano.

³⁵ Anwarow biing a eu puek talo re tongge nano a ri ka melmel ilo nal kiruur gii.

³⁶ Bingne gam samusu ate, ma nining usi ini titinge kemi eu kulfi e fan mok a ka rong una fuut, ma ini gam ku fasi una ti na mata e Sikow e Kaltu."

³⁷ Tikii neng, tikii neng e biing, Yesus e fababenge ilo bala Felun Nining Bakir, ma lo fan

efef i e lala ilo paklunmale Olif, ka la melmel ilo lo fam panambiing.

³⁸ Ma tongge nano ri pukpuki, una sa ongongne singi ilo bala Felun Nining Bakir.

22

Judas e a-uu una solamufu e Yesus

¹ Biing En Bakir lo Beret e tek ti Is ilo, (ri fotngi ini En na Kepsiliwi) e rong una puek,

² fam pris lamlam ma fan titsa lofafanau ri soke re tongge, iya ri ka sik ine ti sal borong una bingfamti e Yesus una la paketmet ini.

³ Kala Satan ka sispi e Judas ri fotngi ming ini Iskariot. I e ta neng lo re tikii sangful ma e u na disaipel.

⁴ Judas ka la use re fam pris lamlam ma fam paklure fan efefe lo Felun Nining Bakir ka la fagati tura ri ini are, i eu solamufu e Yesus.

⁵ Ri la terterer tikin ma ri ka a-uu una tow e mani tifi.

⁶ I e a-uu lo sunwar keri ma i ka parpar ine ti sal una tow e Yesus ilo limlim ri, lo biing galung kaltu ri tam iri inaisa.

En muut ke Yesus tura fan disaipel kia

⁷ Biing En Bakir lo Beret e tek ti Is e puek, i e biing a ri ka sagisu pakpaketmet ine boron sipsip ari una en ma una sangfi e biing lo En na Kepsiliwi,

⁸ Yesus e tuleni e Pita ma Jon ma ka war, "Kamuw la, kamu ku la fagati salu kiar una gow e En na Kepsiliwi."

⁹ Ru ka gatmo, “O bura ini kamau la terer salu kiar iya?”

¹⁰ I ka koso, “Biing kamuw kau ilo bala siti, neng e kaltu e ufufu lala e botol na dan eu tupnge kamu. Kamuw usi ku la ilo bala fel a, i ku la kaulek ilo bala,

¹¹ ma kamu ku peteng tife tamow e fel a aregii, ‘Titisa e gatom: Iya e keptim fel gii, ya ku fasi una eni e En na Kepsiliwi tiim tura fan disaipel kiang ilo?’

¹² I eu fanangsi kamu ine neng e keptim fel bakir iyat, ine mara mok ilo bala ri sau fagatiifu. Wa, kamuw la fagati e fan tuan ilo.”

¹³ Biing ru la, ru pari e fan mara mok e su ngo aregii Yesus kabuk peteng tif ru ini, iya ru ka fagatiifu e fan tuan wilo En na Kepsiliwi ulo.

¹⁴ Biing anmatam pisii e sau puek, Yesus tura fan disaipel kia ri la kiis liflifi e teibel.

¹⁵ Ma i ka war singri, “Ya bura tикин ini famu ma ya kamu kepe ongker yau bi eni e En na Kepsiliwi gii tura gam,

¹⁶ anwarow ya peteng tif gam, ya mu tibi eni mil e en gii, ku muut lo biing En tикин eu puek ilo bala kepmale ke Deo.”

¹⁷ Wimi ka kepe e kap ka katfarsi e Deo ma ka war, “Kepe, gam ku faseni falifu i gam.

¹⁸ Anwarow, ya peteng tif gam, ya mu tibi in waen mil, ku muut lo biing kepmale ke Deo eu puek.”

¹⁹ Ma i ka kepe e beret ka katfarsi e Deo lo, ka paek papaki, ka tow tifri ma ka war, “Igii e fong ya tow usi gam; gow aregii una sangsagif famil yau.”

20 Lo tikii sal, wimi ini ri sam en tikii, i e kepe e kap ma ka war, “Igii e kap, e ta war a-uu fuu ilo bala andakung, iya ka lingiuf usi gam.

21 Sakle limow e kaltu a ku solamuf yau, e ta igii ilo teibel, tiim tura limang.

22 Sikow e Kaltu eu la aregii Deo kabuk fagati, sakle kiskam singe kaltu a ku solamufu.”

23 Ri ka tofnge una fagatomnge faliu iri tibom ini e ta se sekit lo ri eu gorot aiya.

24 Ming, neng e fagorot ka matet u falifu iri ini se lo ri, e bakir iyat ire fa.

25 Yesus ka war singri aregii, “Fang king kere fan Jentael, ri akakte ri tibom ma ri ka parparpu ire fa; ma ge lamlam keri, ri bou foteng ri tibom ini ‘fatfatfenngo na faules.’

26 Safle gam, gam u tibi gorot aiya. Gam u su gorot aregii; se a ka bakir ina balmi, e samusu faporo e i tibom, ma se a ka ta kaltu bakir kemi, i e samusu fam are kaltu na fam faules kemi.

27 Anwarow se e bakir? Kaltu a ka kiis una en tam kaltu a ka tuutuung? Se a ka bakir e ta kaltu a ka kiis una en. Sakle yau, ya fam falifu i gam, are kaltu na fam faules.

28 Gam sau melmel tura yau lo fan mara biing fam fatof e pupuek talo yau.

29 E su ngo aregii Tabuung ka tow e rawas ma miang una efe ilo bala kepmale, yau ming, yau tow e rawas ma mia mi una efe ilo bala kepmale,

30 usi ini gam u en ma in ilo kepmale kiang ma gam ku kiis ilo konona fan sia ma gam ku efe lo tikii sangful ma e u na matambia tingna Israel.”

31 Yesus ka war aregii, “Saimon, Saimon. Satan e sam kepe e war a-uu una tofo e titinge kemi are

tongge ri sageufu e fam piin tinglo fan wit.

³² Sakle Saimon, o, ya sam nining ini titinge kiam eu tibi luut. Ma biing o sam didiu mil usi yau, o samusu faraungeni e tanga tuamlak."

³³ Sakle Pita e koso, "Taufi, ya su nene una la tura o ilo karabus ma una met tiim tura o."

³⁴ Yesus ka koso, "Pita, ya peteng tifo, geenggii, famu ine porot ma ku teng, ou fatuul peteng ini o tibi parfat lo yau."

³⁵ Wimi Yesus ka gatom ri, "Biing ya tule gam una la sesngeni e Konona Sunwar ma gam ka tibi sele fam poket, tam fam bek tam ti ton su ke mi, gau pospos ming lo ti mok, tam e tam?"

Ma ri ka koso, "E tam."

³⁶ I ka war singri, "Sakle gii, le ku mel e kem ti poket, tam ti bek, kepe ming, ma le ku tek kem ti bainat, umat ine kem kolos tapak ma o ku feli e kem ti iri.

³⁷ Ri sam siitufu aregii, 'Ri wes tiim ini ming tura re tongge na tumtubiil.' Ma ya peteng tif gam ini fan mara mok gii e samusu fuut lo yau. Yow, fan mara mok fam profet ri sam seti lo yau e sau puek e bengu una fabonti."

³⁸ Fan disaipel ri ka war, "Taufi, par, e u e bainat gii."

Jesus ka koso, "E sam ta ilea."

Yesus e nining ulo paklunmale Olif

³⁹ Yesus ka la kanek ulo paklunmale Olif aregii ka sagisu gowgow, ma fan disaipel kia ri ka minami.

⁴⁰ Biing ri la fespuek, i e war singri, "Gam u nining usi ini gam u tibi luut lo falam."

41 I ka fes ka la u tapak balik are fumfat ri bas ini, ka la kiis pukungkek ma ka ningin,

42 “Tabuung le o ku fabur, tii ine kap gii kosing yau, sakle ou tibi usi e fabur kiang, ou usi e fabur kiam tibom.”

43 Nenge anggelo tinglo balambat ka puek talo, ka sa faraungeni.

44 Yesus e ongni ini fow e mafet tikin gii ka ningin rawas tikin ma songsongow ka puek are dadak ma ka riring pu talo nal.

45 Biing i e sam ningin tikii, i e ti ma ka la mil usi re fan disaipel kia ka la pari ini ri masun, le ri sang kuuluung tikin.

46 I ka fongen ri ma ka gatom ri, “E tamu gam ka masun? Matet gam ku ningin usi gam u tibi luut singe falam.”

Judas e solamufu e Yesus

47 Biing i e gongon uwa, neng e galung kaltu ri ka sa puek, ma kaltu ri fotngi ini Judas e ta neng lo re tikii sangful ma e u na disaipel, i e famu puek iri. I e sa la sekit use Yesus una sa osngi,

48 sakle Yesus e gatmo, “Judas, o bala solamufu e Sikow e Kaltu ine faoseng, be?”

49 Biing fan disaipel ke Yesus ri pari e mok e bala fuut ri ka gatom, “Taufi, e fasi ini kemem u fapaket ine fam bainat kemem?”

50 Ma neng lo ri ka sapingu fu e ambalbalu miil e kaltu na mus ke paklure fam pris.

51 Sakle Yesus e war, “Mele am gow ming e sinang gii.” Ma i ka puse lo ambalbalu e kaltu na mus a ma ka fasko mil.

52 Wimi Yesus ka war singre fam pris lamlam, tongge na famu kere fan efefe lo Felun Nining Bakir ma tongge lamlam, seri gii ri ka sa la usi, “E tamu, ya famfamu ire ti galung kaltu una gowgow e fan sinang saksak, gii gam ka sa la usi yau tura fam bainat ma fang kepsil?

53 Mara biing ya melmel tura gam ulo bala Felun Nining Bakir ma gam tibi tow e ti liumi ulo yau, sakle gii e ta biing kemi biing ke anor una fakulef.”

Pita e gurum ini e tibi parfat lo Yesus

54 Kala ri ka bingfamti ma ri ka onu ka la ulo bala fel ke paklure fam pris ma Pita ka ususi ri lala. I e su fesfes lala u tapak balik i ri.

55 Sakle biing fa lo ri, ri gow e iif ulo falifu lo pakankmale lo fel a ma ri ka fakiisnge liflifti, Pita ming e sa kiis tura ri.

56 Nenge fefin na faim ka pari e Pita lo anten lo iif e kiiskiis. I ka iliim fakausi ma ka war, “Kaltu gii e ta i ming tura.”

57 Sakle Pita e gurum kakali ma ka war, “Tiner, ya tibi parfat lo.”

58 Wimi balik neng e kaltu kuriik ka pari ma ka war, “O ming, o ta neng lo ri.”

Pita ka koso, “Kaltu, yau e tam.”

59 Kala, are tikii awa wimi, neng e kaltu ka war talo ming, “Tikin, tikin, kaltu gii e ta i ming tura, le i e ta kaltu tingna Galili.”

60 Sakle Pita e war, “Kaltu, ya tibi parfat lo sa o seseng ini.” Ma lo sum biing sekit a, i ka warwar, porot e teng.

61 Lo biing a, Taufi e giliim ka alal sekit lo Pita. Kala Pita ka la sangfi mil e sunwar ke Taufi: “Geenggii na panambiing, famu ine porot ma ku teng, ou fatuul gurum ini o tibi parfat lo yau.”

62 Pita ka la kosing ri ka suu una male ine fel a ka la tengteng kaukaung.

Fan efefe ri tumaru e Yesus

63 Tongge a ri ka efefe lo Yesus, ri tofnge una tumaru ma una pakti.

64 Ri ka fis kali e wan mata ine sun laplap ma ri ka gatmo aregii, “Peteng tif kemem! Se gii ka pose o?”

65 Ma ri ka gow e fanenger fan warwar saksak ming talo.

Yesus e ti u famu ine Pailat ma Erot

66 Biing pisii e fen, ge lamlam, tiim tura fam pris lamlam ma fan titsa lofafanau ri tiim lo ri, ma fan efefe ri ka onu e Yesus ri ka sa fetiufu u famu iri,

67 ma ri ka war, “Le ku ta o na Mesaiya, o ku peteng tif kemem a.”

Sakle Yesus e koso singri aregii, “Le ya ku peteng tif gam, gam tibi fasi una titinge sing yau.

68 Ma le ya ku gatom gam ine ti gatgatom, gam tibi fasi una koso.

69 Sakle tofnge ting geenggii ma ku la, Sikow e Kaltu eu la kiis ilo galu miil lo Deo, se e rawas iyat sekit.”

70 Ri nano ri ka tiin gatmo, “O na Sikow e Deo, be?”

Yesus ka koso singri aregii, “Sunwar kemi e riis ini ya na Sikow e Deo.”

71 Kala ri ka war, “Usi e tamu gii kiar ku bi fauun usi re ti fa una sa peteng ine ti ton sinseng ming? Kiar tibom, kiar sau bom ongni riis tinglo ngusu.”

23

1 Kala tongge nano a ri ka tiim lo ri, ri tiin matet ma ri ka onu e Yesus ri ka la tow tife Pailat.

2 Ri ka tofnge una otngi ri ka war aregii, “Kemem sam sikseni ini kaltu gii e sau pete taltal falek ire tongge nano kemem ma e tibi a-uu lo kemem ini kemem u bas mani tife Sissa ma i ka bou peteng ini i na Mesaiya, i e ta neng e King.”

3 Iya Pailat ka gatmo e Yesus, “O ta King kere fan Juda?”

Yesus ka koso, “Yow, e su ngo are lea o ka war.”

4 Wimi Pailat ka peteng tifre fam pris lamlam ma tifre tongge nano a aregii, “Ya tibi sikseni e ti anwarow gii ini ya ku tafu e kaltu gii ilo anganggon.”

5 Sakle ri tiin war rawas aregii, “I e pete taltal falek ire tongge tingna Judia ine fam fabenge kia. I e tofnge tingna Galili ka sa la ka sa muut sekit gii.”

6 Lo biing Pailat e ong aiya, i ka gatom, “Kaltu gii e ta tingna Galili?”

7 Biing Pailat e sau parfat ini Yesus e ta tinglo galu gii Erot ka efe lo, i ka tuleni e Yesus use Erot, anwarow Erot ming e ta una Jerusalem lo biing a.

8 Biing Erot ka pari e Yesus, i e fefeal tikin, le e sau bura una pari ting wa, anwarow i e sam ongong lo fan sinseng fuunfuun lo ma ka bura

ini eu par ma Yesus ku gow e ti ton mok na tibou fuut.

⁹ Erot e gatmo e Yesus ine fang gatgatom fuun-fuun, sakle Yesus e tibi koso e ti sunwar.

¹⁰ Fam pris lamlam ma fan titsa lofafanau ri fafatие ming uwa, ri ka ototngi e Yesus ine fan warwar rawas tikan.

¹¹ Wimi Erot tura fan soldia kia ri ka ruur lo ma ri ka tumaru. Ri ka faloski ine kolos ke king ma ri ka tule famila use Pailat.

¹² Lo biing a, Erot ma Pailat ru la fatfenngo, safle famu ini e mok gii, ru fafais iru.

¹³ Pailat ka tau tiim ire fam pris lamlam, ge lamlam kere fan Juda, tura re tongge,

¹⁴ ma ka war singri aregii, "Gam sa tow e kaltu gii tif yau are kaltu una famfamtete e fam fapaket i falifu i re tongge. Ya sam gatom ikikseni na matmi ma ya ka tibi sikseni e ti tubiil kia ususi e fam faoteng kemi.

¹⁵ Erot ming e tibi sikseni e ti tubiil kia ususi e fam faoteng kemi, iya i ka tule famila usi kiar. Aregii gam kabuk pari, kaltu gii e tibi gow e ti tubiil ku fasi ini eu met somu.

¹⁶ Iya, ya ku su fabu-i aiya ma ya ku towfu ku la."

¹⁷ *

¹⁸ Safle ri nano ri tiin tau aregii, "Paketmet ini e kaltu a, ma o ku pikufu e Barabas tif kemem!"

¹⁹ (Ri towfu e Barabas ulo rerek anwarow i e famu ine galung kaltu ri ka fapaket tura gapman

* **23:17 23:17** Fa lo re fang kaltu parfat ri sang ini su gii e ta nenge wes ming: "E ta ninis keri ini, lo fam biing na En na Kepsiliwi, Pailat e samusu pikufu e tikii tikas lo re tongge ilo rerek, ku la tifri."

ulo bala siti ma i ka pakpaketmet ire tongge.)

²⁰ Pailat e buru ini eu towfu e Yesus ku la, gii ka gatom ri mil usi.

²¹ Sakle uwa, ri su tautau, “Tut famti lo aupaket! Tut famti lo aupaket!”

²² I ka war baba e tuul singri. “Anwarow lo sa? Sese tubiil kaltu gii e sam gow? Ya tibi sikseni e ti tubiil ilo ini ku fasi lo ini eu met somu. Iya, ya ku su fabu-i aiya ma ya ku towfu ku la.”

²³ Sakle ri tautau na kokor ini i e samusu met lo aupaket, ma fang kaung keri ka kulfi e sunwar ke Pailat. ²⁴ Iya Pailat ka fagati ini i eu usi e fabur keri.

²⁵ I e pikufu e kaltu ri gatom usi, kaltu lewa ri ka towfu ulo rerek naflow i e fapaket tura gapman ma ka pakpaketmet ire tongge. Ma Pailat ka usi e fabur keri, ka tow e Yesus tifre fan soldia una paketmet ini.

Yesus ulo aupaket

²⁶ Biing ri onu ka la, ri biing famti e Saimon tingna Sairini, i e fesfes lala una kau ilo bala siti, ri towfu e aupaket ulo pasow ma ka kepe ka minami e Yesus.

²⁷ Singmat na galung kaltu ri usi lala, u falifu iri, e mel ming e gelefin ri tengsi iya ri kafafatengse lala.

²⁸ Yesus ka giliim usi ri ma ka war, “Gelefin tingna Jerusalem, gam u tibi teng usi yau, gam u teng usi gam tibom ma usi e siksikuami.

²⁹ Le e mu mel e biing na onker e mu puek ma gam ku war aregii, ‘Fefeal seri na gelefin a ri ka pom ma seri a ri ka tiflik fasus ma seri a ri ka tiflik fasusa e ti bo-i.’

30 Wimi

'ri amu war singre fam pakpaklunmale,
“Luut talo kemem”
ma fan tinwen,
“Afit kemem!”

31 Anwarow le tongge ri ku gow e fan matan mok
aregii lo biing kalut e liuliu iwa, sa gii ku fuut lo
biing kalut a eu mang?”

32 E u ming, e ung kaltu na gowgow e fan sinang
saksak, ri uun ru tiim tura Yesus, una la paketmet
iru.

33 Biing ri la puek ulo male ri fotngi ini Antu-
ampaklung Kaltu, uwa ri ka tutfamti ulo aupaket
tiim tura ung kaltu a, neng ulo galu miil ma neng
ulo galu kais.

34 Yesus ka war, “Tabuung, sangintafngi e fan
tubiil keri, anwarow ri tibi parfat lo sa ri gow.”

Ma ri ka pilai satu una faseni e fang kolos kia
lo ri tibom.

35 Tongge fuunfuun rifafatie ri ka alalal ma ge
lamlam keri, ri ka su ruuruur lo, ma ri ka war. “I
e faliungere fa; towfu ku bou faliungeni tibom, le
ku ta i na Mesaiya ke Deo, se Deo e sam wele.”

36 Fan soldia ming ri puek ri ka sa tumaru ma
ri ka tow e waen gin tifi,

37 ma ri ka war, “Le ku ta ini o na king kere fan
Juda, faliunge o tibom.”

38 E mel e sunwar ri seti uiyat ini, wewes lo
e ngo aregii, “KALTU GII, E TA KING KE RE FAN
JUDA.”

39 Neng lo re ung kaltu a ka kulkulik unaisa ka
tumaru aregii, “E tibi ta ini o na Mesaiya? Arik,
faliunge o tibom, tiim tura kama!”

40 Sakle neng lo ru e porow, ma ka war, “O tibi sokeni e Deo, le e ta o ilo bala tikii mafet?

41 Kara kepe e mafet ususi e fan sinang kara gow. E riis. Sakle kaltu gii, i e tibi gow e ti tubiil.”

42 Wimi i kam war, “Yesus, biing ou kaulek ilo bala kepmale kiam, ou sagif yau.”

43 Yesus ka koso singi, “Ya peteng tикиn tifo, geenggii ou ta tura yau ilo paradaes.”

Minet ke Yesus

44 Gii, e ngo are 12 kilok lo siat tuntun ma anor ka afti e nal kiruur ka la muut lo 3 kilok lo efef,

45 le pisii e am tibi pal. Ma laplap bakir gii ka kep paki e Felun Nining Bakir ka rages ka u lo.

46 Yesus e tau bakir tикиn aregii, “Tabuung, ya towfu e tangwang ilo limam.” Biing i e sam war tikii aregii, i e sekpaket manangia.

47 Kaltu bakir kere fan soldia e pari e sa e sau fuut, i ka katfarsi e Deo ma ka war, “E tикиn, kaltu gii e ta kaltu riis sekit.”

48 Biing tongge nano gii ri ka puek una sa par lo sa eu fuut, ri pari e fan mok e fuut, ri ka pakti e usus ri ma ri ka la.

49 Sakle tongge a ri ka parfat lo, tiim tura re gelefin gii ri kabuk ususí lala tingna Galili, ri fafatie u tapak balik ri ka alalal lo fan mok gii ma ka fuut.

Ri ofo e Yesus

50 Uwa, e mel e neng e kaltu asow gii Josef. I e ta neng lo re fang kaonsiil ma i e ta konona kaltu riis,

⁵¹ i e tibi a-uu lo fam fagati ma fan mok fa lo ri, ri gowgow. I e puek tingna Judia tinglo taon Arimatia, ma i e nene una pari e kepmale ke Deo.

⁵² I e la use Pailat ka la gatom use pinumfow e Jesus.

⁵³ Wimi i ka kepu ini, ka afti ine fan laplap ma ka towfu ulo balang kenit ri pesi ulo fam ma e tifik tek ti minet rik sam towfu ulo.

⁵⁴ E ta biing una fagati ri use Biing Sabat, le e sam rong una tofnge.

⁵⁵ Gelefin gii ri ka usi lala e Jesus tingna Galili, ri minami e Josef ka la ulo balang kenit, ri ka la par ini are ri fangongi e pinumfow e Jesus ulo bala

⁵⁶ ma wimi ri ka la mil ulo male ri ka la fagati e fan sanda ma fan wel e mel e konona sanow. Safle ususi efafanau, ri manau lo biing usi, le e ta Biing Sabat.

24

Jesus e matet mil

¹ Lo biing baba tikii lo wik, biingbiing e mok tикин, gelefin a ri kepe e fan wel ma sanda e mel e konona sanow lewa ri kabuk fagatiufu, ri ka la tura wilo balang kenit.

² Ri ka pari ini fumfat ulo matow e balang kenit a, ri sau liitufu,

³ safle biing ri kaulek, ri tibi sikseni e pinumfow e Taufi Jesus.

⁴ Biing ri niil na sangsang use mok gii, saupesak ung kaltu ru los lo fang kolos e furfurat are ampil, ru sa ti unais ri.

⁵ Gelefin a ri soke tикин, гии ri ka por ri ka parpu use nal, safle ung kaltu a ru war singri aregii, "Usi e tamu gam ka sa sik ine kaltu e sam liu ina balre fan minet?

⁶ I e tam ini gii; i e sau matet mil! Gam sang mil ini are i e peteng tif gam, lo biing i e ta uwa tura gam una Galili:

⁷ 'Sikow e Kaltu, ri samusu tow ilo limre tongge na tumtubiil, ri ku tut famti ilo aupaket ma lo biing baba e tuul, i eu matet mil.' "

⁸ Iya, ri kam sagif famila mil e fan warwar kia.

⁹ Biing ri mil tinglo balang kenit, ri sa seseng ine mara mok gii tifre tikii sangful ma e tikii na disaipel ma tifre fanenger fan tongge ming.

¹⁰ Maria Makdalен, Joana, Maria tinow e Jeims, ma fanenger fang gelefin ming tura ri, iri lea ri seseng ine fan mok gii tifre fan apostel.

¹¹ Safle fan apostel ri tibi titinge singre gelefin a, anwarow ri sangfi ini fan warwar kere gelefin a, e su ta fan warwar na lomba.

¹² Safle Pita e matet ka filau ka la ulo balang kenit. Biing i e la kwau, i e pari e safle fan laplap e la ngosok ma i ka la mil ma ka sangsang fuunfuun lala use sa e sau fuut.

Ulo sal una la wina Emaus

¹³ Lo biing a, un neng lo ri, ru fes lala ulo sal una la ilo neng e taon ri fotngi ini Emaus. Male a e tapak tикин ine male ina Jerusalem, e ngo are tikii sangful ma e tikii na kilomita.

¹⁴ Rufafawar lala iru tibom use fan mara mok e sau fuut.

¹⁵ Biing ru fafagon lala ma ru ka basbas lala ine fan sangsang ke ru, u falifu iru tibom use fan sa

e sau fuut, Yesus tibom e puek, ka sa fes lala tura ru.

¹⁶ Ru pari safle Deo e kaleni e matmatru, gii ru ka tibi ilmi.

¹⁷ Yesus ka gatom ru, “Kamu seseng lala ine sa biing kamu fesfes lala?”

Ru la ti borong sok ma matmat ru ka fanangsi ini ru sang kuuluung tikin.

¹⁸ Neng lo ru, asow gii Kleofas ka gatmo, “O am su puek gii o ka tibi parfat lo fan mok e sau fuut leii na Jerusalem lo bala fam biing gii?”

¹⁹ Ma Yesus ka gatom ru, “Sese fan mok?”

Ma ru ka koso, “Fan mok e fuut lo Yesus tingna Nasaret. I e ta profet, ma i e warwar ine fan warwar rawas ma e gowgow e fam faim rawas na mata e Deo ma na matre tongge nano.

²⁰ Fam pris lamlam ma ge lamlam kerer ri tow ulo limow e gapman, gapman ka anganggon singi, ma ri kam tut famti ulo aupaket;

²¹ safle kemem, kemem sam titinge ini i e ta kaltu una kepfamil re fan Israel. Ma neng e mok ming: Geinggii e ta biing baba e tuul, wimi ine fan mok gii e sau fuut.

²² Su ming, fa lo re gelefim kemem, ri pete sangfuunfuun i kemem. Geinggii lo biingbiing e mok tikin, ri la ulo balang kenit,

²³ safle ri tibi la pari e pinumfow. Ri mil ri ka sa seseng tif kemem ini ri pari e fan anggelo, ma fan anggelo ri ka peteng tifri ini Yesus e sau matet mil.

²⁴ Kala fa lo re fan taltalumem ri ka la ulo balang kenit ma ri ka la sikseni aregii gelefim a ri kabuk sa seseng, safle i, ri tibi pari.”

25 Ma Yesus ka war singru aregii, “Sinsinangumu e tibi ten ma balbalmu e tibi matet saupe una titinge lo fan warwar fam profet ri sam sesngeni!

26 Are ini, e tibi fasi ini Mesaiya e samusu kepe fan ongker gii, ma wimi kamu kaulek ilo bala ke finaswen?”

27 Ma i ka fatenu tif ru, tofnge tinglo Moses ma fan mara profet, e fan sa ri sau peteng ini ulo bala sunwar pepe, lo i tibom.

28 Biing ri tuul rong una puek ulo sun male gii ru ka lala wilo, Yesus e gorot aregii ini i e bala la sekit.

29 Sakle ru war rawas singi, “Melmel tura kama le e sau bala efef. E sau fatat ma anor ku luut.” Iya i ka kaulek ulo bala fel una la melmel tura ru.

30 Biing i e sam ta ulo teibel tura ru, i e kepe e beret, tow e katfariis tife Deo ka paekpaki ma ka tofnge una fen ru ini.

31 Kala matmat ru ka la ipiik ma ru ka ilmi ini i, Yesus, ma i ka tam fofoesngeni na matru.

32 Ru ka fagatomnge iru tibom, “E tikin, balbalra e matet saupe tikin, biing i e gongon lala tura kara ulo sal, ma ka pikii e bala e fan sunwar pepe tif kara.”

33 Saupesak, ru matet, ru ka la mil una Jerusalem. Uwa ru la tongeni e tikii sangful ma e tikii na disaipel tura fa gii ri ka ta tura ri, ri tiimtiim lo ri.

34 Ri ka war singru, “E tikin! Taufi e sau matet ma i e sau puek talo Saimon.”

35 Wimi ru kam seseng ine sa e fuut lo ru ulo sal ma are ru am ilmi e Yesus lo biing e paekpaki

e beret.

Yesus e puek talo re fan disaipel

³⁶ Biing ri niil nafafagon use fan mok gii,
Yesus tibom e sa ti u falifu iri ma ka war singri,
"Balamaris tif gam."

³⁷ Ri wi ma ri soke, anwarow ri sangfi ini ri pari
e kenit.

³⁸ Yesus ka war singri, "Usi e tamu gam ka soke
ma gam ka sang fa-u?"

³⁹ Par wagii lo un limang ma ung kekeng. Yau
legii! Gau pot lo yau ma gam ku par; kenit e tek
ti piramfow ma tutuow, aregii gam ka pari, e mel
ilo yau."

⁴⁰ I e war aiya ma ka fanangsi ri ine un limow
ma ung kekow.

⁴¹ Ma biing ri uwa ri tiflik titinge, anwarow ri
gasgas ma ri ka sangfuunfuun, i e gatom ri, "E mel
e ti tuan gii?"

⁴² Ma ri ka tow e sum fis ri pisi tifi,

⁴³ i ka kepe, ka eni na matri.

⁴⁴ I ka war singri, "I legii e sa ya sau peteng ini
tif gam lo fam biing e ta yau uwa tura gam: Fan
mara mok gii ri kabuk seti lo yau ilo bala fafanau
ke Moses, ilo bala fam buk kere fam Profet ma ilo
bala buk Sams, e samusu fawet."

⁴⁵ Wimi i kau pete ten ine sinsinangu ri, usi ini
riu ten use sunwar pepe.

⁴⁶ I ka peteng tifri, "Igii e sa ri seti: Mesaiya
e samusu kepe ongker ma ku matet mil kosnge
minet lo biing baba e tuul.

47 Ma sinang una sangikis ma una sangintafngi e fan tubiil, ri ku sesngeni lo asow tifre fan mara male, tofnge tingna Jerusalem.

48 Gam sau bou pari e fan mok gii ma gam u sesngeni e sunwar lo.

49 Yau la tuleni e sa Tabuung e sam limlim ini usi gam, safle gam u su melmel ilo bala siti, ku muut rawas ting uiyat eu afit gam kiuur."

Deo e kep kanek ine Yesus

50 Wimi i ka famu iri, ri ka la una Betani. Uwa, i e akteni e limow ma ka warfakausi ri.

51 Biing i e warwar fakausi ri, i e la kosing ri ma Deo ka kep kanek ini wilo balambat.

52 Wimi ri ka nining lo ma ri ka la mil wina Jerusalem tura singmat na gasgas.

53 Lo an mara biing, ri la melmel ulo bala Felun Nining Bakir, ri ka nining lo Deo.

**Konona Sunwar lo Yesus Kristus
The New Testament in the Feni language of Papua
New Guinea
Nupela Testamen long tokples Feni long Nuigini**

copyright © 2024 Wycliffe Bible Translators, Inc.

Language: Feni (Warwar Feni)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files
dated 11 Aug 2025

ae8d0c87-7c81-533b-9a3a-4c01263a13a8